

Yon Yon beleş mere iğin Yesu niğ yitiğ gayen kayyiğ

Mere beleş po al hiriğ

¹ Be, hañkapyä wor po meğenya nañkiğya ma forok yekeyäbe Mere goyen hinhin. Mere gobe Al Kurunya hinaryum. Irde Mere gobe Al Kurun. ² Yeñbe meğenya nañkiğya ma forok yekeyä Al Kurunya hinaryum. ³ Det kurun gäbe yeğ hitte mat gab Al Kurun beleş forok yiriğ. Det kurun forok yiriğ gayen Mere go miğmoğ manhan forok ma yewoğ. ⁴ Irde yeñbe Al Kurunya hugiğeñ heğ heğ gote miğ al, irdeb alyä bereyä Al Kurun yikala yird yird hulsi. ⁵ Irdeb hulsi goreb kidoma bana melak heğ hiyen. Irkeb kidomayen sañiğ beleş epte ma wor po isikamde hiyen.*

⁶ Be, Al Kurun beleş al kura teğ kerke wayyiğ. Denembe Yon. ⁷ Yeñbe hulsi goyen goke al momoğ yire yeğ wayyiğ. Gogab al tumñağ meremiğ nurde hulsi goke dufaymiğ tareğ irnayiğ yeğ nurde wayyiğ. ⁸ Goyenbe Yon yiğeñbe hulsi moğ. Yeñbe hulsi goyen goke po tagale yeğ wayyiğ. ⁹ Hulsi fudinde alyä bereyä Al Kurun yikala yirde hiyen gobe Yon kamere gab meğen wayyiğ.

* **1:5:** Miğ kurabe: Goyenbe kidomare niğ alyä bereyä beleş keneğ bebak ma teğ hanjen.

¹⁰ Yeñ hitte mat gab Al Kurun belenbe megen gago iryinj. Irkeb wañ megen gar hinhin. Goyenbe al megen hinhan mar gare keneñ bebak ma tiyaminj. ¹¹ Yeñbe yingende alya bereya wor po hitte wañ yenya hinhin gega, go ma nurd unenbe iginj iginj ma iraminj. ¹² Goyenpoga al kura pel ma irde dufayminj yeñ ge tareñ iraminj marbe Al Kurunyen dirneñ weñ heñ heñ sañinj yunying. ¹³ Dirneñ weñ haminj gobe megen niñ mata ma gama irde Al Kurunyen dirneñ weñ haminj. Irde alyen dufayde ire unyat matare ma Al Kurunyen dirneñ weñ haminj. Yeñbe Al Kurunyen dufayde po dirneñ weñ haminj.

¹⁴ Be, Mere gore po al henbe nenya hinhet. Irdeb tareñminj turñun yañ wor po goyen dilniniñde wor po keneñ hinhet. Tareñminj turñun yañ gobe Al Kurun belen Urminj unñkureñ mun goyen unying. Yeñbe al bunineñ yirde farañ yurd yurd mataminj kurun wor po. Irde mere fudinde manañ makinj wor po hinhin.

¹⁵ Be, Yon Baptais belen yeñ ge kuware tagalde gaha yeñ hinhin: “Al gabe ne belen dinen himyen al go goyen. Yeñ ge yeñbe gaha dinen himyen: ‘Al harhokner wayyen al gobe ne kawan ma himirinya bikkenj bikkenj wor po hinhin. Niñgeb denemya tareñminyabe nere folek wor po,’ dinen himyen gobe gogo,” yirinj.

¹⁶⁻¹⁷ Be, saba sañinbe Al Kurun belen Mose haniñde kerke yeñ belen tagalyinj gega, bunineñ dirde farañ durd durdya mere fudindeya gobe Yesu Kristu haniñde kerke yeñ belen dunying. Niñgeb yeñ belen bunineñ dirde farañ durd durd

mata gobe kurun wor po geb, neñ tumñan guram dirde tareñ dirde go hende hugiñen dunen teban dirde hiyen. ¹⁸ Al Kurunbe al kura kintiñ miñmon gega, Al Kurun Urmiñ unjkuren muñ goreb Al Kurunbe gwahade yen kawan dikala dirde hiyen. Yenbe Al Kurunya tunjande, irde yenya tumñan haryen.

Yon Baptais belen saba tagalyin
(*Matiyu 3:1-12; Mak 1:1-8; Luk 3:1-17*)

¹⁹ Be, Yerusalem taunde niñ Yuda marte doyan mar belen Yon Baptais goyen, “‘Gebe al ganuñ?’ inen gusuñan irnayin,” yinen Al Kurun doloñ ird ird mata doyan marya Liwai marya kura hulyan yiramiñ. ²⁰ Be, mel go wan gusuñan irkeb Yon gobe helwan ma hiriñ. Irdeb kawan kenkelak po, “Nebe Mesaia mon,” yinyin. ²¹ Irkeb sopte gusuñan irdeb, “Niñgeb gebe ganuñ? Ge gayenbe Elaia?” inamiñ. Inkeb wol henbe, “Mon, nebe yen mon,” yinyin. Irkeb mel gore sopte po, “Niñgeb Mose belen Al Kurunyen mere basan al kura wayyen yiriñ go goyenbe ge gago?” inamiñ. Irkeb Yon belen wol henbe, “Mon po,” yinyin. ²² Irkeb mel gore, “Niñgeb gebe ganuñ? Mere bebakken kura dirkeb mulgan hen kunbe hulyan dirhan mar goyen bebak yirtek,” inamiñ. ²³ Irkeb Yon belenbe Al Kurunyen mere basan al Aisaia belen mere tiyyin goyen goke yenbe, “Nebe al kura sawsawa po kurun nana bana gon henbe,
‘Doyan Al Kurunyen belen sope irde huwa irnan!’
yen hiyen yen katiñ al go goyen,” yinyin.
Aisaia 40:3

²⁴ Gwaha yinkeb Yuda marte tikula sanjɩ po gama irde hanjyen Farisi mar kura Yuda mar belɩ hulyan yirke wayaminj gore, ²⁵ “Gebe Me-saia moŋ, Elaia moŋ, irde Al Kurunjen mere basan al yitin goyen moŋ yaha gega, danin geb alya bereya baptais yirde ha?” inen gusunjan iraminj. ²⁶ Irkeb wol henbe, “Nebe fe ulin po baptais yirde hime. Goyenbe den han bana gonbe al kura den belɩ al gwahade yen ma nurd unen han al kura hi. ²⁷ Yenbe harhokner ga wayyen. Ne al gahade gare epte ma yen ge ten meten kurun titek hime. Kahan basanminde nin kan urgun kan yugu ten ten gobe meten kurun moŋ gega, go wor epte moŋ yen nurde hime,” yinyin.

²⁸ Be, mata ten hinhan kurun gabe Betani taunde, Yodan fe sinja kurhan Yon Baptais belɩ alya bereya baptais yirde hinhin belɩ gon forok yirin.

Yesube Al Kurun Urmin

²⁹ Be, ferd faymindebe Yesu go Yon hitte wan hike kenenbe alya bereya gor gabu irde hinhan mar goyen, “Al Kurunjen sipsip al dirin fonen nen ge ten gitik irtin go iro wan hi iro kennan. Yen kamyen gore gab megen nin marte mata bulun kurun gayen pasi iryen. ³⁰ Nebe al gayen gake yenbe, ‘Al kura harhokner wayyen al gobe ne kawan ma himirinya bikken bikken wor po hinhin. Ningeb tarenminbe nere folek wor po,’ yimin gogo. ³¹ Ne belɩ wan alya bereya baptais yirde himyen gabe al gayen Israel mar yikala yirmeke kenen bebak tinayin yen baptais yirde

himyen. Goyenpoga ne wor bikkenbe Mesaiabe al goyen yeŋ bebak ma teŋ hinhem,” yinyiŋ.

³² Irdeb Yesu baptais irkeya mata forok yiriŋ goyen goke Yon Baptais beleŋ gahade momoŋ yiryiŋ: “Be, naŋkiŋde mat Holi Spirit kalyiŋgi kattiŋ yara teŋ uliŋ hende hike kinmiŋ. ³³ Ne wor go ma nurde unmewoŋ gega, fe beleŋ po alya bereya baptais yirayiŋ yeŋ hulyaŋ niryiŋ Al gore, ‘Al kura Holi Spirit kateŋ yeŋ hende hike kenayiŋ al goreb Holi Spirit beleŋ po alya bereya baptais yiryen,’ ninyiŋ. ³⁴ Niŋgeb mata gwahade goyen yeŋ hitte forok yeke kinmiŋ geb, gago al gabe Al Kurunyen Urmiŋ diŋeŋ hime,” yinyiŋ.

Al karwo Yesuyen komatmiŋ hamiŋ

³⁵ Be, sopte fay urkeb Yon gobe komatmiŋ irawa goya gor huwarde hinhan. ³⁶ Irkeb Yesu waŋ kuŋ hike keneŋbe, “Al Kurunyen sipsip al diriŋ diriŋeŋ iro kinyi,” yinyiŋ.

³⁷ Be, komatmiŋ irawa gobe Yon beleŋ gwaha yeke nurdeb Yesu gama irde kwaryum. ³⁸ Gama irde hike Yesu beleŋ fulgaŋ kaŋ yeneŋbe, “Derbe da niŋ nurde waŋ har?” yinyiŋ. Irkeb irem gore wol heŋbe, “Rabai, gebe dare heŋ kuŋ ha?” ineŋ gusuŋaŋ iraryum. (“Rabai” gobe Grik mere matbe “tisa” yeŋ haŋyen.) ³⁹ Irkeb Yesu beleŋ wol heŋbe, “Wayyi, waŋ gabe kiniryen,” yinyiŋ. Irkeb irem gore gama irde kuŋbe hinhin gasuŋ goyen kenaryum. Irdeb naŋa diliŋbe 4 kilok wawuŋbana hiriŋ geb, goyen nalube Yesuya gor po hinhan.

⁴⁰ Be, Yonyen mere nurde Yesu gama iraryum al kurabe Andru. Yeŋbe Saimon Pita kuliŋ. ⁴¹ Yeŋbe

Yesuya hen gabe gor mat po itinj Saimon nin kunj nanjinyinj. Irdeb kenenjbe, “Deyyabe Mesaia kenhar,” inyinj. (Mesaia gobe Grik mere matbe Kristu.) ⁴² Gwaha inenjbe Saimon goyen Yesu hitte tawayyinj. Tawake Saimon goyen Yesu belenj kenenjbe, “Gebe Yon urminj Saimon. Gebe Sifas gininj hinayinj,” inyinj. (Sifas gobe Grik mere mat Pita.)†

Yesu belenj Filipya Natanielya komatminj yirinj

⁴³ Be, go feraminj kunj fay urkeb Yesu go Galili nanjare kwe yenj kunj hinhin. Kunj henja Filip kenenjbe, “Wanj gama nira,” inyinj. ⁴⁴ Filipbe Betsaida taunde ninj al. Andruya Pitaya wor gor ninj po.

⁴⁵ Be, Filip go kadam Nataniel ninj nanjkenenj kurinj. Kunj kenenjbe, “Nenjbe Mose belenj saba sanjiminjde yenj ge kayyinj, irde Al Kurunyen mere basanj mar mananj yenj ge asanjde kayaminj al go goyen kenhet. Yenjbe Nasaret ninj al Yesu, Yosep urminj,” inyinj. ⁴⁶ Irkeb Nataniel belenj wol henjbe, “Nasaret taunde matbe da iginj forok yiyyenj? Epte monj geb,” inyinj. Irkeb Filip belenj, “Wake kure, irde ga kena,” inyinj.

⁴⁷ Be, Yesu belenj Nataniel wanj forok yeke kenenjbe, “Be, Israel mar al fudinde wor po yenj kentek albe gago. Yenjbe usi ma tej hiyen. Hubu wor po,” yirinj. ⁴⁸ Irkeb Nataniel belenj, “Gebe daha mat nurd nunha?” inenj gusunanj iryinj. Irke wol henjbe, “Gebe Filip belenj kunj ne ninj ma ginkeya fik he yokjare hike genhem,”

† **1:42:** Sifas gobe Yuda marte mere, irde Pita gobe Grik marte mere. Deje irawa gote minjbe ‘hora kuruj’.

inyiñ. ⁴⁹ Gwaha inkeb Nataniel belej, “Rabai, gebe fudinde Al Kurun Urmiñ. Gebe Israel marte Doyan Al Kurun,” inyiñ. ⁵⁰ Irkeb wol henbe, “Fik he yokñare hike genhem ginmeke goke tenbe gago dufayge ne niñ tareñ irha? Mata gog mun po moñ geb. Gote folek mata tiñen turñun yañ kurayen kurayen wor hako yenen hen taha geb,” inyiñ. ⁵¹ Irdeb sopte gaha inyiñ. “Fudinde wor po dinen hime, denbe nanñin hol yeke Al Kurunyen miyon belej megen mat hiryon hende Al Kurun hitte hurkun megen katen ten hike yennayin. Irde hiryon gobe ne Al Urmiñ gayen yen bebak tinayin,” inyiñ.

2

Yesu belej fe tigiri tike wain hirin

¹ Be, naña fay irawa hubu hekeb Galili naña bana goñ niñ taun kura Kana gorbe al kura bere tirin gote dula mata kurun forok yirin. ² Yesu miliñbe dula mata kurunde gor hinhin. Yesu wor Galili nañare hinhin. Niñgeb yenya komatminya wor hoy yirkeb gor kwamin.

³ Be, dula mata kurunde gor niñ wainbe hubu hirin. Irkeb Yesu miliñ belej wañbe Yesu goyen, “Mel gabe wain miñmon hahan,” inyiñ. ⁴ Irkeb Yesu gore wol henbe, “Bere,* danin geb gwaha gwaha tiya ninen ha? Mata tiñen turñun yañ titek nalube hako geb,” inyiñ. ⁵ Gwaha inkeb miliñ belej gor niñ meten mar goyen, “Yen belej daha kura tinañ dinkeb go po gama irnayin,” yinyin.

* **2:4:** Yesube Mesaia meten goyen miñ uryin geb, miliñ goyen bere inyiñ gogo.

⁶ Be, Yesu hinhin ya bana goŋbe Yuda marte matare haninya kahanya halde ig uliŋ titek fe farde hanŋen kuwe hora beleŋ po yiriŋ karkuwaŋ 6 gayen hinhan. Kuwe unkuweŋbe fe 100 lita gwahade goŋ hitek. ⁷ Irkeb Yesu beleŋ metenŋ mar goyen, “Kuwe ga fe yunke makin henanŋ,” yinyiŋ. Irkeb fe yunke waŋ tumŋanŋ makin hitiŋ ala tiyamiŋ. ⁸ Irkeb, “Be, fe kura farde yukuŋ dula mata ga tonanŋ heŋ hi al go unnanŋ,” yinke yeŋ yiriŋ gwahade po tiyamiŋ. ⁹ Gwaha tikeb dula mata gote tonanŋ al goreb Yesu beleŋ fe tigiri tike wain hiriŋ goyen tunanŋ uryiŋ. Goyenbe wain gobe metenŋ mar beleŋ gor niŋ kura teŋ wayhanŋ yeŋ ma nuryiŋ. Gega metenŋ mar gobe gwaha mat forok yihi yeŋ nurde hinhan. Be, tonanŋ al gore bere tiriŋ al goyen hoy irke wakeb, ¹⁰ “Albe wain igiŋ wor po go wa yawaŋ yunke nene hanŋen. Irde ep nene hikeya gab wain mali maliŋenŋ goyen yawaŋ yunenŋ hanŋen. Goyenbe gebe gwaha ma taha. Wain igiŋbe kame ga yunenŋ yeŋ nurdeb wain mali maliŋenŋ goyen hubu heke gab gago igiŋ dunha,” inyiŋ.

¹¹ Be, Galili nana bana niŋ taun Kana gorbe Yesu beleŋ hanŋkapa ya wor po mata tiŋenŋ goyen forok iryiŋ. Irkeb komatmiŋ yago mata tiŋenŋ turnunŋ yanŋ tiyyiŋ goyen kenenbe yeŋ ge du-faymiŋ sanŋenŋ iramiŋ.

Yesu beleŋ Al Kurunyen ya balem bana hora metenŋ teŋ hinhan mar yakira tiyyiŋ

(Matiyu 21:12-13; Mak 11:15-17; Luk 19:45-46)

¹² Be, go kamereb Yesube miliŋya kuliŋ yagoyabe komatmiŋya irde tumŋanŋ Kapeneam taunde

katen gor hinhan gega, wawuñ budam ma hinhan.

¹³ Be, Yuda marte gabu nalu kurun kura Pasoba† goyen forok yewen tikeb Yesube taun go tubul ten Yerusalem hurkuriñ. ¹⁴ Kun Al kurunyen ya balem koya milgu irtin bana al gabu irde hanyen sawsawa kurunde gorbe al beley bulmakaw, sipsipyabe kalyingi yago gor yerke al beley wan damu ten hinhan goyen yinyin. Irde hora kapyan hen hen mar‡ manan gasunminde keperde hike yinyin. ¹⁵ Gwahade yenenbe kan kura ten det goyen yusulak ten ten de nin det irde gore po dapna goyen tumnan yusulak tike Al Kurunyen ya balem bana mat sinare katamin. Irde hora kapyan hen hen marte hora goyen yad yemeyke mali ga megen katamin, irde hora yerd yerd gasun wor yabolon tiyyin. ¹⁶ Irdeb kalyingi damure nin yerde hinhan mar goyen yinyin. “Det ga yade kat kunan. Daniñ geb Adoner yabe dawet damu ten ten gasun irde han?” yinyin. ¹⁷ Be, komatmin yago goyen yen beley mata tiyyin goyen kenenbe Al Kurunyen asande mere kura katin hinhin goke bin bak yamin. Merebe

† **2:13:** Bikken Israel mar Isip nana tubul ten Kenan kunin tiyamin yabe Al Kurun beley sipsip al dirin dirnen gasa yirde darim yade yame kantayan sam yirnayin yinyin. Munan al kura gwaha ma tiyamin marbe Al Kurunyen miyon beley wanbe mel gote urmin matalinya dapnamin matalinya goyen tumnan gasa yirke kamamin. Gega meremin gama iramin marbe miyonmin beley yubul tiyamin goke dufay hen hen ge dula mata ten hinhan.

‡ **2:14:** Hora kapyan hen hen mar gobe al beley horamin hoyan goyen yunkeb wolminenbe Al Kurunyen ya balem bana Al Kurun galak ird irdde nin hora goyen yunen hanjen.

gahade:

“Yage goke dufay heñ heñ gore po mununen ten hi,” yitiñ hi. *Tikin 69:9*

¹⁸ Be, Yuda marte doyañ mar gor hinhan goreb, “Mata tiñeñ dahade kura Al Kurun beñ po ga irtek goyen kura forok irke keneñbe fudinde gebe mata gahade ird ird tareñge yañ yeñ gentek?” inamiñ. ¹⁹ Irkeb Yesu beñ wol heñbe, “Al Kurunyen ya balem ga upew urnañ. Irkeb ne beñ naña fay karwore po ya kurun goyen sopte irde pasi ireñ,” yinyiñ. ²⁰ Irkeb mel goreb, “Ya balem gayenbe dama 46 hubu heke gab pasi iramiñ. Goyenbe ge beñbe naña fay karwore po ya ga irde pasi ireñ yeñ ha?” inamiñ. ²¹ Goyenbe Yesu beñ Al Kurunyen ya balem niñ yiriñ gobe yinñeñ ge nurde yiriñ. ²² Kame Yesu go kamyinde mat huwarke gab komatmiñ yago goyen Yesu beñ mere tiyyiñ goyen goke biñ bak yamiñ. Irkeb Al Kurunyen mere asañde hi goya Yesu beñ mere tiyyiñ goyen fudinde yeñ nuramiñ.

²³ Be, Yesu go Pasoba gabu kurun nalure Yerusalem hinhinya goyen mata tiñeñ kurayen kurayen Al Kurun po ga yirtek goyen yirde hike yeneñbe al budam yeñ ge dufaymiñ tareñ iramiñ. ²⁴ Goyenpoga Yesube al biñde dahade hañ goyen keñkela nurde yuneñ hinhin geb, mel goke hekeñ ma nuryiñ. ²⁵ Yeñbe al dufaymiñdebe gwahade hañ yeñ nurde hinhin geb, al kura beñ wañ al kadam ge tagalde al gobe gwahade gwahade yeñ momoñ irtek ma hinhin.

Yesu belen Nikodemusya mere tiyaryum

¹ Be, Yuda marte doyan mar buda bana gon nin al kura denembe Nikodemus goyen hinhin. Al gobe Farisi mar al. ² Yen belen wawun kurare kura Yesu hitte wanbe, “Rabai, gebe al saba yird yird al, irde Al Kurun belen gad gerke wayan yen nurde hite. Al kura Al Kurunya ma hiriryenbe mata tinen kurayen kurayen ge belen irde ha gayen epte ma iryen,” inyin. ³ Irkeb Yesu belen wol henbe, “Fudinde wor po ginhem. Al kura sopte ma kawan hiyyenbe Al Kurun belen alya bereyamin doyan yirde hi bana gon epte ma hiyen,” inyin. ⁴ Irkeb Nikodemus goreb, “Goyenbe al salannen hitenbe daha mat sopte kawan hiyyen? Daha matbe milin binde hurkun sopte kawan hiyyen? Epte mon!” inyin. ⁵ Irkeb wol henbe, “Fudinde wor po ginhem. Al kura mata bulunmin yubul ten fe po baptais tiyyen, irde Holi Spirit tiyyen al gobe epte al gergen sopte kawan hitin yara hiyyen. Munan gwahade ma tiyyenbe Al Kurun belen alya bereyamin doyan yirde hi bana gon epte ma hurkuyen. ⁶ Albe milin binde mat kawan hen hanyen. Gega kawan hitin mar gobe Holi Spirit belen po gab Al Kurun dilinde al gergen yiryen. ⁷ Sopte kawan hawayin ginhem gake hurkunat ma tiyayin. ⁸ Meje miginbe nurde hityen gega, meje gobe gwaha mat wan gon kwa yen ma po nurde hityen. Ningeb Holi Spirit belen gergen yiryen mar goyen wor megen nin mar belen epte ma al gwahade yen bebak tinayin,” inyin. ⁹ Gwaha inkeb Nikodemus belen, “Mere yen ha gobe daha mat forok

yiyyen?” inyin.

¹⁰ Irkeb wol henbe, “Gebe Israel mar saba yird yird al gega, dahade ningeb merene gayen bebak ma ten ha? ¹¹ Fudinde wor po ginen hime. Nenbe saba fudinde yen nurde hityen goke tagalde hityen. Irde mata fudinde dilnininde yenen hityen goke tagalde hityen. Goyenpoga denbe mereninin goyen fudinde yen ma nurde hanjen. ¹² Nebe igin bebak tinayin mat po megen gar mata forok yen hanjen goyen yade saba dirde himyen gega, denbe fudinde yen ma nurde hanjen. Ningeb Al Kurun hire gor nin mata forok yen hanjen gore saba dirmekeb daha mat fudinde yenayin? Epte mon geb. ¹³ Al kura Al Kurun hire gor kura ma hurkurin. Goyenbe ne Al Urmin gayen ga po gab Al Kurunya hen gor mat katmirin. Ningeb Al Kurunyen gasunde nin mata goyen igin tagaltek hime. ¹⁴ Mose beben sawsawa po kurun nan bana gon Israel marya hinhanya baras ain beben po kunere tone in irde he hende kerde isan hirin. Ningeb ne Al Urmin gayen wor Al Kurun beben gwaha po niryen. ¹⁵ Gogab ne nenenbe al tumnan ne nin dufaymin sanin irde Al Kurunya huginen hinayin.

¹⁶ “Al Kurunbe megen nin alya bereya gayen bubulkunne wor po yen nurd yunenbe Urmin unkenen mun goyen basin ma irdeb yunin. Ningeb al kura Urmin goke dufaymin taren iryen al gobe huginen kamde kamdere ma kunbe Al Kurunya huginen hiriryen. ¹⁷ Al Kurunbe alya bereya gayen merem yan yire yen ma Urmin ten kerke katyin. Gwaha titnenbe Urmin beben meten

tiyyen go hende alya bereya yumulgan tiyyen yen Urmin ten kerke katyin. ¹⁸ Niñgeb al kura Urmin goke dufaymin taren iryenbe Al Kurun belen merem yan ma yiryen. Munan al kura Al Kurun Urmin goke dufaymin sanin ma iryen al gobe Urmin unkenen mun goke hekenen ma nuryen geb, bikken merem yan irtin hiyen. ¹⁹ Be, merem yan yird yird gote minbe gahade: hushi kura Al Kurun belen ten kerke megen gar wayyin. Goyenbe albe mata bulun po ten hanen geb, kidoma bana po hitek yirkeb hushi nin amanen ma nurde hanen. ²⁰ Niñgeb mata bulun ten han marbe hushi nin igin ma nurde han. Monjo hulsire forok yeteke mata buluninin kawan henayin yenbe hulsire watek ma yirde hiyen. ²¹ Goyenpoga al kura mata igin igin fudinde po ten hi al gobe hulsire forok yen hiyen. Gogab mata ten hiyen kurun gobe Al Kurunen dufay po gama irde ten hi goyen kawan hekeb al hoyan belen kennayin,” inyin.

Yon Baptais belen Yesu nin kawan po tagalyin

²² Be, go kamereb Yesuya komatminya gobe Yerusalem taun go tubul ten Yudia nana bana gon nin tiyun hoyan yan hoyan yan kwamin. Irde gon nana fay budam ma henya alya bereya baptais yiryin. ²³ Be, goya goyenbe Yon Baptaisbe Salim tiyun bindere Aion gor al baptais yirtek fe iginde wor po hinhin. Niñgeb gor alya bereya turte wan hikeb baptais yirde hinhin. ²⁴ Yon go gwaha ten hinhin gobe fere ten koyare ma keraminya ten hinhin.

²⁵ Be, Yonyen komatyabe Yuda al kura goya yende matare ig ulin ten ten mataya fe baptais

niŋ kadom mohonđe tiyamiŋ. ²⁶ Gwaha teŋ Yon hitte waŋbe, “Rabai, Yodan fe ward iron ɣeya hinaruŋ al gobe al baptais yirde hi. Irkeb al tumŋaŋ yeŋ hitte kuŋ haŋ,” inamiŋ. ²⁷ Irkeb Yon belen wol heŋbe, “Albe mali mali ma meten tinayiŋ. Al Kurun belen meten yuntiŋ goyen po tinayiŋ. ²⁸ Haŋkapyabe, ‘Nebe Mesaia moŋ. Nebe yeŋ ge teŋ meheŋ heŋ wamiriŋ,’ diniŋ hinhem goyen deŋbe nurde haŋ. ²⁹ Al kura bere mekerd unke tewe yeŋ bere gote yare kuyeŋ. Irkeb al gote kadombe waŋ bere tiyyen al gote yare heŋ al goya beremya mulgaŋ heŋ waŋ waŋ ge doyaŋ hiyyen. Irdeb al go waŋ mere tike nurdeb amaŋ hiyyen. Niŋgeb al go amaŋ hiyyen gwahade goyen po ne wor Yesuyen mere momoŋ nurdeb amaŋ wor po hihim. ³⁰ Yeŋbe al deŋem yaŋ hiyyen, munan nebe deŋnem moŋ hewen.

³¹ “Yeŋbe Al Kurun hitte mat katyiŋ geb, al megen haŋ kurun gate folek wor po. Munan nebe megen gar forok yimirin geb, megen niŋ al, irde megen mata forok yeŋ haŋ go po ga nurde bebak teŋ himyen. Fudinde wor po, yeŋbe Al Kurun hitte mat katyiŋ geb, neŋ al megen hite kurun gate tareŋ folek wor po. ³² Yeŋbe Al Kurunyen gasunde niŋ mata goyen diliŋde yeneŋ, mere kirminde nurde hiyen goke tagalde hiyen gega, al kura meremiŋ nurde fudinde yeŋ ma nurde hanyen. ³³ Goyenbe al kura Yesuyen mere nurde usi ma yiyyenbe Al Kurunyen merebe fudinde yeŋ nurdeb gogo gwaha tiyyen. ³⁴ Al Kurun belen teŋ kerke wayyiŋ al gobe Holi Spirit keŋkela wor po untiŋ geb, Al Kurunyen mere po tagalde hiyen.

³⁵ Yenbe Nanin Al Kurun belen bubulkunne wor po yen nurde unenbe det kurun gayen doyan yird yird taren goyen unyin. ³⁶ Ningeb al kura Urmin goke dufaymin sanin iryenbe Al Kurunya huginen hiriryen. Munan Urminde mere ma nuryenbe Al Kuruyen bearar bana hiyen geb, yenya huginen hen hen goyen epte ma tiyyen,” yinyin.

4

Yesuya Samaria bere kura goya mere tiyaryum

¹ Be, Farisi mar gobe Yesu belen Yon Baptais fole irde al budam baptais yirke komatmin budam hen han yeke gote mere momon goyen nuramin. ²⁻³ Ningeb Yesu gobe Yudia nana go tubul ten sopte mulgan hen Galili nana belen kurin. Goyenbe Yesu yingenbe al kura ma baptais yirde hinhin. Komatmin yago belen po ga al baptais yirde hinhan.

⁴ Be, Galili kwe yenbe belenmin Samaria nanayan mat kurin. ⁵ Kunbe Samaria nana bana gon nin taunde kura gor forok yirin. Taun gote denembe Sikar. Sikar taun gobe megen tapum kura bikken Yekop belen urmin Yosep nin tubul ten unyin goyen bindere hinhin. ⁶ Gorbe Yekopyen meten mar belen bikken mete fe tamin kura goyen gor hinhin. Be, Yesu gob belen ulyan kun nana bankahal hen misinen wor po hekeb ulin yul yeke kun mete fete gor keperde usan hen hinhin.

⁷ Gor hikeb Samaria bere kura fe fare yen wayyin. Irkeb Yesu belen, “Fe kura nunke newe,” inyin. ⁸ Goya goyenbe komatmin yagobe kun

binje damu tiniñ yeñ taun bana goñ kwamiñ. ⁹ Be, Yesu belen gwaha inkeb Samaria bere gore wol henbe, “Gebe Yuda mar al, munan nebe Samaria niñ bere. Goyenbe dahade geb fe kura nunke newe ninha?” inyiñ. Yuda marbe Samaria mar niñ igiñ ma nurd yunen awalikde ma hanjen geb, gogo mere gwahade tiyyiñ. ¹⁰ Be, bere go gwaha yekeb Yesu belen wol henbe, “Gebe det igiñ wor po damum moñ Al Kurun belen duliñ guntek gobe det goyen yeñ nurde, fe niñ ginen hime al gayen nenen bebak ten ha manhan det goke gusunan nirwon. Irkeb Al Kurunya hugiñ hitek gird gird fe goyen gunmewon,” inyiñ. ¹¹ Irkeb bere goreb, “Doyan al, mete gabe dukun wor po. Irde fe fard fard detgem moñ gega, damde kun nene igiñ hitek fe goyen farayiñ? ¹² Fe gabe asininiñ Yekop, dirnen wen, sipsipminiñyabe bulmakawminiñya belen nene hinhan. Irdeb nen ge tubul ten dunyiñ. Niñgeb ge gayenbe asininiñ Yekop folek yeñ nurdeb gogo yaha?” inyiñ. ¹³ Irkeb wol henbe, “Al buda mete fe gayen ga nenayiñbe sopte fe niñ yiryen. ¹⁴ Goyenbe fe ne belen yunmeke nennayiñ mar gobe sopte fe niñ ma yiryen. Fudinde, fe ne belen yunmeke nennayiñ gobe Al Kurunya hugiñ hitekde niñ fe. Fe gobe fe kura diliñde mat hugiñ marde wan hiyen go gwahade goyen geb, fe go niyyen al gote binde forok yeñ epte ma pet yiyyen,” inyiñ. ¹⁵ Irkeb bere goreb, “Doyan al, fe ge belen yeñ ha goyen ne nunayiñ. Gogab sopte fe niñ ma niryen. Irdeb sopte fe fard fard niñ gar ma wan hen,” inyiñ. ¹⁶ Irkeb Yesu belen wol henbe,

“Kun almege tupi ten ga wayyi,” inyiñ. ¹⁷ Gwaha inkeb bere goreb, “Nebe almenem mon,” inyiñ. Irkeb Yesu belenbe, “ ‘Almenem mon,’ yaha gobe fudinde yaha. ¹⁸ Fudinde gebe al siptesoñon yade yubul tenbe sopte al ten goya har gobe almege mon. Niñgeb, ‘Almenem mon,’ ninha gobe fudinde wor po yaha,” inyiñ. ¹⁹ Irkeb bere goreb, “Doyan al, gebe Al Kurunyen mere basan al genhem. ²⁰ Goyenbe Al Kurun dolon ird ird gasunbe asininin yago belen dugu* gayenter wan dolon irde hinhan. Gega den Yuda marbe Al Kurun dolon ird ird gasunbe Yerusalem po yen hanjen,” inyiñ. ²¹ Irkeb Yesu belen inyiñ. “Bere, merene ga fudinde yen nura ko. Nanne dolon irnin yenbe dugure gorya Yerusalem taundeya po ma dolon irtek nalu goyen forok yiyyen. ²² Den Samaria marbe al goyen dolon irhet yen ma nurdeya dolon irde hanjen. Munan Al Kurun belen alya bereya yumulgan ten ten gobe nen Yuda mar momon diryin geb, nenbe al goyen dolon irde hite yen nurdeya dolon irde hityen. ²³ Goyenbe Al Kurun dolon ird ird mar kenkelak wor po gore Al Kurunyen mere fudinde goyen binde kerde Holi Spirityen tarende Al Kurun dolon irtek nalube forok yiyyen. Go nalu gobe hanka gago forok yihi. Al Kurunbe mata gwaha mat dolon ird ird mar goke nankenen hiyen. ²⁴ Al Kurunbe gogo hi yen ma kente. Yenbe Holi Spirit yara po geb, dolon irnin yenayin marbe Holi Spirityen tarende meremin fudinde goyen binde kerde gab dolon irde hinayin,” inyiñ. ²⁵ Irkeb

* **4:20:** Dugu gote denembe Grisim dugu.

bere goreb, “Mesaia gobe wayyen yen nurde hime. Yen belen gab ge belen yen ha kurun goyen min kenkela bebak diryen,” inyin. Mesaiabe Kristu inen hanyen. ²⁶ Be, bere gore gwaha inkeb Yesu belen wol henbe, “Go al gobe mere girde hi al gago,” inyin.

²⁷ Be, Yesu belen bere goya mere ten hikeb komatmin yago goyen mulgan hen wan yenenbe dilin fot yamin. Goyenbe al kura belen, “Da nin nurde ha?” inen kurabe, “Danin bere ga mere irde ha?” inen gusunan ma iramin. ²⁸ Be, bere gobe fe fard fard kuwemin goyen gor po tubul tenbe mulgan hen taunde kunbe al momon yirdeb, ²⁹ “Al kura ne mata ten himyen kurun goyen momon nirde pasi wor po hihi. Yenbe Mesaia wet kura nin, wan kennan!” yinyin. ³⁰ Irkeb mel go Yesu kinnin yen kwamin.

³¹ Goya goyenbe komatmin belen, “Rabai, bingge ga kura nawa be,” inamin. ³² Irkeb wol henbe, “Nebe bingene yan goyen den go ma nurde han,” yinyin. ³³ Gwaha yinkeb komatmin yago goyen, “Al kura belen bingge kura wet yawan una?” yenbe kadam gusunan gird tiyamin. ³⁴ Irkeb Yesu belen, “Nere bingebe nad nerke wamin al gote dufay kenkela gama irdeb meten nunyin goyen ten tukun pasi iren gogo. ³⁵ Irdeb dende mere kurabe, ‘Gagasi sipte po henbe sak nana hiyyen,’ yen hanyen. Goyenbe diltin nankenen Al kurunyen metende bingge ep hahan ga yenan. Bingebe yad yadi yertek hahan. ³⁶ Al bingge yade yadi yiryen al gobe meten tiyyen gote murungem tiyyen. Bingge yad yiryen gobe

alya bereya Al Kurunya huginēn hitek gasunde yukuyen go gwahade goyen. Gogab meten hard hard al goya bingē yad yad al goya tumnande aman hiriryen. ³⁷ Ningeb mere kura, ‘Al kura belēn bingē haryen. Irkeb al kura belēn bingē yade yadi yiryen,’ yitiŋ gobe fudinde yen nurde hime. ³⁸ Nebe deŋ belēn bingē ma hartin metende gor niŋ bingē yawarnayin yen hulyan dirmin. Al hoyan belēn meten kurun po titin gote iginenbe deŋ belēn yade han gago,” yinyin.

³⁹ Be, Samaria niŋ alya bereya taun goyenter niŋbe bere gore kun, “Al goreb ne mata ten himyen kurun goyen momon nirde pasi hihi,” yinyin geb, Yesu niŋ dufaymin sanin iramin. ⁴⁰ Ningeb mel gore wanbe, “Nenya gar hiniŋ,” inkeb yenya wawun irawa gor heŋ saba yirde hinhin. ⁴¹ Irkeb al budam Yesu niŋ dufaymin taren iramin. ⁴² Irdeb bere goyen, “Hanƙapya nenbe ge belēn mere momon diran goke dufayniniŋ yen ge taren irtin. Goyenpoga hanƙabe nindiken kirmininiŋde wor po meremin niŋ alya bereya Yumulgan ten ten Al yen nurhet,” inamin.

Yesu belēn doyan al kura gote urmin sope iryin

⁴³ Be, Yesu go gor heŋ wawun irawa hubu hekeb mel go yubul ten Galili nanare kurin. ⁴⁴ Kun henyabe Yesu belēn yingen ge yen, “Al Kuruyen mere basan marbe nanamde niŋ mar belēn palap ma yirde hanyen,” yirin. ⁴⁵ Be, Galili niŋ marbe Pasoba gabu kurun nalure Yerusalem kun gor Yesu mata ten hinhin goyen kenamin geb,

yeŋ waŋ forok yekeb aman heŋ hoy irde gargar iramiŋ.

⁴⁶ Yesube sopte po Galili naŋa bana goŋ niŋ taun kura Kana, fe gergeŋ tigiri tike wain hiriŋde gor kuriŋ. Gorbe naŋa gote doyaŋ al kuruŋde meten al kura gor hinhin. Goyenbe al gote urmiŋbe Kapeneam taunde gor garbam buluŋ po heŋ yamiŋde firtiŋde po hinhin. ⁴⁷ Doyaŋ al gobe Yesu go Yudia naŋare mat Galili forok yihi mere momoŋ go nurdeb yeŋ hitte kuŋ urmiŋ kamtek binde po hiriŋ goyen waŋ sope irwoŋ yeŋ esen mere iryiŋ. ⁴⁸ Irkeb Yesu beleŋ wol heŋbe, “Deŋbe dulheŋ epte ma wor po dufaytiŋ ne niŋ saŋiŋ irnayiŋ. Mata tiŋeŋ kurayen kurayen Al Kuruŋ beleŋ po ga yirtek goyen yeneŋ gab ne niŋ dufaytiŋ tareŋ irnayiŋ,” inyiŋ. ⁴⁹ Irkeb al goreb, “Doyaŋ al, urne kamyenkek geb, wake kure,” inyiŋ. ⁵⁰ Irkeb wol heŋbe, “Urgebe igiŋ hiyyeŋ. Go ma kamyen geb, igiŋ ge kwa,” inyiŋ. Irkeb al gobe Yesuyen mere goyen fudiŋde yeŋ nurdeb yamiŋde kuriŋ. ⁵¹ Be, al go hako kuŋ hikeyabe meten marmiŋ beleŋ waŋ belen keneŋbe, “Urgebe igiŋ hiyuŋ!” inamiŋ. ⁵² Irkeb al goreb da nature wor po garbam go urmiŋ tubul tiyuŋ goke gusuŋaŋ yiryiŋ. Irkeb, “Urgebe ki naŋa bul irde naŋa diliŋ uŋkureŋ gwahade hekeya garbam tubul tiyuŋ,” inamiŋ. ⁵³ Gwaha inkeb diriŋ gote naniŋ goyen Yesu beleŋ, “Urgebe igiŋ hiyyeŋ, go ma kamyen,” inyiŋ mere gobe naŋa diliŋ goyenter wor po ninuŋ yeŋ bebak tiyyiŋ. Irdeb yenya yamiŋde haŋyen mar gobe tumŋaŋ Yesu niŋ dufaymiŋ tareŋ iramiŋ.

⁵⁴ Be, Yesube Yudia nançare mat Galili nançare wañ mata tinen sopte hoyan kura iryin gobe gogo doyan al gote urmin sope iryin.

5

Yesu belen al garbam minyan kura Betesida fe ala sinakde hinhin goyen sope iryin

¹ Be, Yesube hinhin, irde nalu kura kuke gab Yuda marte gabu nalu kurun kura forok yekeb Yerusalem kurin. ² Yerusalem binde gonbe fe ala kura al po taltin Yuda marte mere mat Betesida inen hanjen goyen hinhin. Fe ala gobe hora koya kurun taun go milgu irtinde yame kura Sipsipyen Yame inen hanjen goyen bindere hinhin. Irde ya kawan yulyanen kura siptesonon goyen fe ala go sinakan hinhan. ³⁻⁴ Gorbe al garbam minyan karim ma wañ ya kawan bana gon hinhan. Dilin titmin, kahan nonbo hitinyabe ulin kamtin yagoya goyen budam wor po wañ gor hinhan.*

⁵ Be, al kura dama 38 gayen garbam hitinde po hiyen goyen wor gor hinhin. ⁶ Be, Yesu belen gor kun al goyen firtinde gwahade hike kenenbe al gobe sobamde po bulunen gahade hiyen yen nuryin. Irdeb, “Igin hemewon yen nurde ha we?” inyin. ⁷ Irkeb garbam al goreb, “Doyan al, fe ugala tike al gore kura faran nurde nad fete nertek mon. Ningeb hako ga kurke yen kurut yen

* **5:3-4:** Asan hoyandebe gahade hi: 4 Irdeb gise hanjka Doyan Al Kurunen miyon belen fe binde go katen fe korom irde hiyen. Ningeb miyonmin gore katen fe go korom irke al kura yen wa solok yen fe binde kurkuyenbe garbamin dahade gobe goya po hubu hiyen.

himekeb al hoyan belen wa mehen hen kurkun hanyen,” inyin. ⁸ Irkeb Yesu belenbe al goyen, “Huwarade gasunje sope irde ten kwa,” inyin. ⁹ Irkeb goyare po al gobe igin hirin. Irdeb huwarade gasunmin sope irde ten kurin.

Be, mata gobe Sabat nalure forok yirin. ¹⁰ Ningeb Yuda marte doyan mar belen al igin hirin al goyen, “Sabat nalure detge yade kun ha gobe Moseyen sabarebe utan irtin goyen ten han geb,” inamin. ¹¹ Irkeb al gore wol henbe, “Sope nira al goreb, ‘Huwardeb detge ten kwa,’ nina,” yinyin. ¹² Irkeb mel goreb, “Gobe ganun al belen wor po gwaha gina?” inen gusunan iramin. ¹³ Goyenbe Yesube al buda kurun bana gon isal po uryin geb, al garbam minyan igin hirin goreb al goyen yen bebakken ma nuryin.

¹⁴ Be, kamebe Yesu belen Al Kurunyen ya balem bana gor al go kenenbe, “Ga nura ko. Igin hawan geb, sopte mata bulun ma tiyayin. Monjo det bulun wor po girtek kura forok yen gunyen geb,” inyin. ¹⁵ Irkeb al gobe Yuda marte doyan mar hitte kunbe, “Yesu belen sope nirun,” yinyin.

¹⁶ Be, Yesu gob Sabat nalure mata gwahade tiyyin geb, Yuda marte doyan mar belen bulun bulun iramin. ¹⁷ Irkeb Yesu belen wol henbe, “Adonebe meten titinde po hiyen. Gayenter wor meten ten hi. Ningeb ne manan gago meten ten hime,” yinyin. ¹⁸ Gwaha yekeb mel Yuda marte doyan mar goreb daha mat kura mayteke kami yen kurut wor po yen hinhan. Gobe Sabat naluyen saba ma gama irde hiyen goke po mon. Al Kurun wor neya tunande, irde Adone nigen

yeŋ hiyen goke manan iŋi ma nurdeb gogo mayniŋ teŋ hinhan.

¹⁹ Be, Yesu belen gahade wol hiriŋ: “Fudinde diniŋ hime. Urmiŋbe yiŋgeŋde saŋiŋde epte ma det kura iryeŋ. Naniŋ belen mata kura teŋ hikeb Urmiŋ wor goyen po teŋ hi. Niŋgeb yeŋbe Naniŋ belen mata kura teŋ hike keneŋbe goyen po teŋ hiyen. ²⁰ Naniŋbe Urmiŋ goyen bubulkunne wor po yeŋ nurdeb yeŋ mata teŋ hiyen kurun gob Urmiŋ ikala irde pasi heŋ hiyen. Fudinde deŋbe haŋka mata kenhan gate folek Al Kurun belen Urmiŋ ikala irkeb yeŋ belen kawan forok yiryen. Irkeb deŋ belen yeneŋbe ditiŋ fot yenayiŋ. ²¹ Naniŋ belen al kamtiŋde mat yisaŋ heŋ hiyen gwahade goyen po, Urmiŋ wor al kura Al Kurunya hugiŋeŋ heŋ heŋ goyen une yeŋbe iŋi ala po unyeŋ. ²² Irde Naniŋ yiŋgeŋbe al merem yaŋ ma yirde hiyen. Goyenpoga al merem yaŋ yird yird metenbe Urmiŋ haniŋde kiryiŋ. ²³ Gogab al belen Naniŋ turun irde hanŋen gwahade goyen po Urmiŋ wor turun irde hinayiŋ. Al kura Al Kurun Urmiŋ ma turun irde hiyeŋbe teŋ kerke wayyiŋ al Naniŋ wor turun ma irde hiyen.

²⁴ “Fudinde wor po diniŋ hime, al kura merene gayen nurde nad nerke katmiriŋ al goke du-faymiŋ tareŋ iryeŋbe yeŋya hugiŋeŋ heŋ heŋ goyen tenayiŋ. Irdeb yeŋ diliŋde merem yaŋ ma henayiŋ. Go mar gobe hugiŋeŋ kamde kamde mata goyen fole irde Al Kurunya hugiŋeŋ heŋ heŋ mata goyen miŋyaŋ henayiŋ. ²⁵ Fudinde wor po diniŋ hime, nalu kura forok yeweŋ tiya. Go

nalu gobe gago forok yihi. Niñgeb Al Kurun ma nurde unenbe yeñ diliñde al kamtiñ yara hanjen mar goyen Al Kurun Urmiñde mere nurnayin. Irde nurde yeñ ge dufaymin taren irdeb yeñya hugiñen hinayin. ²⁶ Naniñ yinjenbe al belen yeñya hugiñen heñ heñ mata gote miñ al. Gwahade goyen po Urmiñ wor Naniñ belen hugiñen heñ heñ mata gote miñ al iryin. ²⁷ Irdeb yeñbe Al Urmiñ geb, alyen mata iginya bulunya pota yird yird sañin goyen manañ unyin.

²⁸ “Be, al kamtiñ tumñan Urmiñde melak nurdeb metemiñde mat huwarnayin nalu go wañ hi geb, goyen goke hurkunkat ma tinayin. ²⁹ Al mata igin igin teñ hitin marbe huwarde Al Kurunya hugiñen hinayin. Munañ al mata bulun bulun teñ hitin marbe kamtiñde mat huwarkeb merem yañ yiryen. ³⁰ Nigen tarenbebe epte ma daha wet kura tiyen. Alyen mata iginya bulunya yinen himyen gobe Al Kurun belen al gobe gwahade ninke po gabe igin ma bulun yinen himyen gogo. Nebe dufayner ma mata teñ himyen. Nad nerke wamirin al gote dufay po gama irde gwaha teñ himyen. Niñgeb meten teñ himyen gabe huwak geb,” yinyin.

Al hoyan wor Yesube ganun goyen tagalamin

³¹ Be, Yesu belen sopte po gaha yinyin: “Nebe nigen ge yeñ nebe al goyen yewenbe merene gobe fudinde moñ yenayin. ³² Goyenbe ne niñ heñ mere tagalde hiyen al kura hi. Al gore ne niñ tagalde hiyen gobe fudinde yeñ nurde hime. ³³ Deñbe Yon Baptais belen ne niñ dahade kura yeke nurtek yeñ al hulayan yiran. Irkeb

yeŋ beleŋ ne niŋ mere fudinde diruŋ. ³⁴ Nebe al beleŋ ne niŋ heŋ tagalwoŋ yeŋ ma nurde hime. Goyenpoga Yon Baptais beleŋ ne niŋ heŋ tagalde hi goke momoŋ dirde hime gobe deŋ beleŋ ne niŋ dufaytiŋ tareŋ irkeb Al Kuruŋ beleŋ dumulgaŋ tiwoŋ yeŋ nurdeb gago momoŋ dirde hime. ³⁵ Yonyen merebe hulsi kura melak heŋ agat urtiŋ yara alyen dufay wuk irde hinhin. Irkeb deŋbe sobamde ma meremiŋ goke amaŋ heŋ hinhan. ³⁶ Goyenbe metenŋ teŋ himyen gabe Yon beleŋ ne niŋ heŋ tagalde hiyen gote folek. Metenŋe gabe Nanne beleŋ gwaha teŋ pasi irayiŋ ninenŋbe nunyiŋ. Niŋgeb metenŋe gareb fudinde Nanne beleŋ nad nerke wamiriŋ goyen al yikala yirde hi. ³⁷ Irdeb Nanne nad nerke wamiriŋ al gore wor yiŋgeŋ mohonŋe ne niŋ tagaltiŋ hi. Goyenpoga deŋbe melak muŋ kura ma nurde, yeŋbe al gwahade yeŋ ma keneŋ haŋyen. ³⁸ Irde ne niŋ dufaytiŋ saŋiŋ ma irde haŋ geb, nad nerke wamiriŋ al gote merebe bitiŋde ma hi.

³⁹ “Be, Al Kuruŋyen asaŋbe deŋ beleŋ mali ma kapyan heŋ haŋyen. Kenkela kapyan hetek gab goreb Al Kuruŋya hugiŋeŋ hitek gobe nende hiyyeŋ yeŋ nurdeya kapyan heŋ haŋyen. Goyenbe asaŋ gobe ne niŋ katiŋ haŋ. ⁴⁰ Niŋgeb ne hitte wanayiŋbe Al Kuruŋya hugiŋeŋ hitek goyen dende hewoŋ gega, ne hitte waŋ waŋ niŋ bada heŋ haŋ.

⁴¹ “Nebe al beleŋ turuŋ nirnaŋ yeŋ ma nurde hime. ⁴² Irde deŋ gayen al dahade yeŋ nurd duneŋ hime. Bitiŋ banabe Al Kuruŋ niŋ fudinde wor po amaŋeŋ nurd nurdbe hubu wor

po. ⁴³ Nebe Adone belen hulyañ nirke wañ tareñminde metenñ tej himyen gega, denbe pel po nirde hañ. Goyenbe al kura wañ yingende tareñde po metenñ tej hikeb gargar irnayiñ. ⁴⁴ Denbe kadtin belen turun dird dird niñ po nurde hanñyen. Gega Al Kurun unñkurenñ gore turun dird dird niñ muñ kura ma nurde hanñyen. Niñgeb den belen gwaha tej hinayinbe dahadem dufaytinñ ne niñ sañiñ irnayiñ? Epte moñ geb.

⁴⁵ “Goyenbe ne belen Adone hitte merem yañ diryenñ yeñ ma nurnayinñ. Merem yañ dirtek albe Mose geb. Denbe yeñ ge hekkenñ nurde hanñyen gega, yeñ gore po merem yañ diryenñ geb. ⁴⁶ Yeñ belen gab asañmindebe ne niñ kayyinñ. Niñgeb den gayen yeñ ge fudinde hekkenñ nurde hanñyen manhan ne niñ dufaytinñ tareñ irwoñ. ⁴⁷ Goyenbe mere kayyinñ goke dufaytinñ tareñ ma irde hañ geb, daha matbe ne mere tej hime gayen fudinde yeñ nurnayinñ? Epte moñ,” yinyiñ.

6

Al 5,000 binje paka yiryiñ

(Matiyu 14:13-21; Mak 6:30-44; Luk 9:10-17)

¹ Be, go kamereb Yesube Galili nañare kuriñ. Kuñbe Galili fe ala kurun goyen siña kurhan kuriñ. Galili fe ala kurun gote denjem kurabe Taiberias. ² Be, al budam Yesu belen garbam mar sope yird yird mata tinenñ karkuwanñ forok yirke yenaminñ geb, yeñ po gama irde kwaminñ. ³ Irkeb Yesu gob dugu dabayinñde kura gor hurkuñbe komatminña keperde usañ haminñ. ⁴ Be, Yuda

marte gabu nalu kurun kura Pasoba goyen binde binde hej hinhin.

⁵ Be, Yesu gob al buda kurun go yej hitte po wan hike yinyin. Irdeb Filip goyen, “Beretbe damde kun damu tej yuntek?” inyin. ⁶ Go inyin gobe yingenbe gwaha tiyen yej nurd nurd ga Filip goyen dulin tunan ure yej gusanan iryin. ⁷ Irkeb Filip belej wol henbe, “Al tunan beret mun kura netek gobe nejan bana al kura gagasi ⁸ gayen meten tej hora tiyyen gore wor epte ma diryen,” inyin. ⁸ Gwaha yekeb komatmin kura Andru, Saimon Pita kulin belej hardeb, ⁹ “Dirin kura beret muknen siptesonon bali bilmin karka tej palawa yara irtin gore po yirtin goya makan dapna irawaya minyan bana gan hi. Goyenbe go mun goreb al buda kurun gayen daha yiryen?” inyin. ¹⁰ Irkeb Yesu belej wol henbe, “Al buda ga yinke kepernan,” yinyin. Irkeb gorbe yamun budam hinhande geb, goyan keperde tukamin. Al gabu iramin gobe 5,000 gwahade. ¹¹ Be, Yesu belej beret muknen siptesonon go yade Al Kurun turun irde al buda keperamin mar goyen gale hej yunke nene ep namin. Irde makan dapna irawa goyen wor yade gwahade po yiryin.

¹² Be, nene ep neke yenenbe Yesu belej komatmin goyen yinyin. “Beret ep nene yubul tahan ga buda yirnan. Kura mun yubul tike bulun ma henayin,” yinyin. ¹³ Irkeb beret muknen siptesonon namin mar gore ep nene yubul tiyamin goyen buda yirde tiri ¹² gayen makin yiramin. ¹⁴ Be, al buda gobe Yesu belej mata tinen kurun goyen irke kenenbe, “Fudinde, al gabe Al Ku-

runyen mere basan Al kame megen gar wayyen yitiŋ al go goyenbe gago!” yamiŋ. ¹⁵ Goyenbe Yesube mel gore waŋ parsay irde yende Doyaŋ Al Kurun irniŋ teŋ hike nurdeb gor matbe bal heŋ yeŋ unŋkureŋ po dugure hurkuriŋ.

Fe hende huwarde kuriŋ

(Matiyu 14:22-33; Mak 6:45-52)

¹⁶ Be, ŋumtuk ureŋ tikeb Yesuyen komatmiŋ yagobe dugu dabayiŋde mat mulgaŋ heŋ Galili fe ala siŋare kurkamiŋ. ¹⁷ Irdeb gor mat Galili fe ala kurun goyen siŋa kurhan Kapeneam beleŋ kuniŋ yeŋ hakwa hende hurkunbe kuŋ hinhan. Gega Yesube mel goya ma kwamiŋ. Be, hako kuŋ hikeyabe kidoma hiriŋ. ¹⁸ Irdeb meŋe kurun tike duba huwariŋ. ¹⁹ Be, mel gobe 5 ma 6 kilomita gwahade kwamiŋ. Irkeb Yesu forok yeŋ fe yuwalheŋ hende huwarde hakwa go tur po wayyiŋ. Waŋ hike keneŋbe kafura wor po hamiŋ. ²⁰ Goyenbe Yesu beleŋ, “Ne waŋ hime ge, kafura heŋ ma,” yinyiŋ. ²¹ Irkeb aman heŋde Yesu faraŋ urke hakwa biŋde hurkuriŋ. Irkeb gor kuniŋ yeŋ kuŋ hinhande gor bemel po forok yamiŋ.

²² Be, ferd fay uryiŋ goya goyenbe al buda fe ala siŋa kurhan Yesu beleŋ yubul tiyyiŋ marbe gor po hinhan. Mel gore hakwa gor ma hike keneŋbe, “Kibe hakwa unŋkureŋ goyen po gar hinhin gobe Yesuyen komatmiŋ beleŋ teŋ kwan. Gega Yesube yenya tumŋaŋ ma kwan,” yamiŋ. ²³ Be, Doyaŋ Al Kurun beleŋ beret teŋ Al Kurun turun irde al buda go gale heŋ yunke namiŋ gasuŋ bindere gor Taiberias mat hakwa buda kura waŋ forok yamiŋ. Irkeb mel gore Yesube gor

wet hi yeŋ kuŋ naŋkenamiŋ. ²⁴ Goyenbe hakwa bana goŋbe Yesu ma komatmiŋ gwahade muŋ kura ma keneŋbe Yesu niŋ naŋkinniŋ yeŋ hakwa go hende Kapeneam kwamiŋ.

Yesube Al Kurunya hugiŋeŋ heŋ heŋ gote saniŋ miŋyaŋ

²⁵ Be, al buda gobe fe ala goyen siŋa kurhan mat waŋbe Yesu kenamiŋ. Irdeb, “Rabai, daha naŋa gar wayaŋ?” ineŋ gusuŋaŋ iramiŋ. ²⁶ Irkeb wol heŋbe gaha yinyiŋ: “Fudinde wor po dinen hime, deŋbe mata tiŋeŋ Al Kurun beŋeŋ po ga irtek goyen keneŋ miŋ bebak ma tenya ne niŋ naŋkeneŋ haŋ. Beret nene bitiŋ maŋiŋ iran goke po teŋ ne niŋ naŋkeneŋ haŋ. ²⁷ Megen niŋ biŋge buluŋ hetek goke ma meten teŋ hinayiŋ. Nene Al Kurunya hugiŋeŋ hitok biŋge goke po meten teŋ hinayiŋ. Biŋge gobe ne Al Urmiŋ gare duneŋ. Biŋge goyen duneŋ duneŋ meten gobe Adone beŋeŋ basiŋa nirde nunyiŋ,” yinyiŋ. ²⁸ Gwaha yinkeb mel goreb, “Niŋgeb daha wor po teŋbe Al Kurun beŋeŋ meten goke nurde hi goyen titek?” ineŋ gusuŋaŋ iramiŋ. ²⁹ Irkeb wol heŋbe, “Deŋ beŋeŋ Al Kurunyen meten titek gobe yeŋ beŋeŋ teŋ kerke wayuŋ al goke dufaytiŋ tareŋ irnayiŋ gogo,” yinyiŋ. ³⁰ Irkeb, “Gwahade kenem mata tiŋeŋ dahade goyen irke keneŋ gabe ge niŋ dufayniniŋ tareŋ irtek? Niŋgeb daha tiyayiŋ? ³¹ Hakot wor po asininiŋ yago sawsawa naŋa bana hinhanyabe biŋge ‘mana’ ineŋ haŋyen goyen nene hinhan. Goyen goke Al Kurunyen asaŋde, ‘Al Kurunyen gasuŋde niŋ biŋge yeŋ beŋeŋ mel go yunke namiŋ,’ gwahade

katiŋ hi,” inamiŋ. ³² Gwaha inkeb Yesu beleŋ wol heŋbe, “Fudinde wor po deneŋ hime, Al Kurunyen gasuŋde niŋ biŋge katke namiŋ gobe Mose beleŋ ma yunyiŋ. Biŋge yunyiŋ albe Adone geb. Irde gayenter wor biŋge fudinde duneŋ hi al gobe Adone. ³³ Al Kurunyen gasuŋde niŋ biŋgebe yeŋ hitte mat katuŋ al gogo. Yeŋ beleŋ po gab alya bereya megen haŋ kuruŋ gayen Al Kurunya hugiŋeŋ heŋ heŋ goyen yuneŋ hiyen,” yinyiŋ. ³⁴ Irkeb mel gore, “Doyaŋ al, haŋka matbe biŋge goyen hugiŋeŋ hugiŋeŋ duneŋ hayiŋ,” inamiŋ.

³⁵ Irkeb wol heŋbe gaha yinyiŋ: “Nebe Al Kurunya hugiŋeŋ hitek biŋge fudinde go goyen. Niŋgeb al kura ne hitte waŋ dufaymiŋ ne niŋ saŋiŋ iryeŋ al gobe biŋge ma kamde fe niŋ ma irde hiyeŋ go gwahade goyen po Al Kurunya hugiŋeŋ heŋ heŋ tareŋ gobe hubu ma hiyyeŋ. ³⁶ Goyenbe dinhem gwahade po, deŋbe ne gayen neneŋ haŋ gega, dufaytiŋ ne niŋ tareŋ ma yirde haŋ. ³⁷ Al tumŋaŋ Nanne beleŋ ne niŋ nuntiŋ mar gobe ne hitte wanayiŋ. Irkeb al ne hitte wanayiŋ mar gobe kura muŋ takira ma tiyeŋ. ³⁸ Nebe Al Kuruŋ hitte mat katmiriŋ gobe dufayne gama irde meten tiye yeŋ ma katmiriŋ. Gwahade yarabe nad nerke katmiriŋ al gote dufay po gama irde meten tiye yeŋ katmiriŋ. ³⁹ Niŋgeb ne niŋ nuntiŋ mar gobe uŋkureŋ muŋ kura tubul timeke pel ma hiyyeŋ. Gwaha irtineŋbe nalu funaŋde mel go tumŋaŋ yisaŋ heŋ al gergeŋ wor po yireŋ. Go tiyeŋ gobe nad nerke katmiriŋ al gote dufay geb, go po gama ireŋ. ⁴⁰ Nanner dufaydebe al tumŋaŋ diliŋbe Urmiŋ hende po irde yeŋ ge po

dufaymiñ taren irnayiñ marbe yenya hugiñen hinayiñ. Irkeb nalu funañdebe ne belen mel go yisañ hewen,” yinyiñ.

⁴¹ Be, Yesu belen yingen ge yen, “Nebe biñge fudinde Al Kurun hitte mat katmiriñ,” yeke nurdeb Yuda mar gore Yesu niñ igiñ ma nurde siksiksuk tiyamiñ. ⁴² Irdeb, “Al gabe Yosep urmiñ Yesu moñ? Naniñya miliñyabe nurde yunen hite. Goyenbe dahade niñgeb yingen ge yen, ‘Nebe Al Kurun hitte mat katmiriñ,’ yen hi? Mere gobe kukuwamnen wor po!” yamiñ.

⁴³ Irkeb Yesu belen, “Merene goke igiñ ma nurde siksiksuk ten hañ gobe bada henan. ⁴⁴ Al kura yingen epte ma ne hitte wanayiñ. Nanne nad nerke wamiriñ al gore gab bul yirke ne hitte wanayiñ. Irkeb nalu funañdebe go mar gobe ne belen kamtiñde mat yisañ hewen. ⁴⁵ Al Kurunyen mere basañ mar porofet buda belen asañde, ‘Al Kurun belen mel goyen tumñan saba yiryen,’ katiñ hi gwahade goyen po, al kura Adoner mere nurde sabamiñ bebak tinayiñ mar gobe tumñan ne hitte wanayiñ. ⁴⁶ Al kura Nanne ma kintiñ. Goyenpoga ne yen hitte mat watiñ al gare po ga kintiñ. ⁴⁷ Fudinde wor po diniñ hime, al kura ne niñ dufaymiñ sañiñ irnayiñbe Al Kurunya hugiñen hinayiñ. ⁴⁸ Niñgeb al belen nene Al Kurunya hugiñen hitek biñge gobe ne gago. ⁴⁹ Asetiñ yagobe sawsawa po kurun nana bana kuñ henya biñge ‘mana’ inen hanjen goyen nene hinhan gega, tumñan kamamiñ. ⁵⁰ Goyenbe biñge fudinde Al Kurun hitte mat kattin gobe gar hi. Al kura biñge go niyyenbe Al Kurun diliñde

al kamtiŋ yara ma hiyyeŋ. ⁵¹ Nebe al belen nen Al Kurunya hugiŋeŋ hitekde niŋ biŋge Al Kurun hitte mat kattin goyen. Niŋgeb albe biŋge nene gabe tareŋ heŋ hanyen gwahade goyen po, ne niŋ dufaymin tareŋ irnayeŋ marbe Al Kurunya hugiŋeŋ hinayeŋ. Biŋge gobe ne gago. Alya bereya megen haŋ kurun gayen Al Kurunya hugiŋeŋ hinayeŋ goke teŋ nigeŋ gasonne yuneŋ,” yinyeŋ.

⁵² Be, Yesu belen gwaha yinkeb Yuda mar goyen mere tiyyin goke teŋbe, “Al gab dahadem yinŋeŋ gason dunke netek?” yeŋbe yinŋeŋ bana goŋ bipti forok irde yinŋeŋ ulin kadom mohonde tiyamin. ⁵³ Irkeb Yesu belen yinyeŋ. “Fudinde wor po dineŋ hime, ne Al Urmin gate gasonneya darineya ma nenayeŋbe Al Kurunya hugiŋeŋ heŋ heŋ gobe epte ma dende hiyyeŋ. ⁵⁴ Munan al kura gasonneya darineya niyyeŋ al gobe Al Kurunya hugiŋeŋ heŋ heŋ gobe yende hiyyeŋ. Irkeb nalu funandeb al gobe isan heweŋ. ⁵⁵ Gasonnebe nene Al Kurunya hugiŋeŋ hitek biŋge wor po, irdeb darine wor nene Al Kurunya hugiŋeŋ hitek fe wor po go goyen. ⁵⁶ Niŋgeb al kura gasonneya darineya niyyeŋ al gobe neya hireŋ. Irkeb ne wor yeŋya hireŋ. ⁵⁷ Adone gwahader hitin al gore nad nerke megen gar katmirin. Irde yende saninde ne wor hugiŋeŋ heŋ heŋ tareŋnem yan hime. Niŋgeb al kura gasonne niyyeŋ al gobe tareŋner Al Kurunya hugiŋeŋ hiriryen. ⁵⁸ Nebe biŋge Al Kurun hitte mat kattin go goyen. Asetin yagobe biŋge ‘mana’ inen hanyen goyen nene hinhan gega, kun kunbe kamamin. Goyenbe al

kura ne binje yeŋ hime gayen niyyeŋ al gobe Al Kurunya hugiŋeŋ hiriryen,” yinyiŋ. ⁵⁹ Be, mere gabe Kapeneam taun bana Yuda marte gabu yare al saba yirde henya tiyyiŋ.

Yesuyen komatmiŋ yago budam tubul teŋ kwamiŋ

⁶⁰ Be, sabamiŋ go nurdeb Yesuyen komatmiŋ yago kura beleŋ, “Saba gabe epte ma bebak titek, meteneŋ wor po. Ganuŋ beleŋ epte nurde gama iryen?” yamiŋ. ⁶¹ Irkeb Yesu go komatmiŋ yago goyen yiŋgeŋ uliŋ mere goke ŋagak yeŋ hike nurdeb, “Merene gare dufaytiŋ haga ira? ⁶² Gwahade kenem kame ne Al Urmiŋ gayen bikkeŋ hinhemde mulgaŋ heŋ hurkumeke neneŋbe dahade nurnayiŋ? ⁶³ Al Kuruŋ diliŋde al gergeŋ ird ird gobe Holi Spirit beleŋ po ga iryen. Megen niŋ marte saŋiŋde epte ma gwaha irnayiŋ. Merene gayen al kura beleŋ fudiŋde yeŋ nuryeŋbe Holi Spirit beleŋ al goyen Al Kuruŋ diliŋde gergeŋ wor po iryen. ⁶⁴ Goyenbe kuratiŋ kurabe merene gayen fudiŋde yeŋ ma nurde haŋ,” yinyiŋ. Gwaha yinyiŋ gobe meteneŋmiŋ miŋ urde komatmiŋ yawaryiŋde mat po ganuŋ beleŋ yeŋ ge dufaymiŋ tareŋ ma irnayiŋ, irde ganuŋ beleŋ asogom haniŋde kiryen goyen keŋkela nurde hinhin geb, gogo yinyiŋ. ⁶⁵ Irdeb sopte yinyiŋ. “Kuratiŋ kura beleŋ merene pel irnayiŋ goke teŋbe, ‘Al kura yiŋgeŋ epte ma ne hitte wanayiŋ, Nanner tareŋde po ga ne hitte wanayiŋ,’ dinhem gogo,” yinyiŋ.

⁶⁶ Be, mere go yiriŋde matbe komatmiŋ yago budambe gama ird ird niŋ bada hamiŋ. ⁶⁷ Irkeb

Yesu belen komatmiŋ 12 goyen, “Deŋ manan nubul tiniŋ yeŋ nurhaŋ?” yineŋ gusuŋaŋ yiryiŋ. ⁶⁸ Irkeb Saimon Pita belen wol heŋbe, “Doyaŋ Al Kuruŋ, ge po ga al belen nurde Al Kuruŋya hugineŋ hitek merege yaŋ geb, gubul teŋ ganuŋ hitte kutek? ⁶⁹ Irde gebe Al Wukken wor po Al Kuruŋ hitte mat wayariŋ yeŋ nurde dufayniniŋ saŋiŋ irde hite, irde gebe fudinde al gwahade yeŋ nurde gunen hite,” inyiŋ. ⁷⁰ Irkeb Yesu belen wol heŋbe, “Deŋ komatne 12 gayenbe nigen po basaŋa dirmiŋ. Goyenpoga kuratiŋ kurabe Satanyen dufay gama irde hi geb!” yinyiŋ. ⁷¹ Gobe Yudas, Saimon Iskariot urmiŋ niŋ nurdeb gogo yiriŋ. Yeŋbe Yesuyen komatmiŋ 12 bana hinhin gega, kamebe yeŋ belen Yesu goyen asogom haniŋde kiryiŋ.

7

Yesube gabu nalu kuruŋ kura “Ya Kawan Heŋ Heŋ” inen hanŋen goke Yerusalem hurkuriŋ

¹ Be, Yuda marte doyaŋ mar Yudia naŋare hanŋen goreb Yesu mayniŋ yeŋ yeŋ ge doyaŋ heŋ hinhin. Niŋgeb Yesube go nurdeb kamde kamde nalumiŋbe hako hinhin geb, Yudia naŋa belen kutek ma iryiŋ. Irkeb Galili naŋa bana goŋ po heŋ kuŋ hinhin. ² Goyenbe Yuda marte gabu nalu kuruŋ kura “Ya Kawan Heŋ Heŋ” inen hanŋen goyen forok yetek binde heŋ hikeb ³ Yesu kuliŋ yago belen, “Naŋa ga tubul teŋ Yudia naŋare kwa ko. Gogab mata tiŋen turuŋ yaŋ wor po forok yirde hayen goyen gor niŋ komatge yago wor yennayiŋ. ⁴ Al kura al budam belen nurd nunwon

yeŋ goya banare ma mata teŋ hiyen geb. Gebe mata tiŋeŋ turŋuŋ yaŋ forok yirde hayen geb, naŋa kurunŋ gayen bana gebe al gwahade yeŋ alya bereya yikala yirde kuŋ hayiŋ,” inamiŋ. ⁵ Yesu kuliŋ yago yiŋgeŋde wor yeŋ ge dufaymiŋ taren muŋ kura ma iramiŋ geb, gogo gwaha inamiŋ.

⁶ Goke teŋbe Yesu beŋeŋ wol heŋbe, “Gwaha teŋ teŋ nalunebe hako geb. Munanŋ deŋ hittebe nalu kurunŋ gabe igiŋ ala po. ⁷ Megen niŋ marbe epte ma deŋ haram dirnayiŋ. Goyenbe nebe yeŋ mata teŋ hanŋ gobe buluŋ teŋ hanŋ yeŋ hugiŋeŋ yineŋ himyen geb, goke igiŋ ma nurd nuneŋ hanŋ. ⁸ Niŋgeb deŋbe igiŋ niŋ gabu nalu kurunŋde gor kuranŋ ko. Nere kuŋ kuŋ nalu wor pobe hako geb, nalune forok yeke gab hurkenŋ,” yinyiŋ. ⁹ Be, Yesu go gwaha yineŋbe Galili gor po hinhin.

¹⁰ Irkeb kuliŋ yagobe Yesu go gor po tubul teŋbe Yerusalem kwamiŋ. Gega Yesu wor kame gab balmiŋ hurkuriŋ. ¹¹ Be, gabu nalu kurunŋ goyenter Yuda marte doyanŋ mar beŋeŋ yeŋ ge nanŋkeneŋbe, “Al gobe dare hi?” yeŋ gusuŋanŋ heŋ hinhan.

¹² Be, Yerusalem al gabu iramiŋ bana kurunŋ gob yeŋ ge sisure tagaltiŋ ala teŋ hinhan. Kura beŋeŋbe, “Yeŋbe al igiŋ,” yekeb, kura beŋeŋ, “Moŋ, yeŋ beŋeŋ al usi yirde hi,” yeŋ hinhan. ¹³ Goyenbe Yuda marte doyanŋ mar goke kafura heŋbe al kura beŋeŋ Yesu niŋ muŋ kura kawan ma ŋut yeŋ hinhan.

Yesu beŋeŋ gabu nalu kurunŋde gor al saba yiryiŋ

¹⁴ Be, gabu nalu kurunŋ goyen kuŋ kahalte heweŋ teŋ hikeyabe Yesu gob Al Kurunŋyen ya

balem koya milgu irtin bana al gabu irde hanjen sawsawa kurunde gor hurkunbe al saba yirijn. ¹⁵ Irkeb Yuda mar belej nurde hurkunkat tenbe, “Al gabe saba mun kura ma titin gega, dufay kurun gabe dare nin tiyun?” yamin.

¹⁶ Irkeb meremin go nurdeb Yesu belej wol henbe, “Saba ten hime gabe nere mon. Saba gabe nad nerke wamirin al goyen hitte mat wan hi. ¹⁷ Al kura Al Kurunyen dufay gama ire yen nuryen al gobe saba ten hime gayen Al Kurun hitte mat wan hi ma nigen dufayde mere ten hime goyen bebak tiyen. ¹⁸ Al kura yingen dufayinde mere ten hiyen al gobe al belej turun nirnan yen gwaha ten hiyen. Goyenbe al kura metenje tiyayin yen hulyan iryin al goyen turun irnan yen meten ten hiyen al gobe al fudinde, usi minmon. ¹⁹ Den belej saba taren gama irde hanjen gobe Mose belej dunyin. Goyenbe den kurun gayen saba goyen kenkela ma gama irde han. Gega danin mununni ten han?” yinyin. ²⁰ Gwaha yinkeb al buda gor gabu iramin goreb, “Al kura mugunen ma ten hi geb, danin gwaha yaha? Gebe ungurage yan,” inamin. ²¹ Irkeb wol henbe, “Nebe Sabat nature kura mata tinen turun yan unkuren forok irmin. Irkeb goke hurkunkat tiyan. ²² Goyenbe den wor Mose belej urtin yago guba yen yunnayin yirin goyen gama irtek yenbe Sabat nature meten ten hanjen. (Guba yen yen mata gobe Mose belej ma min uryin. Asetin yago mehende hinhan gore min uramin.) ²³ Ningeb dirin kura gote guba yen yen nalu goyen Sabat nature forok yekeb Sabat nalu

go yeŋ bada ma heŋ hanŋen. Irde Sabat nalure bulun tihit yeŋ ma nurde hanŋen. Niŋgeb ne wor al kura Sabat nalure sope irmeke iŋiŋ wor po hiyuŋ gega, danŋiŋ bitŋiŋ ar nirde haŋ? ²⁴ Niŋgeb deŋbe al kura matamiŋ siŋare niŋ goyen po keneŋ goke ma tagal unnayiŋ. Gwaha titŋeŋbe al gore mata teŋ hi gote miŋ keŋkela bebak teŋya ga gobe iŋiŋ ma bulun innayiŋ,” yiniŋ.

Yesube Mesaia?

²⁵ Be, mere gwahade yeke nurdeb Yerusalem niŋ mar kura beleŋ, “Al gabe nende doyaŋ mar beleŋ mayniŋ yeŋ kurut yeŋ haŋ al go goyen moŋ? ²⁶ Al gabe kawan po mere teŋ hi. Goyenbe mel gore daha wet kura ma ineŋ haŋ. Niŋgeb doyaŋ mar wor yeŋbe Mesaia yeŋ nurde haŋ wet? ²⁷ Goyenbe neŋbe al gabe gor niŋ yeŋ nurde hite. Gega Mesaia wayyeŋbe gor kura mat waya yeŋ ma po nurtek,” yamiŋ.

²⁸ Be, mel gore gwaha yekeb ya koya milgu irtiŋ bana al gabu irde hanŋen sawsawa kurunde gor po Yesu gore al saba yirde heŋyabe kuware, “Deŋbe fudinde ne gayen keŋkela nurd nunen haŋ? Irde gor mat wayuŋ yeŋ nurde haŋ? Moŋ, deŋbe go ma nurd nunen haŋ geb. Nebe du-fayner ma gar wamiriŋ. Adone beleŋ nad nerke wamiriŋ. Matamiŋbe fudinde wor po. Goyenbe deŋbe go ma nurde unen haŋ. ²⁹ Goyenpoga nebe yeŋ beleŋ nad nerke wamiriŋ geb, keŋkela nurde unen hime,” yiniŋ.

³⁰ Be, Yesu beleŋ go yiriŋ muŋ goke teŋbe teŋ mayniŋ tiyamiŋ. Gega mayke kamtek nalube hako hinhin geb, mayniŋ yeŋ kurut yamiŋ gega,

kura muŋ sisaŋ ma uramiŋ. ³¹ Goyenbe al buda bana goŋbe al budam Yesu niŋ dufaymiŋ saŋiŋ irtiŋ hinhan. Niŋgeb mel goreb, “Mesaia hoyan damiŋ beleiŋ waŋbe al gare mata tiŋeŋ karkuwan forok yirde hi goyen fole irde budam po iryen? Epte moŋ!” yamiŋ.

³² Be, Farisi mar gobe al beleiŋ mere gwahade teŋ sisu balgarat teŋ hike nuramiŋ. Irdeb Al Kurun dolon ird ird mata doyan marte karkuwanmiŋya Farisi marya beleiŋ Yesu fere tiniŋ yeŋ Al Kurunyen ya doyan irde hanyen mar hulyan yiramiŋ.

³³ Be, Yesu beleiŋ, “Nebe nalu ulyande ma denya heŋbe mulgan heŋ nad nerke wamiriŋ al hitte kweŋ. ³⁴ Irkeb ne niŋ naŋkennayiŋ gega, go ma nennayiŋ. Irdeb ne heŋde gorbe deŋ gwahade mar gobe epte ma kunayiŋ,” yinyiŋ. ³⁵ Irkeb Yuda mar goreb yiŋgeŋ uliŋ, “Al gabe dam beleiŋ neŋ epte ma kentekde kweŋ yeŋ yeŋ hi? Yeŋbe nende al burgagaw kerde Grik marte naŋare kwamiŋ beleiŋ goŋ kuŋ Grik mar wet saba yireŋ yeŋ yeŋ hi? ³⁶ Gobe daha yihim yeŋbe, ‘Ne niŋ naŋkennayiŋ gega, go ma nennayiŋ. Irdeb ne heŋde gorbe deŋ gwahade mar gobe epte ma kunayiŋ,’ yeŋ hi?” yamiŋ.

³⁷ Be, gabu nalu kurun goyen kuŋ kuŋ nalu funande hiriŋ. Nalu funan gobe Yuda mar beleiŋ nalu kurun yeŋ nurde hanyen. Be, nalu go forok yekeb Yesu beleiŋ huwardeb kuware gaha yinyiŋ: “Al kura fe niŋ irkeb ne hitte waŋ fe niyyeŋ. ³⁸ Niŋgeb al kura ne niŋ dufaymiŋ tareŋ iryenbe Al Kurunyen asande katiŋ gwahade goyen po, Al

Kurunya hugiñeñ heñ heñ matare niñ fe gore binde mat marde wañ hiyeñ,” yinyiñ. ³⁹ Be, Yesu beleñ fe kahañyañ merem tiyyiñ gobe kame al kura yeñ ge dufaymiñ tareñ irnayiñ marbe Holi Spirit tenayiñ yeñ gogo yiriñ. Gega goyenterbe Yesu goyen Al Kurun hitte ma mulgañ heñ hurkuñ denem turñuñ yañ goyen go ma tirinde hinhin geb, Holi Spiritbe kateñ miñmoñ.

⁴⁰ Be, meremiñ go nurdeb al kura beleñ, “Fudinde, al gabe kame wayyeñ yitiñ Al Kurunyen mere basañ Al go goyen gago,” yamiñ. ⁴¹ Irkeb kura beleñbe, “Yeñbe Mesaia,” yamiñ. Goyenbe kura beleñ, “Moñ, Mesaiaabe Galili nañare mat ma wayyeñ geb. ⁴² Al Kurunyen asañdebe Mesaiaabe Dewityen miñde mat forok yiyyeñ, irde Dewit hinhin taunde Betlehem gor kawañ hiyyeñ yitiñ moñ?” yamiñ ⁴³ Be, Yesu niñ teñbe al buda goyen kurabe Yesu niñ hekeb kurabe Yesu asogo iramiñ. ⁴⁴ Kura beleñ Yesu go teñ mayniñ yeñ kurut yamiñ gega, sisañ ma po uramiñ.

Yuda marte doyañ marbe Yesu niñ dufaymiñ sañiñ ma iramiñ

⁴⁵ Be, ya balem doyañ irde hañyen mar go Yesu fere tiniñ yeñ kwamiñ gega, walip yeñ nurdeb mulgañ heñ Al Kurun dolon ird ird mata doyañ marte karkuwañmiñya Farisi marya hitte kwamiñ. Kukeb yeñ beleñ, “Daniñ al go teñ ma wayhañ?” yineñ gusañuñ yiramiñ. ⁴⁶ Irkeb ya balem gote doyañ mar beleñ wol heñbe, “Al kura beleñ yeñ mere igiñ po teñ hi gwahade kura ma teñ hiyeñ,” yinamiñ. ⁴⁷ Irkeb Farisi

mar goreb, “Den wor al gore usi dirde bitin yawara?” yinamin. ⁴⁸ Irdeb, “Doyan marya Farisi marya kura dufaymin al goke taren irke yenan? Hubu wor po geb! ⁴⁹ Al buda Moseyen saba kenkela ma nurde han mar goreb gogo gama irde han. Go mar gobe Al Kurunyen bearar bana po hinayin,” yamin. ⁵⁰⁻⁵¹ Irkeb Nikodemus belen huwardeb, “Nende sabarebe al kura merem yan irtek yenbe al gote mere wor wor nurde gab merem yan irnayin yitin mon?” yinen gusunan yiriyin. Nikodemusbe Farisi mar al gega, hakot yen belen kun Yesu kenen sabamin nuryin al go goyen. ⁵² Be, Nikodemus belen gwaha yinkeb mel gore wol henbe, “Ge manan Galili nin al? Al Kurunyen mere kenkela kenayin. Irde gab Al Kurunyen mere basan al kura Galili bana mat ma wayyen yitin goyen bebak tiyayin,” inamin.

[⁵³ Be, Yerusalem gabu iramin marbe bur yenbe tiyunmin tiyunmin kwamin.]

8

¹ Goyenbe Yesube Olip dondonde hurkurin.

Bere mata bulun minyan kura Yesu hitte tawayamin

² Be, fay urkeb sopte Al Kurunyen ya balemde kurin. Irkeb al budam wan kalyan keramin. Irkeb keperde saba yiriyin. ³ Be, Moseyen saba marya Farisi marya belen bere un yan kura goyen al hoyanya duwan ten hike kenenbe ten wayamin. Tawakeb bere gob gabu iramin goyen dilin mar huwaryin. ⁴ Irkeb mel goreb, “Tisa, bere gabe un minyan gega, al hoyanya duwan ten

hike kenhet. ⁵ Moseyen sabarebe bere gahade gab horare gasa yirke kamnayiñ yitiñ hi. Munan gebe gokeb daha yawayin?” inen gusunan iramiñ. ⁶ Gusunan gwahade iramiñ gobe Yesu belen daha wet kura yekeb meremiñ gore po bul irde merem yan irniñ yenbe gusunan gwahade iramiñ gogo. Goyenbe Yesu gob urgun kan hanin po megen mere kura kan hinhin. ⁷ Irkeb mel gore wol hen hen ge pakku irke huwardeb yinyin. “Den bana gayen al kura mata bulun minmon wor po hi keneñ gab yen wa mehen hen horare mayyen,” yinyin. ⁸ Irdeb sopte urgun kan megen mere kan hinhin.

⁹ Be, mere go nuramiñ marbe yun̄kuren̄ yun̄kuren̄ siksuk irde kun̄ hinhan. Parguwak wa mehen hamiñ. Kun̄ kun̄be Yesuya bere goya po gor hinaryum. ¹⁰ Irkeb Yesu belen huwardeb, “Bere, al buda gar gobe damde han̄? Al kura merem yan̄ ma gira?” inyin. ¹¹ Irkeb bere goreb, “Gwaha, doyan̄ al, hubu po,” inyin. Irkeb Yesu belen, “Be, ne wor merem yan̄ ma giren̄ geb, kwa ko. Irdeb mata bulun̄ sopte ma tiyayin̄,” inyin.]*

Yesube hulsi

¹² Be, kame Yesu gob al saba yirdeb, “Nebe alya bereya Al Kurun̄ yikala yird yird hulsi. Niñgeb al kura ne gama niryen̄be mata bulun̄yen kidoma bana ma kun̄ hiyen̄. Irde Al Kurunya huginen̄ hen̄ hen̄ gote hulsi goyen̄ tiyyen̄,” yinyin. ¹³ Irkeb Farisi mar belen̄ inen̄ ten̄be, “Mere ten̄ ha gobe gigen̄ ge po ten̄ yen̄ ha. Niñgeb merege kurun̄

* **8:11:** Asan̄ hoyandebe 7:53-8:11 gobe ma hi.

gobe miñ miñmon geb, al kura belen fudinde yeñ ma nuryeñ,” inamiñ. ¹⁴ Irkeb wol heñbe, “Nebe gor mat wamiriñ, irde gor kweñ yeñ nurde hime. Niñgeb niñgeñ ge mere teñ hime gayenbe miñ manañ mere teñ hime. Goyenbe denbe ne gayen gor mat wamiriñ, irde gor kweñ yeñ hime gobe muñ kura ma nurde hañ. ¹⁵ Denbe megen niñ alyen dufayde po merem yañ nirde hañ. Gega nebe dende matare al muñ kura merem yañ ma irde himyen. ¹⁶ Munañ ne belen al kura merem yañ yireñ mar gobe ne nunkuren ma yireñ. Nanne hulyañ nirke wamiriñ al goya har geb, mel goyen merem yañ yireñ mata gobe mata huwak wor po. ¹⁷ Dende saba tareñdebe mere kura fudinde heñ heñ niñbe al irawa belen mere goyen sañiñ irkeb mere gobe fudinde yeñ nurnayiñ yeñ katiñ hi. ¹⁸ Niñgeb nebe niñgeñ ge mere teñ himyen, irde Adone nad nerke wamiriñ al gore wor ne yeñ hime gwahade po yeñ hi,” yinyiñ. ¹⁹ Irkeb mel gore, “Adogebe dare hi?” inen gusunañ iramiñ. Irkeb, “Denbe neya Adoneyab go ma nurde duneñ hañ. Ne nurd nuneñ hañ manhan Adone wor nurde unwoñ,” yinyiñ. ²⁰ Saba gabe Al Kurunyen ya balem bana Al Kurun galak ird ird gasun bindere gor heñ al saba yiryiñ. Goyenbe yeñ mayke kamtek nalube hako geb, al kura wañ teñ miñmon.

²¹ Be, sopte po Yesu belen, “Nebe kweñ. Irke ne niñ nanñkennayiñ. Irdeb mata bulun bana po heñ kamñayiñ. Goyenbe ne kwende gorbe den epte ma kunayiñ,” yinyiñ. ²² Be, Yesu mere tiyyiñ goyen Yuda mar belen nurdeb, “Al gab yinñen

temeyen tiya? Gwahade ningeb gogo, ‘Ne kwenđe gorbe den epte ma kunayin,’ yen hi?” yen yingen ulin kadom gusunan gird tiyamin. ²³ Goyenbe Yesu belen teban yinyin. “Denbe megen gar nin mar gega, nebe gwahade mon. Denbe megen gar nin mata gama irde han gega, nebe Al Kurun hire gor nin mata gama irde hime. ²⁴ Denbe mata buluntin bana gon po hen kamnayin dinhem gobe fudinde wor po dinhem. Ningeb nebe al gwahade yen dinen himyen go goyen fudinde yen ma nurnayinbe mata buluntin bana gon po hen kamnayin,” yinyin. ²⁵ Irkeb mel goreb, “Gebe ganun al wor po?” inen gusunan iramin. Irkeb wol henbe, “Nebe al gwahade yen mehenđe mat wor po dinen himyen al go goyen. ²⁶ Nebe mere misin budam goke den gayen merem yan dirtek hime. Goyenbe nad nerke wamirin al gobe mataminbe fudinde geb, nebe al gore ninen hiyen go po megen nin mar kurun gayen momon yirde hime,” yinyin.

²⁷ Be, mel gobe Yesu belen Nanin ge mere dirde hi yen ma bebak tiyamin. ²⁸ Gwahade ningeb Yesu belen, “Ne Al Urmin gayen den belen kuruse hende nisan hen mununke kammeke gab nebe al gwahade dinen himyen goyen goke bitin bak yiyyen. Irdeb nebe dufayner ma mere tenbe Nanne belen saba nirde hi goyen po tagalde himyen goyen goke bebak tinayin. ²⁹ Nad nerke wamirin al gobe neya har. Nebe yen amanen nuryen mat po mata ten himyen geb, nubul ma ten hiyen,” yinyin. ³⁰ Be, al budam meremin nuranin mar gobe Yesu nin dufaymin taren iramin.

Yesuya Abrahamya

³¹ Be, Yuda mar kura yeŋ ge dufaymiŋ tareŋ irhet yamiŋ mar goyen Yesu beleŋ, “Sabane gayen keŋkela tanarnayiŋbe komatne wor po henayiŋ. ³² Irde gab mere fudinde goyen nurnayiŋ. Irke mere fudinde nurnayiŋ gore gab mata buluŋ bana mat dad siŋa diryeŋ,” yinyiŋ. ³³ Irkeb mel gore wol heŋbe, “Neŋbe Abrahamyen asem yago. Irde al kurat yufuk bana heŋ meten muruŋgem moŋ ma teŋ hitiŋ. Niŋgeb daha yihim yeŋbe megen niŋ kanduk bana ma hinayiŋ dineŋ ha?” inamiŋ. ³⁴ Irkeb wol heŋbe, “Fudinde wor po dineŋ hime, al kura mata buluŋ tiyyeŋ gobe mata buluŋ yufukde gor po heŋ gote kanduk po teŋ hiyeŋ. ³⁵ Be, al kura al kurate yufukde heŋ muruŋgem moŋ meten teŋ unen hiyen al gobe hugiŋeŋ hitek gasuŋ miŋmoŋ hiyyeŋ. Goyenbe doyaŋ almiŋ gote urmiŋbe hugiŋeŋ naniŋya hiriryen. ³⁶ Niŋgeb ne Al Urmiŋ gare mata buluŋtiŋ yad siŋa yirde dawarmekeb fudinde wor po deŋbe mata buluŋ bana ma wor po hinayiŋ. ³⁷ Deŋbe Abrahamyen asem yago yeŋ nurde duneŋ hime. Goyenbe bitiŋ bana gobe mata buluŋ beleŋ po makeŋ hitiŋ geb, merene nurtek ma haŋ. Niŋgeb mununniŋ teŋ haŋ gogo. ³⁸ Nebe Nanne beleŋ mata nikala nirke yeneŋ himyen goyen po momoŋ dirde hime. Munan deŋbe nantiŋ beleŋ mere dirke nurdeb goyen po teŋ haŋ,” yinyiŋ. ³⁹ Irkeb mel goreb, “Abrahambe adoniniŋ,” inamiŋ. Irkeb, “Deŋbe Abraham dirneŋ weŋ manhan yeŋ mata teŋ hinhin goyen po teŋ hiwoŋ. ⁴⁰ Nebe mere

fudinde Al Kurun hitte mat nurmin goyen po momon dirde himyen. Goyenpoga denbe goke mununnin ten han. Abrahambe mata gwahade kura ma ten hinhin. ⁴¹ Ningeb denbe adotin belen mata ten hiyen goyen po ten han,” yinyin. Irkeb mel gore igin ma nurdeb, “Nenbe totpa dirin mon. Adonininbe Al Kurun unken gogo po,” inamin. ⁴² Irkeb Yesu belen, “Nebe Al Kurun hitte mat wamirin hime geb, nantinbe fudinde Al Kurun manhan ne nin amanen nurde hiwon. Nebe dufayner ma wamirin, yen belen nad nerke wamirin. ⁴³ Denbe merene epte ma nurtek geb, gogo merene min bebak ma ten han. ⁴⁴ Denbe adotin Satanyen dirnen wen. Irdeb adotin de dufay bulun goyen po gama irde mata titek po dirde hi. Yenbe mata fudinde mun kura bin bana ma hi geb, minde mat wor po al gasa yirke kamde kamde al hirin. Yenbe usi al, irde usi mere gote min al. ⁴⁵ Ningeb mere fudinde dinen hime gega, ne nin heken ma nurde han. ⁴⁶ Den bana gayen ganun al kura belen mata bulun gwahade tiyan ninyen? Nebe mere fudinde ten hime gega, dani ne nin heken ma nurde han? ⁴⁷ Al kura Al Kurunyenbe meremin nurde hiyen. Ningeb denbe Al Kurunyen mon geb, Al Kurunyen mere ma nurde han gogo,” yinyin.

⁴⁸ Be, Yesu belen gwaha yinkeb Yuda mar gore wol henbe, “Gebe Samaria nin al, uncura belen ketal gurtin gintek gobe fudinde wor po gintek,” inamin. ⁴⁹ Irkeb wol henbe, “Nebe uncura ma ketal nurtin hime. Nebe Adone turun irde himekeb den bebenbe son hen ne ma turun nirde

hanj. ⁵⁰ Nebe denne turɲun yanj ird ird niɲ ma nurde hime. Goyenbe denne turɲun yanj irtek albe unɲuren hi. Niɲgeb merem yanj nirde hanj gobe yeɲ haninɲde kerenɲ. ⁵¹ Fudinde wor po dinenɲ hime, al kura merene gama iryenɲbe go ma kamyenɲ,” yinyinɲ.

⁵² Be, Yuda mar gobe Yesu mere tiyyinɲ goyen nurdeb, “Hanɲkab gebe unɲgura ketal gurtinɲ ha yeɲ nurde gunhet. Abrahambe kamyinɲ, irde Al Kurunɲyen mere basanɲ mar mananɲ kamaminɲ. Gega gebe, ‘Al kura merene gama iryenɲbe go ma kamyenɲ,’ yeɲ ha? ⁵³ Abrahamya Al Kurunɲyen mere basanɲ maryabe kamaminɲ. Munanɲ ge gayenbe yeɲ folek? Al dahade go goyenbe ge gago?” inaminɲ. ⁵⁴ Irkeb wol heɲbe, “Denne turɲun yanj irenɲbe minɲ minɲmonɲ hiyyenɲ. Goyenbe Nanne denɲ belenɲ Al Kurunɲninɲ yeɲ hanɲ al gore denne turɲun yanj irde hi geb. ⁵⁵ Denbe yeɲ ma nurd unenɲ hanɲ gega, nebe nurde unenɲ hime. Irdeb ne belenɲ al goyen ma nurde unenɲ hime yewenɲbe ne wor denɲ yara usi al hewenɲ. Goyenbe nebe nurde unenɲbe mereminɲ gama irde himyen. ⁵⁶ Asetinɲ Abrahambe ne megen gar wanɲ wanɲ nalu goyen kenmewonɲ yeɲ nuryinɲ. Irdeb kenenɲbe amanɲ wor po hiriɲ,” yinyinɲ. ⁵⁷ Irkeb mel goreb, “Ge gayen damage 50 ma heɲ hi gega, Abraham kenarinɲ?” inaminɲ. ⁵⁸ Irkeb wol heɲbe, “Fudinde wor po dinenɲ hime, Abraham forok ma yirinɲya nebe hinhem!” yinyinɲ. ⁵⁹ Gwaha yinkeb mel gore hora yadeb mayninɲ tiyaminɲ. Irkeb bana kuɲbe Al Kurunɲyen ya balem goyen tubul tenɲ hoyanɲde kuriɲ.

9

Al diliŋ titmiŋ kura sope iryiŋ

¹ Be, Yesu gob beley kuŋ henyaŋbe al kura miliŋ beley diliŋ titmiŋ gwahade po kawaŋ kirtiŋ goyen kinyiŋ. ² Irkeŋ komatmiŋ beley, “Rabai, ganuŋ beley mata buluŋ tiyyiŋ? Al gare ma miliŋ naniŋ beley tiyaryum geb, gago gwahade po kawaŋ hiriŋ?” inamiŋ. ³ Irkeŋ wol henbe, “Diliŋ titmiŋ gobe yiŋgenŋde mata buluŋ ma miliŋya naniŋyat mata buluŋ beley ma iryiŋ. Gobe Al Kurunyen saŋiŋ yeŋ hitte kawan forok yiyyen yeŋbe gwahade po kawaŋ hiriŋ. ⁴ Munan neŋbe naŋa hikeya po nad nerke wamiriŋ al gote meten teŋ hitek. Moŋgo kidoma hekeŋ epte ma meten titek geb. ⁵ Nebe megen gar hime nalure gabe alya bereya Al Kurun yikala yird yird hulsi geb,” yinyiŋ.

⁶ Be, gwaha yinenbe mulowore meyan teŋbe ti-giri tike woŋa hekeŋ teŋ al gote diliŋde sam iryiŋ. ⁷ Gwaha irdeb, “Kuŋ Siloam fe alare delge hala,” inyiŋ. (Siloam gote miŋbe Teŋ Kerke Kutin.) Irkeŋ al gobe kuŋ fete gor diliŋ haldebe diliŋ wuk yeke nankenenbe mulgan heŋ wayyiŋ. ⁸ Irkeŋ tiyuŋmiŋde niŋ marya hakot diliŋ titmiŋ heŋ kaŋaŋ teŋ hike keneŋ hitiŋ mar goreb gusuŋaŋ hamiŋ. “Al gabe belen keperde kaŋaŋ teŋ hiyen al go goyen moŋ?” yamiŋ. ⁹ Irdeb al kura beley, “Al diliŋ titmiŋ gar go goyen,” yekeŋ kura beleybe, “Moŋ, yeŋ moŋ. Al kura yeŋ yara po be,” yamiŋ. Goyenbe al goreb, “Nebe yeŋ haŋ al goyen,” yinyiŋ. ¹⁰ Irkeŋ mel goreb, “Daha matbe igiŋ heŋ gogo nankenha?” inamiŋ. ¹¹ Irkeŋ, “Al

Yesu inenɗi hanɗen al go gore woɗa irde delne sam yira. Irdeb, ‘Kuɗ Siloam fe alare hala,’ ninkeb kuɗ haldebe gago naɗkenhem,” yinyiɗ. ¹² Gwaha yinkeb, “Al gobe dare hi?” inenɗi gusuɗaɗi irkeb, “Go ma nurde hime,” yinyiɗ.

¹³ Be, mel gore al goyen teɗi Farisi mar hitte tukamiɗ. ¹⁴ Be, Yesu beɗen mulowo meyaɗi irde tigiri teɗi gore po al diliɗi titmiɗi goyen sope iryiɗi nalu gobe Sabat nalu. ¹⁵ Niɗgeb Farisi mar wor yeɗi beɗen daha mat diliɗi igiɗi heke naɗkinyiɗi goke gusuɗaɗi iramiɗi. Irkeb, “Yeɗi beɗen woɗa teɗi delner sam irke kuɗi fete delne haldebe naɗkenhem,” yinyiɗ. ¹⁶ Irkeb Farisi mar kura beɗen, “Al gobe Sabat nalure niɗi mata ma gama ira geb, yeɗibe Al Kurunɗi hitte mat ma watiɗi geb,” yamiɗi. Goyenbe kura beɗenbe, “Gwahade kenem mata bulunɗi al beɗenbe dahadem mata tiɗenɗi tunɗunɗi yaɗi Al Kurunɗi beɗen po ga yirtek goyen yirde hi?” yinenɗi gusuɗaɗi hamiɗi. Be, mel gobe gwaha teɗi yiɗgenɗi uliɗi kadom mohoɗde tiyamiɗi. ¹⁷ Be, gwaha teɗi kuɗi kuɗi funaɗibe al diliɗi igiɗi hiriɗi al goyen gusuɗaɗi iramiɗi. “Delge sope ira al gobe ganunɗi yeɗi nurde ha?” inamiɗi. Irkeb al goreb, “Yeɗibe Al Kurunɗen mere basanɗi al geb,” yinyiɗ.

¹⁸ Be, Yuda marte doyaɗi marbe al diliɗi titmiɗi gega sope irke naɗkinyiɗi goyen fudiɗde yeɗi ma nuramiɗi. Irdeb miliɗiya naniɗiya niɗi keya heke wayaryum. ¹⁹ Wakeb, “Al gayenbe urtiriɗi? Irde yeɗibe diliɗi titmiɗi gwahade po kawaɗi hiriɗi yeɗi haryen go goyen? Goyenbe dahade niɗgeb hanɗabe naɗkenenɗi hi?” yinenɗi gusuɗaɗi yiramiɗi. ²⁰ Irkeb al gote naniɗiya miliɗiya beɗen wol henɗibe,

“Gabe urdere. Irdeb diliņ titmiņ gwahade po kawaņ hiriņ gobe nurde har. ²¹ Goyenbe daha mat naņkena, irde ganuņ belen sope ira gobe ma nurde har. Yeņbe parguwak geb, yiņgen momoņ diryeņ geb, gusuņaņ irnaņ” yinaryum. ²² Be, Yuda marte doyaņ mar gobe bikkeņ mere sege irdeb, “Al kura Yesube Mesaia yekeb takira titek. Irkeb gabu yaniniņde epte ma wanayiņ,” yeņ mere mayamiņ. Niņgeb naninya miliņa go mere goyen nuraryumde geb, doyaņ mar goke kafura heņbe, ²³ “Yiņgen gusuņaņ irnaņ. Yeņbe parguwak geb,” yinaryum gogo.

²⁴ Be, sopte al diliņ titmiņ go inke wayyiņ. Irkeb, “Delge sope ira al gobe mata buluņ al yeņ nurde uneņ hite. Niņgeb al go deņem turuņ yaņ irtiņeņbe Al Kuruņ deņem turuņ yaņ ira ko,” inamiņ. ²⁵ Irkeb wol heņbe, “Al gobe mata buluņ al ma gwahade moņ gobe ma nurhem. Goyenpoga nebe delne titmiņ hinhem gega, gago naņkenhem go po ga nurde hime,” yinyiņ. ²⁶ Gwaha yinkeb mel goreb, “Daha daha gira? Daha mat delge sope irke naņkenha?” ineņ gusuņaņ iramiņ. ²⁷ Irkeb wol heņbe, “Nebe bikkeņ momoņ dirhem gega, merene ma nurhaņ. Gega daniņ sopte nurniņ teņ haņ? Deņ manaņ yende komatmiņ hiniņ yeņ teņ haņ?” yinyiņ. ²⁸ Gwaha yinkeb mel goreb sukal irde, “Ge po gab al gote komatmiņ! Neņbe Moseyen komat geb! ²⁹ Mosebe Al Kuruņ belen mere iryiņ gobe nurde hite. Goyenbe al gobe gor kura mat wayuņ yeņ ma po nurde uneņ hite,” yamiņ. ³⁰ Irkeb wol heņbe, “Be, deņ belen al gobe gor kura mat wayuņ yeņ ma nurde hite

yeŋ haŋ gobe kukuwamneŋ wor po. Gega nebe al gore sope nirke gago naŋkenen hime. ³¹ Al Kurunbe mata bulun marte merebe go ma wol heŋ yunen hiyen. Munan Al Kurun palap irde dufaymin gama irde haŋ mar gote merebe nurde wol heŋ hiyen yeŋ nurde hityen. ³² Irde al kura al dilin titmin gwahade po kawan hitin goyen sope irke naŋkintin baraneŋ kura ma po nurde hityen. ³³ Sope nira al gobe Al Kurun hitte mat ma wayun manhan det kura ma irwon,” yinyin. ³⁴ Gwaha yinkeb mel gore wol heŋbe, “Gebe mata bulun bana po kawan heŋ kun kurun hawan. Niŋgeb danin ge gahade gare saba direŋ ten ha!” inenbe gabu yaminde mat hugineŋ takira tiyamin.

³⁵ Be, Yesu gob al dilin titmin goyen Yuda marte doyan mar belen takira tiyamin gote mere momon nuryin. Irdeb al goyen kenenbe, “Ge gayen Al Urmin nin dufayge tareŋ irha?” inyin. ³⁶ Irkeb al goreb, “Doyan al, yeŋbe al ganun? Momon nira. Irkeb yeŋ ge dufayne tareŋ ireŋ,” inyin. ³⁷ Irkeb Yesu belen wol heŋbe, “Al gobe bikken kenha. Fudinde wor po, al gobe mere girde hime al ne gago po geb,” inyin. ³⁸ Irkeb al goreb, “Doyan Al Kurun, ge nin dufayne sanin irhem,” inenbe dokolhon yugulun ten turun iryin. ³⁹ Irkeb, “Nebe al iginya bulunya pota yird yird nin megen gar wamin. Gogab ne nin dufaymin tareŋ irnayin marbe dilin titmin gega naŋkinyen go gwahade Al Kurunyen dufay kenkela bebak tinayin. Munan al kura harhok nunnayin marbe al kura dilin titmin yara Al Kurunyen dufay epte ma bebak tinayin,” inyin. ⁴⁰ Irkeb Farisi mar kura yenya

hinhan gore nurdeb, “Gebe neŋ gayen wor diltin titminŋ dinenŋ ha?” inaminŋ. ⁴¹ Irkeb wol henbe, “Denbe dindikenŋ ge yeŋ, ‘Dilniniŋ titminŋ geb, Al Kurunyen mere keneŋ bebak ma teŋ hite,’ yeŋ haŋ manhan Al Kurunŋ beŋ mata bulunŋ mar ma dinwoŋ. Goyenbe dindikenŋ, ‘Neŋbe dilniniŋ titminŋ moŋ, iginŋ Al Kurunyen mere keneŋ bebak teŋ hite,’ yeŋ haŋ geb, bikkenŋ mata bulunŋ bana haŋ yeŋ denenŋ hime,” yinyinŋ.

10

Sipsipya doyaŋ alminiya

¹ Be, Yesu go sopte gaha yinyinŋ: “Fudinde wor po dinenŋ hime, al kura sipsip niŋ koya kirtinŋ goyen yamemde mat ma waŋ koya go nandu urde hurkuyenŋ al gobe kawe marya al gasa yirniŋ yirniŋ yirde detminŋ kawem yade hanŋyen marya geb. ² Goyenbe sipsip doyaŋ al wor pobe sipsip koya gote yamere mat waŋ hurkuyenŋ. ³ Irkeb sipsip koya gote yame doyaŋ irde hi al goreb yame fegelde unyenŋ. Irkeb hurkunŋ sipsipminŋ goyen deŋe yurke tumŋaŋ wakeb bul yirde siŋare yukuyenŋ. ⁴ Be, sipsipminŋ yinŋenŋde go po yade siŋare yukunbe yinŋenŋ wa mehenŋ heŋ kunŋ henya mere yirde hiyenŋ. Irkeb melak nurde hanŋyen geb, yeŋ po gama irnayanŋ. ⁵ Goyenbe al tiŋenbe epte ma wor po gama irnayanŋ. Fudinde, sipsip gobe al tiŋenŋ gote melak ma nurde hanŋyen geb, keneŋ yilwa irde busaharnayanŋ,” yinyinŋ.

⁶ Be, Yesube maya mere gwaha mat yiryinŋ gega, sabaminŋ nurde hinhan marbe goke dinenŋ hi yeŋ ma bebak tiyaminŋ. ⁷ Niŋgeb Yesu gore sopte gaha

yinyiņ: “Fudinde wor po dinen hime, nebe sipsip niņ koya kirtiņ gote yame. ⁸ Niņgeb al kura asogo nirde neņ wa neņ wa teņ haņyen mar kurun gobe kawē marya al gasa yirniņ yirniņ yirde detmiņ kawem yade haņyen marya geb, sipsip gore meremiņ ma nuramiņ. ⁹ Nebe yame yara. Niņgeb al kura ne hitte mat waņ Al Kurun hire gor hurkuyenbe det kura belei epte ma bulun iryen. Al gobe sipsip belei koya binde hurkun usan heņ siņare kateņ yamuņ nene haņyen go gwahade goyen igiņ po hiyen. ¹⁰ Kawē albe sipsip kawē teņ gasa yirde bulun bulun yiren yen waņ hiyen. Goyenpoga nebe merene nurde haņ mar gob Al Kurunya hugiņeņ heņ heņ goyen yuneņ. Irkeb mel gobe Al Kurunya hugiņeņ hinayiņ goyenbe igiņ wor po hinayiņ.

¹¹ “Be, nebe sipsip doyaņ al igiņ. Sipsip doyaņ al igiņbe sipsipmiņ ge teņ yiņeņ kamde kamde niņ ma nurde hiyen. Igiņ kamyen. ¹² Goyenbe al damu irke ga sipsip doyaņ yirde hiyen al gobe sipsip gote miņ al moņ. Niņgeb kulu duwi kura wake keneņbe sipsip goyen gor po okohom yubul teņ busaharyen. Irkeb kulu duwi belei sipsip goyen yisike burgagaw kernayiņ. ¹³ Al gobe damu irke hora niņ po nurde sipsip doyaņ yirde hiyen geb, sipsip goke ma nurde busaharyen.

¹⁴⁻¹⁵ “Be, nebe sipsip doyaņ al igiņ. Nanne belei nurd nuneņ hi, irkeb ne wor nurd unen hime. Gwahade goyen po, nebe sipsipne nurde yuneņ hime, irke sipsipne wor nurd nuneņ haņ. Irde sipsipne teņ kame yenbe igiņ kameņ. ¹⁶ Nebe sipsipne hoyan manan haņ. Gobe koya bana

gor ma hañ. Goyenbe go manañ yawarenj. Yen manañ melakne nurnayinj. Irde sipsip koya bana hañ goya tumñañ hike doyañ yird yird al manañ ne nunkurenj po heñ.

17 “Nebe kame sopte huwaren j yep nurdeb Nanner alya bereya goke tenj kameñ. Niñgeb Nannebe goke tenj ne gayen bubulkunne wor po yep nurde nunen hi. 18 Al kura belenj tareñminde epte ma mununke kameñ. Nebe alya bereya goke kame yepbe iginj kameñ, irde sopte huware yepbe iginj huwaren j. Go tiyenj gobe Adone belenj gwaha tiyayin j ninyin j geb, gogo tiyen j,” yinyin j.

19 Be, mere tiyyin j goyen nurdeb Yuda mar belen j sopte yinjen j ulin j kadom mohonj de tiyamin j. 20 Al budambe, “Al gabe unjgura ketal urtin j geb, kukuwa wor po! Niñgeb danin j meremin j nurde hañ?” yamin j. 21 Goyenbe kurabe, “Mereminj be unjgura ketal urtin j al belen j mere titin j yara mon j. Unjgurabe al dilin j titmin j igin j sope iryen j? Epte mon j geb,” yamin j.

Yuda mar tumñañ Yesu asogo iramin j

22 Be, kun j kun j gabu nalu kurun j kura “Ya Balem Al Kurun j Untek” inen j hanjen j goyen Yerusalem forok yirin j. Goyenterbe naña uysun j wor po heñ heñ nalu.* 23 Be, Yesube Al Kurunjen ya balem bana ya kawan yulyanjen j kura Solomonyen Paranda inen j hanjen bana goyan j kun j hinjin j. 24 Irkeb Yuda mar belen j wan j Yesu kalyan j kerdeb, “Daha naña gab nebe al gwahade

* **10:22:** Naña uysun j wor po heñ heñ nalu gobe ais katen j hiyen geb, anutayen mere matbe “winta” yep hanjen j.

yeŋ bebak dirkeb kukuwamŋeŋ ma nurtek? Gebe Mesaia kenem bebak po dirayiŋ,” inamiŋ.

²⁵ Irkeb Yesu belen wol heŋbe, “Nebe momon dirmiŋ gega, merene goyen fudinde yeŋ ma nurde haŋ. Mata tiŋeŋ turuŋ yeŋ ne belen Nanner saŋiŋde forok yirde himyen goreb nebe al gwahade yeŋ dikala dirde haŋ. ²⁶ Goyenbe deŋbe nere sipsip moŋ geb, merene fudinde yeŋ ma nurde haŋ. ²⁷ Nere sipsipbe melakne nurde gama nirde haŋ. Ne wor sipsip go nurd yuneŋ hime. ²⁸ Nebe Al Kurunya hugiŋeŋ heŋ heŋ goyen yeŋ yuneŋ himyen. Niŋgeb go ma po buluŋ henayiŋ. Irdeb al kura belen hanner mat epte ma sipsipne kura goran niryeŋ. ²⁹ Nanne belen alya bereyamiŋ sipsip yara goyen ne nuntiŋ. Yeŋbe tareŋmiŋ kurun wor po. Niŋgeb sipsip goyen yeŋ doyaŋ yirde hiyeŋde mat epte ma al kura belen goran yiryen. ³⁰ Neya Adoneyabe unjkuren po geb,” yinyiŋ.

³¹ Be, Yesu belen gwaha yinkeb mel gore sopte hora yadeb mayniŋ tiyamiŋ. ³² Goyenbe Yesu belen yinyiŋ. “Nebe meten igiŋ wor po forok yirde duneŋ himyen. Gega meten igiŋ damiŋ goyen goke igiŋ ma nurde mununniŋ teŋ haŋ?” yinyiŋ.

³³ Irkeb mel gore wol heŋbe, “Neŋbe mata tiŋeŋ forok yirde hayen goyen goke ma mugunniŋ teŋ hite. Goyenbe gebe al neŋ yara po gore, ‘Nebe Al Kurun,’ yeŋ ha gobe Al Kurun sukal irde ha geb, goke mugunniŋ teŋ hite,” inamiŋ.

³⁴ Irkeb wol heŋbe, “Dende sabarebe Al Kurun belen Israel marte doyaŋ mar kura turun yirdeb,

‘Denbe nigen yara,’ gwaha yitiŋ goyen kapyan ma heŋ hanjen? ³⁵ Al Kurun belen meremiŋ yunyiŋ mar goyen, ‘Denbe nigen yara,’ yinyiŋ. Al Kurunyen asanđe niŋ merebe fudinde wor po epte ma usi yetek. ³⁶ Nebe Adone belen basiŋa nirde nad nerke megen gar wamiriŋ. Niŋgeb nebe Israel marte doyan mar kura Al Kurun belen, ‘Denbe nigen yara,’ yinyiŋ mar gote folek. Gega dahade niŋgeb nebe Al Kurun Urmiŋ yemekeb deŋ belen Al Kurun sukal irha ninhan? ³⁷ Ne belen Adoner meten ma ten himeke nenenbe dufaytiŋ ne niŋ taren ma irnayiŋ. ³⁸ Goyenbe gwaha ten hime kenem ne niŋ hekken nurnayiŋ. Gega gwaha ten tenmiŋ metenen kenem mata tiŋen turnun yan forok yirde himyen go po yenenbe fudinde yen nurnayiŋ. Gogab Adonebe neya hike, nebe yenya har goyen bebak tinayiŋ. Irde yenya neyabe unkenen po yen nurnayiŋ,” yinyiŋ. ³⁹ Be, meremiŋ goke mel gore sopte ten mayniŋ tiyamiŋ. Gega isal po uryiŋ.

⁴⁰ Be, gor matbe Yodan fe siŋa kurhan hanƙapya Yon belen al baptais yirde hinhin belen goŋ kuriŋ. Irdeb goŋ hinhin. ⁴¹ Irkeb al budam yen hitte wayamiŋ. Irdeb, “Yonbe mata tiŋen turnun yan kurayen kurayen ma forok yiryiŋ. Goyenbe yen belen al gake tagalde hinhin gobe fudinde wor po,” yamiŋ. ⁴² Irdeb go gasunde gorbe al budam yen ge dufaymiŋ sanŋ iramiŋ.

11

Lasarus kamyiŋ

¹ Be, al kura denjem Lasarus goyen garbam buluŋ po hiriŋ. Yenbe Betani tiyuŋde niŋ al. Betani gobe Mariaya babam Martayat tiyuŋ. ² Maria gobe he fimiŋ hamiŋ kusamuŋ gore po Doyaŋ Al Kuruyuŋen kahaŋde wogorde tonan yuwalheŋ belen po utma tiyyiŋ bere go goyen. Be, kuliŋ Lasarusbe garbam iryiŋ. ³ Niŋgeb ire babamya goreb Yesu niŋ keya heŋbe, “Doyaŋ Al Kuruy, kadge amaheŋ wor po nurde unen hayen al gobe garbam hihi,” yaryum. ⁴ Irkeb Yesu gobe mere go nurdeb, “Garbam goreb Lasarus mayke kamyen. Goyenbe hugiŋen ma kamyen. Al Kuruy denjem turuŋuŋ yaŋ ird ird niŋ garbam go forok yiyuŋ. Irde ne Al Urmiŋ gayen al belen Lasarus hitte mata forok ireŋ goyen kenenbe denne turuŋuŋ yaŋ irnayiŋ,” yiriŋ. ⁵ Yesube Martaya hayminiŋya kuliŋ Lasarusya niŋ amaheŋ wor po nurde yunen hinhin. ⁶ Goyenbe Lasarus garbam hiriŋ mere momoŋbe nuryiŋ gega, hinhinde gor po sopte wawuŋ irawa firyiŋ.

⁷ Irde gab komatmiŋ yago goyen, “Mulgaŋ heŋ Yudia naŋare kuniŋ,” yinyiŋ. ⁸ Irkeb komatmiŋ belen inamiŋ. “Goyenbe Rabai, gorbe Yuda mar belen horare soŋ mugunaŋ go. Gega sopte mulgaŋ heŋ gor kweŋ teŋ ha?” inamiŋ. ⁹ Gwaha inkeb yeŋ kamtek nalube hako geb, go ma munnayiŋ yinenbe maya mere mat gaha yinyiŋ: “Wampot mat wawuŋbana naŋa kurkuyen go kahal banabe awa 12 haŋyen. Niŋgeb naŋa temeyde hikeyabe albe igiŋ dawet keŋkela yennayiŋ geb, al kura belenyaŋ kuŋ henya epte ma kukuhuk uryen. ¹⁰ Goyenbe wawuŋbe kidoma geb, belen

kuŋ henbe takteŋ mayyen,” yinyiŋ.

¹¹ Be, gwaha yinenbe sopte po, “Kadniniŋ Lasarusbe ferde hi niŋgeb, ne belen kuŋbe isan hewen tihim,” yinyiŋ. ¹² Irkeb komatmiŋ belen wol henbe, “Doyaŋ Al Kurun, yenbe duliŋ ferde hi gob igiŋ hiyyen,” inamiŋ. ¹³ Goyenbe Yesube Lasarus goyen kamiŋ goke yinyiŋ. Gega komatmiŋbe fudinde ferd ferd niŋ diniŋ hi yen nuramiŋ. ¹⁴ Be, mel gore gwahade nuramiŋ geb, Yesu belen kawan po yinyiŋ. “Lasarusbe kamun. ¹⁵ Goyenbe ne belen yen hitte mata kura forok irmeke kenenbe ne niŋ dufaytiŋ tareŋ irnayiŋ yenbe gogo Lasarus hitte araneŋ ma kumiŋ goke amaneŋ nurhem. Goyenbe hankebe wake yen hitte kuniŋ,” yinyiŋ. ¹⁶ Irkeb komatmiŋ kura Tomas, denem kurabe Didimus gore diŋun hoyan yinyiŋ. “Neŋ manan tumnan kuniŋ. Gogab yeny a tumnan kamtek geb,” yinyiŋ.

¹⁷ Be, Yesu go Betani forok yiriŋ. Irdeb, “Lasarusbe bikkeŋ gote yeren horabok mete bana mete tiyan,” yeke nuryiŋ. ¹⁸ Betani mat Yerusalembe 3 kilomita gwahade po, gisaw wor po moŋ. ¹⁹ Niŋgeb Yuda mar budam belen ire babamya gote kuliŋ kamiŋ goke kuŋ biŋ yurum yirniŋ yen wayamiŋ.

²⁰ Be, Marta go Yesu waŋ hinhin mere momoŋ go nurdeb kuŋ belen tupi tiye yen kuriŋ. Goyenbe Mariabe yare hinhin. ²¹ Be, Marta belen kuŋ Yesu kenenbe, “Doyaŋ Al Kurun, ge gar hinhan manhan kolnebe go ma kamwoŋ. ²² Goyenbe hanke gayen wor det kuran Al Kurun gusunan irkeb gunyen yen nurde hime,” inyiyiŋ. ²³ Irkeb

Yesu belen, “Kolgebe sopte huwaryen,” inyin. ²⁴ Irkeb Marta belen wol henbe, “Nalu funande al kamtin huward huward nalurebe yen manan sopte huwaryen gob nurde hime,” inyin. ²⁵ Irkeb, “Al kamtinde mat huwarnayin, irde Al Kurunya huginen hinayin gote min albe ne gago. Ningeb al kura ne nin dufaymin tarej irtin kamyen gobe sopte huwaryen. ²⁶ Irde al dufaymin ne nin sanin irde Al Kurunya huginen hinayin marbe Al Kurun diliinde al kamtin ma hinayin. Ga ginhem gayen fudinde yen nurde ha?” inyin. ²⁷ Gwaha inkeb Marta belen, “Gwaha, Doyan Al Kurun, gebe fudinde wor po Mesaia, Al Kurun Urmin megen gar wayyen yitin al go goyen yen nurde hime,” inyin. ²⁸ Gwaha inenbe mulgan hen kun haymin Maria mun po hoy irdeb, “Tisabe waya. Irde ge nin gusunan hen hi,” inyin. ²⁹ Irkeb Maria gob aran po huwarde Yesu hitte kurin.

³⁰ Be, Yesu gobe tiyunde ma forok yirin. Martaya mere tiyaryumde gor po hinhin. ³¹ Be, Yuda mar yare gor hen Maria bin yurum irde hinhan mar goyen Maria belen bemel po huwarde kat kuke kenenbe bembare kun esen wet kun hi yenbe gama irde kwamin. ³² Be, Maria gobe kun Yesu hinhinde gor forok yen kenenbe kahan minde katen dokolhon yugulun tenbe, “Doyan Al Kurun, ge gar hinhan manhan gob kolnebe go ma kamwon,” inyin. ³³ Be, Mariaya Yuda mar yen gama irde wayamin morya goyen tumnan esen hike Yesu belen yenenbe Yesu wor binde mat mel goke buninen wor po nurde bin kanduk hirin. ³⁴ Irdeb, “Dare mete tayan?” yinen gusunan

yiryiñ. Irkeb mel gore wol henbe, “Doyañ Al Kurun, wake kuniñ. Irde ga kena,” inamiñ. ³⁵ Be, Yesu go diliñ fimiñ katiñ. ³⁶ Irkeb Yuda mar goreb, “Go kennañ, Lasarus niñ amañeñ wor po nurde hiyen geb gogo esa,” yamiñ. ³⁷ Goyenbe al kura belañ, “Yeñbe al diliñ titmiñ sope irke nañkinuñ. Gega Lasarusbe daniñ ma sope irke gogo kamuñ?” yamiñ.

Lasarus kamtiñde mat isañ hiriñ

³⁸ Be, Yesu go sopte po bunineñ wor po nurdeb bembare kuriñ. Bemba gobe horabok, irdeb hora kurun kura kañ kañ irde yamem goyen tatiñ hinhin. ³⁹ Be, Yesu belañ, “Hora ga teñ siña irnañ,” yinyiñ. Irkeb al kamtiñ gote babam Marta belañ, “Goyenbe, Doyañ Al Kurun, kolne hakwambe bemba bana hike wawun sipte hihi geb hamiñ bulun hihi,” inyiñ. ⁴⁰ Gwaha inkeb, “Dufayge ne niñ tareñ irayinbe Al Kurunen tareñ turunñ yañ goyen kenayiñ ma ginhem?” inyiñ. ⁴¹ Irkeb mel goreb hora kurun goyen teñ siña iramiñ. Irkeb Yesu belañ kotañ kañbe, “Ado, merene nurha goke igiñ wor po nurd gunhem. ⁴² Nebe merene hugineñ nurde hayen goyen nurde himyen. Goyenbe al gar harde hañ gake teñbe gago gineñ hime. Gogab nebe ge belañ nad nerke wamiñ goyen fudinde yeñ nurnayiñ,” yiriñ. ⁴³ Gwaha yeñbe Yesu go uguñ po, “Lasarus, siñare kata,” inyiñ. ⁴⁴ Irkeb al kamtiñ gobe haninya kahanya amil belañ po bili irde kimiñ mala titiñ goyen siñare katiñ. Irkeb Yesu belañ, “Bembare niñ amil go hol irde unenbe tubul tike kwi,” yinyiñ.

Yesu mayke kami yen mere sege iraminj

⁴⁵ Be, Yuda mar budam Maria kinnij yen wayaminj mar goyen Yesu mata tiyyinj goyen kenenbe yen ge dufayminj sanij iraminj.

⁴⁶ Goyenbe kuraminjbe Farisi mar hitte kunjbe Yesu mata tiyyinj goyen momonj yiraminj. ⁴⁷ Irkeb

Al Kurunj dolonj ird ird mata doyanj mar pris buda gote karkuwanjinjya Farisi marya belen mere sege irninj yen Yuda marte doyanj mar hoy yiraminj. Hoy yirke wakeb, “Be, nenbe daha titek? Al gabe mata tinenj turunj yan wor po

forok yirde hi. ⁴⁸ Al gayen tubul titeke gwahade po ten hijen gobe al tumnanj yen ge dufayminj

sanij irninj tahañ. Irkeb Roma gabman belen wanbe nende Al Kurunjen ya balemya alya bereya tumnanj gwamuñ yurnayinj geb,” yaminj.

⁴⁹⁻⁵⁰ Irkeb pris buda gote karkuwanjinj bana gonj kura denjembe Kaiafas goreb tarenj po, “Denbe det kura ma wor po nurde hañ. Nananininjya nen almemya tumnanj bulun hetek gobe iginj monj. Ninjgeb al unjkurenj gare po kamyenj gab kanduk kurunj goyen kentek monj,” yinyinj. Kaiafas gobe Yesu hinhin goyenter pris marte kurunjinj hen meten ten hijen al.

⁵¹ Be, Kaiafas gore mere tiyyinj gobe mali dufayminjde ma mere tiyyinj. Yenbe dama goyenter pris buda gote kurunjinj hen meten ten hinhin geb, Yesu goyen Yuda mar ninj ten kamyenj yenbe gogo mata kame forok yetek goke tagalyinj. ⁵² Irde Yuda mar munj po monj, Al Kurunjen dirnenj wen hoyande hoyande hañ wor yawanj tumnanj gabu yirde unjkurenj po iryenj goke ten kamyenj goyen

wor tagalyiņ. ⁵³ Niņgeb gor matbe mel gobe Yesu daha mat kura mayteke kamyen yen belen niņ nanķenen hinhan.

⁵⁴ Niņgeb Yesube goke teņbe Yuda mar diliņyan ma kuņ hinhin. Gwaha titņeņbe yubul teņ sawsawa naņa bindere tiyuņ kura Efraim inen hanyende komatmiņya kuņbe gor hinhan.

⁵⁵ Be, Yuda marte gabu nalu kuruņ kura Pasoba goyen binde binde heņ hinhin. Irkeb al budam Pasoba nalu ma forok yekeya uliņ wuk yird yird mata titek yeņbe Yerusalem hurkuņ hinhan. ⁵⁶ Irkeb Yuda marte doyan marbe Yesu niņ hugiņeņ nanķenen hinhan. Irdeb yiņgeņ uliņ kadom gusuņeņ gird teņbe, “Dahade nurde haņ? Pasoba gabu nalure gayen ma po wayyen yen nurde haņ?” yamiņ. ⁵⁷ Goyenbe pris buda gote karkuwanmiņya Farisi marya belenbe al momoņ yiramiņ. “Al kura Yesu goyen gor hi yeņ nurdeb waņ momoņ dirkeb kuņ teņ fere titek,” yinamiņ.

12

Maria belen he fimiņ hamiņ kusamuņ goyen Yesu kahaņde wogoryiņ

(Matiyu 26:6-13; Mak 14:3-9)

¹ Be, Pasoba nalu goyen nalu 6 po heņ gab forok yetek hekeb Yesu go Lasarusyen tiyuņ Betani kuņ forok yiriņ. Lasarusbe kamtiņde mat Yesu belen isan hiriņ al go goyen. ² Be, gorbe Yesu niņ teņ biņge kaņbe Marta belen biņge go gale heņ hinhin. Goya goyenbe Lasarusbe biņge niniņ yen gor gabu iramiņ mar goyen biņge nen nen gasuņde keperde hinhin. ³ Be, mel go

gwaha ten hikeyabe Maria beley nat he fimiñ hamiñ kusamuj wor po, irde damumbe hende wor po goyen tawanbe tumñan po Yesu kahanbe wogordeb tonan yuwalñen beley po utma tiyyiñ. Irkeb he fimiñ wok iryiñ gote hamiñ igiñ muñ gore po ya go ep iryiñ.

⁴ Goyenbe Yesuyen komatmiñ kura Yudas Iskariot beley Maria mata tiyyiñ goke igiñ ma nuryiñ. Al gobe kame Yesu goyen asogo haniñde kiryiñ al go goyen. ⁵ Be, al goreb, “Nat he fimiñ gabe al kura dama unñkuren meten ten hora tiyyen go goya tunande. Niñgeb det fimiñ ga damu tikeb gote murunjem ten al buniñen yuntewon,” yiriñ. ⁶ Goyenbe Yudasbe al buniñen goke wor po ma nurde hinhin. Yenbe kawe al geb, gogo gwaha mat mere tiyyiñ. Yenbe Yesuya komatmiñya gote hora doyan irde hiyen al gega, hanñkayen hanñkayen hora go kawemde nene hiyen. ⁷ Be, Yudas go gwaha yekeb Yesu beley wol henbe, “Tubul tinañ. Yen beley hanñka det fimiñ hamiñ igiñ muñ go ten gwaha nira gobe kame mete nird nird ge sam nirnayiñ goke gitik ten ten ge gwaha nira. ⁸ Al buniñenbe denya hugiñen hinayiñ. Goyenpoga nebe denya hugiñen ma hitek geb,” yinyiñ.

⁹ Be, goya goyenbe Yuda mar buda kurun beley Yesu go ya goyenter hi yen nurdeb wayamiñ. Goyenbe Yesu yen ge po mon, Lasarus kamtiñde mat huwaryiñ goyen manañ kinniñ yen wayamiñ. ¹⁰⁻¹¹ Yuda mar budam Lasarus go kenenbe Yesu hitte kuñ dufaymiñ yen ge taren irde hinhan. Niñgeb pris buda gote karkuwanmiñ

belen Lasarus manan mayteke kami yen mere sege iramin.

Mesaia Yerusalem kurin

(Matiyu 21:1-11; Mak 11:1-11; Luk 19:28-40)

¹² Be, ferd fay urkeb al buda kurun Pasoba gabu nalu kurun goke Yerusalem wayamin mar gore Yesube Yerusalem kun hinhin goyen mere momonin nuramin. ¹³ Irdeb patila yuwalnen yufun ten yad kunbe tupi ten wanin yenbe kuware gaha yamin:

“Al Kurun turun irnin ko!

Doyan Al Kurunyen denemde wan hi al gobe Al Kurun belen guram irde sanin iryen!

Israel marte Doyan Al Kurunbe Al Kurun belen guram iryen!” yamin. *Tikin 118:25-26*

¹⁴ Be, Yesu go Al Kurunyen asande katin gwahade po, donki fonen kura kenenbe go hende kipiriyin. Mata tiyyin goke ten asande katinbe gahade:

¹⁵ “Den Saion taunde nin mar, kafura ma henayin.

Doyan Al Kurunjin kurun donki fonen hende wan hi go kennan,” yitin hi. *Sekaraia 9:9*

¹⁶ Goyenbe hanpapyabe mata goyen goke komatmin yagobe bebak ma tiyamin. Goyenbe kame Yesu go Al Kurun hitte mulgan hen hurkun den turun yan tirin kamere gab Yesu mata tiyyin goke Al Kurunyen asande katin hi goyen bebak tiyamin. Irde al buda kurun gore yen ge mata tiyamin go wor gwahade po katin hi goyen go bebak tiyamin.

¹⁷ Be, al buda Yesuya hikeya Lasarus kamyin goyen yen belen yeke horabok metere mat

huwaryiŋ go kenamiŋ mar gore gote mere momoŋ tagalde tukamiŋ. ¹⁸ Irkeb al budam wor po mata tiŋeŋ turnuŋ yaŋ forok iryiŋ goyen nuramiŋ geb, kuŋ tupi tiniŋ yeŋ kwamiŋ. ¹⁹ Niŋgeb go yeneŋbe Farisi mar go yiŋgeŋ uliŋ mere teŋbe, “Ga kennan! Al buda kurunŋ gabe dubul teŋ yeŋ po gama irde pasi hiniŋ tahaŋ geb!” yamiŋ.

Yesube kamyenŋ goke tagalyinŋ

²⁰ Be, Pasoba gabu nalure Al Kurunŋ doloŋ irniŋ yeŋ Yerusalem hurkamiŋ mar bana goŋbe Grik mar manaŋ hinhan. ²¹ Mel gore Galili nana bana niŋ taun kura Betsaida niŋ al Filip hitte wayamiŋ. Waŋbe, “Neŋbe Yesu kinniŋ wor po yeŋ nurde hite,” inamiŋ. ²² Irkeb Filip beŋeŋ Andru hitte kuŋ momoŋ iryiŋ. Irkeb Andruya Filipya tumŋaŋde kuŋ Yesu momoŋ iraryum. ²³ Irkeb Yesu beŋeŋ wol heŋbe, “Ne Al Urmiŋ gayen deŋe turnuŋ yaŋ tetek nalube gago forok yihi. ²⁴ Fudinde wor po diniŋ hime, wit bilmiŋbe megeŋ bana kurkuŋ gabe kawaŋ heŋ igineŋ paya hiyyeŋ. Munanŋ gwaha ma tiyyeŋbe paya ma hiyyeŋ. ²⁵ Al kura yiŋgeŋ ge po nurde hi al gobe Al Kurunya ma hiriryenŋ. Munanŋ al kura megen gar heŋya yiŋgeŋ ge ma nurde Al Kurunŋ niŋ po nurde hi al gobe yeŋya hugiŋeŋ hiriryenŋ. ²⁶ Al kura ne niŋ metenŋ teŋ hime yeŋ nurde hi albe merene po gama irde hiyeŋ. Irdeb ne heŋde gorbe metenŋ alne wor gor hiyeŋ. Adonebe ne niŋ metenŋ teŋ hiyeŋ al goyen turuŋ iryeŋ.

²⁷ “Be, bener kandukŋeŋ wor po nurhem geb, daha yewenŋ? ‘Ado, ulner kanduk forok yewenŋ tiya go faraŋ nurke ma keneŋ,’ inenŋ? Moŋ, nebe

kanduk goyen go po tewen yen wamirin geb. ²⁸ Ado, dengebe turnun yan hewon yen nurde hime,” yirin. Irkeb nan kinde mat al melak kura, “Dennebe bikken turnun yan irmin, irde sopte gwaha iren,” gwahade forok yirin. ²⁹ Irkeb al buda gor hinhan go mere goyen nurdeb, “Daga mere tiya,” yamin. Munan kurabe, “Al Kurunyen miyon belen mere ira,” yamin. ³⁰ Irkeb Yesu belen, “Mere forok yihi gabe den ge ten forok yihi. Ne nin mon geb. ³¹ Be, Al Kurun belen megen nin alya bereya merem yan yirtek nalube han ka gago. Irdeb megen gar nin doyan al Satanbe takira timeke taren min mon hewen tiya. ³² Goyenbe ne kuruse hende nade nisan heke gab alya bereya megen han kurun gayen nigen hitte yawayen,” yinyin. ³³ Gwaha yinyin gobe kame mata dahade mat kamyen goyen yikala yire yen be gogo yinyin. ³⁴ Irkeb al buda gore, “Nenbe Moseyen sabarebe Mesaiabe huginen hiyen yeke nurde hityen. Goyenbe dahade nin geb, ‘Al Urminbe he hende kamyen,’ yen ha? Al Urmin gobe ganun?” yen hitem po gusunun iramin. ³⁵ Irkeb Yesube mel goya sobamde ma hiyen goke maya mere mat wol henbe, “Hulsibe denya ulyande ma hiyen. Nin geb huls hiya gayenter po kun hinayin. Hen ga mon kidoma aw duren tiya geb. Al kura kidoma bana kun hiyen al gobe gor kun hime yen ma po nurdeya kun hiyen. ³⁶ Huls goyen denya hikeyabe yen ge dufaytin taren irnayin. Gogab denbe huls bana hen mata igin ten ten mar henayin,” yinyin. Be, Yesu go meremin pasi irdeb al buda go yubul ten kunbe nennak yen

bana kuriñ.

Yuda marbe Yesu pel irtek po hamiñ

³⁷ Be, Yesube mata tijeñ turñuñ yañ goyen Yuda mar diliñyañ wor po forok yirde hinhin gega, yeñ ge dufaymiñ sañiñ ma irde hinhan.

³⁸ Go teñ hinhan gobe Al Kurunyen mere basañ al Aisaia belen kame gwahade forok yiyen yeñ kayyiñ goyen po forok yeñ hinhan. Merebe gahade:

“Doyañ Al Kurun, mere tagaltekeb ganuñ belen fufinde yeñ nurde hañ? Hubu wor po!

Irdeb ganuñ mar hitte Doyañ Al Kurun belen tareñmiñ goyen yikala yiryen? Hubu wor po!” yitiñ. *Aisaia 53:1*

³⁹ Niñgeb Aisaia belen yitiñ gwahade goyen po, mel gobe dufaymiñ yeñ ge tareñ ma po iramiñ. Mel gote matamiñ goke Aisaia belen mere hoyañ kura gahade kayyiñ:

⁴⁰ “Yeñ belen mel gote diliñbe titmiñ yiryiñ. Irde biñbe pet tiyyiñ.

Niñgeb diliñ gore epte ma nanñkenniñ.

Irde biñ go gereñ ma yeke epte ma bebak tinayiñ.

Irde ne hitte mulgañ ma henayiñ.

Moñ manhan ne hitte mulgañ heke sope yirmewoñ,” yitiñ. *Aisaia*

6:10

⁴¹ Aisaiabe Al Kurun belen Yesu denem turñuñ yañ irtiñ goyen bikkeñ keneñbe yeñ ge gogo tagalyiñ.

⁴² Be, al budam Yesu gwaha mat pel iramiñ gega, doyañ mar budambe yeñ ge dufaymiñ sañiñ

iramiņ. Goyenbe Farisi mar beleņ nurdeb dakira tike gabu yamiņde epte ma kutek yeņ kafura hamiņ. Goke teņbe Yesu niņ dufaymiņ tareņ iramiņ goyen kawan ma tagalamiņ. ⁴³ Mel gobe al beleņ turuņ yird yird niņ po amanēņ nurde hanyen. Irde Al Kuruņ beleņ turuņ yird yird niņ ma nurde hanyen geb, gogo kawan ma tagalamiņ.

⁴⁴ Be, Yesu beleņ kuware gahade tagalyiņ: “Al kura ne niņ dufaymiņ saņiņ iryeņbe ne niņ po ma dufaymiņ tareņ iryeņ. Nad nerke wamiriņ al goke manāņ dufaymiņ saņiņ iryeņ. ⁴⁵ Irde al kura ne ninyeņ al gobe ne po ma ninyeņ. Nad nerke wamiriņ al goyen wor kinyeņ. ⁴⁶ Nebe hulsi melak heņ hi go gwahade goyen melak hewe yeņ megen gar wamiriņ. Gogab al kura ne niņ dufaymiņ tareņ iryeņ gobe kidomare ma hiyeņ.

⁴⁷ “Al kura merene nurde ga biņde ma kerde hiyeņ al gobe ne beleņ merem yaņ ma ireņ. Nebe megen niņ alya bereya gayen merem yaņ yire yeņ ma wamiriņ. Al Kuruņ hitte yumulgaņ tiye yeņ wamiriņ. ⁴⁸ Gega ne harhok nuneņ merene ma nurde haņ mar goyen merem yaņ yiryeņ albe hi. Niņgeb nalu funāņdebe mere tagalde himyen gore wor po merem yaņ yiryeņ. ⁴⁹ Gwaha, nebe nigen dufayner ma mere teņ hime. Adone nad nerke wamiriņ al goreb mere gwahade tiyayiņ, irde gwaha mat yawayiņ goyen nineņ hiyeņ. ⁵⁰ Yeņ beleņ nineņ hiyeņ mere gobe al beleņ gama irdeb yeņya hugiņeņ hinayiņ yeņ nurde hime. Niņgeb mere teņ himyen kuruņ gabe Nanne beleņ gwaha yawayiņ nineņ hiyeņ go muņ po yeņ himyen gogo,” yinyiņ.

13

Yesu beley komatmin yagot kahan halde yunyin

¹ Be, gabu nalu kurun Pasoba go gise gwahade hirin. Irkeb Yesu go megen ga tubul ten Nani hitte kun kun nalumin forok yihi yen nuryin. Yenbe alya bereyamin megen han mar goyen bubulkunne wor po yen nurde yunenbe igin yen ge ten kamen yen nurde hinhin geb, dufaymin goyen yikala yiryin.

² Be, wawunbanare nin binje nene hinhan. Irkeb Ungurabe Saimon Iskariot urmin Yudas beley Yesu asogo haniinde kiryen yen bikken bin tirin. ³ Yesube det kurun gayen doyan yird yird taren Nani beley unti goyen nurde hinhin. Irde yenbe Al Kurun hitte mat watin, irde sopte yen hitte mulgan hiyyen goyen wor nurde hinhin. ⁴ Ningeb binje nen hinhande mat huwardeb ulinhormin hende nin goyen tugu tenbe ulin utma ten tenje nin amil ten mal temdere giti iryin. ⁵ Gwaha ten gab koronde fe wogordeb komatmin yagot kahan halde yunyin. Irdeb amil gore po fe goyen utma ten yunyin.

⁶ Be, gwaha ten kun kunbe Saimon Pita hitte hirin. Irkeb, “Doyan Al Kurun, ge gayenbe kahanne halen ten ha?” inyin. ⁷ Irkeb wol henbe, “Mata tihim gote min bebak ma taha. Goyenbe kamebe bebak tiyayin,” inyin. ⁸ Irkeb Pita beley, “Mon, kahanne epte ma halayin geb,” inyin.

Irkeb Yesu beley wol henbe, “Kahanne ma halenbe epte ma metenne kurun gote iginen tawayin,” inyin. ⁹ Gwaha inkeb Pita go, “Doyan

Al Kurun, gwahade kenem kahaŋne po ma halayin. Hanneya tonanneya manan tumnan halde nunayin,” inyin. ¹⁰ Irkeb wol henbe, “Al fe gimtin gobe ulinde tikin minmon geb, kahan po haltek hi. Gwahade goyen po denbe bikken Al Kurun dilinde wukken han. Goyenbe den tumnan mon geb,” inyin. ¹¹ Al gore asogo haninde niryen yen bikken nurde hinhin geb gogo, “Den tumnanbe wukken han gega, al unkuŋen po gabe gwahade ma hi,” yinyin.

¹² Be, komatmin yagot kahan halde pasi irdeb ulinhormin hende nin tugu titin goyen sopte ten hor irdeb mulgan hen gasunminde kun kipiryin. Irdeb, “Den ge ten mata tihim gate min bebak tahaŋ?” yen gusunan yiryin. ¹³ Irdeb gaha yinyin: “Den belen Tisa ninen hanen, munan kurarebe Doyan Al Kurun ninen hanen. Nebe al gwahade geb, den belen gwaha ninen han gob fudinde. ¹⁴ Ningeb gayenterbe Tisaya Doyan Al Kurunya ninen hanen gare kahaŋin halde dunhem geb, den wor kadom kahan halde gunen ten hinayin. ¹⁵ Nebe mata gwaha ten hinayin yenbe gago dikala dirhem. Ningeb den wor dindikenbe kadtiyen meten al yen nurde kadom faran gurd ten hinayin. ¹⁶ Fudinde wor po dinen hime, meten al kura doyan almin folek ma han, irde mere basan al gobe hulyan iryen al go folek ma han. ¹⁷ Denbe saba gayen bebak tahaŋ. Ningeb saba gayen gama irde mata ten hinayinbe Al Kurun belen guram dirde igin igin diryen,” yinyin.

¹⁸ Be, Yesu go sopte gaha yinyin: “Nebe den

tumṇaṇ goke ma yeṇ hime. Neb basaṇa yirmirin mar gobe nurde yuneṇ hime. Goyenbe mere Al Kurunyen asaṇde katiṇ hi gobe forok po yiyyeṇ. Merebe gahade: ‘Al kura neya tumṇaṇ biṅge nerenṇ al gore tigiri teṇ asogo niryenṇ,’ yitiṇ hi. ¹⁹ Mata goyen forok ma yeṇ hikeya go wa gago dineṇ hime. Gogab mata go forok yekeb nebe Mesaia yeṇ dufaytiṇ saṇiṇ irnayiṇ. ²⁰ Fudinde wor po dineṇ hime, al kura ne beleṇ al yad yermeke kunayiṇ mar gote saba fudinde yeṇ nurnayiṇbe merene nurde haṇ yeṇ nurd yuneṇ. Irdeb al kura merene fudinde yeṇ nurnayiṇbe nad nerke wamiriṇ al gote mere nurde haṇ yeṇ nurd yuneṇ,” yinyiṇ.

²¹ Be, gwaha yineṇ pasi heṇbe biṇde kan-dukṇeṇ wor po nurdeb kawan po, “Fudinde wor po dineṇ hime, kuratiṇ kura beleṇ pel nirde asogo haniṇde nerenṇ tiya,” yinyiṇ. ²² Irkeb komatmiṇ beleṇ kukuwamṇeṇ nurdeb ganuṇ niṇ kura yihi yeṇ yiṅgeṇ uliṇ kadom geneṇ tiyamiṇ. ²³ Be, komatmiṇ kura Yesu beleṇ bubulkuṇne wor po yeṇ nurd unenṇ hiyen al gobe Yesu bindere gegelhek mat bulgaṇ yitiṇ hinhin. ²⁴ Irkeb Saimon Pita beleṇ al go haniṇ beleṇ po tunṇaṇ irdeb, “Ganuṇ niṇ yeṇ ha yeṇ gusuṇaṇ ira,” inyiṇ. ²⁵ Irkeb al gore Yesu hinhin beleṇ ge tawuṇ heṇbe, “Doyaṇ Al Kurunṇ, ganuṇ niṇ yeṇ ha?” inyiṇ. ²⁶ Irkeb Yesu beleṇ wol heṇbe, “Al gobe beret parwek gayen koronṇ bana fe uliṇ irde ga unenṇ al goyen,” inyiṇ. Irdeb beret parwek go teṇ koronṇ bana fe uliṇ irde Saimon Iskariot urmiṇ Yudas unyiṇ. ²⁷ Be, Yudas go beret go tekeb goyare po Satan beleṇ ketal

uryiņ. Irkeb Yesu belen, “Mata kura tiyen ten ha gobe araneņ po tiyayin,” inyiņ. ²⁸ Goyenbe yenya gor bingē nene hinhan mar goreb miņ daniņ Yesu belen Yudas gwaha ina yen bebak ma tiyamiņ. ²⁹ Yudasbe mel gote hora doyaņ irde hinhin al geb, al kurabe Yesu belen Pasoba bingē damu ten ten goke inen hi yen nuramiņ. Kurabe hora ten al bunineņ yunen yunen niņ inen hi yen nuramiņ. ³⁰ Be, Yudas go beret tenbe goyare po kat siņare kurin. Gobe wawuņde tiyyiņ.

Yesu belen saba tareņ gergeņ goyen komatmiņ yunyin

³¹ Be, Yudas go kukeb Yesu belen, “Be, hankabe ne Al Urmiņ gayen deņe turuņ yaņ goyen tetek hihim. Irde ne belen mata tiyen goreb Al Kuruņ deņe turuņ yaņ tiyyen. ³² Niņgeb Al Kuruņ belen ne hitte mat deņe turuņ yaņ tiyyenbe yen belen wor yinģen hitte mat deņe turuņ iryen. Irdeb araņ po iryen. ³³ Diriņne yago, nebe deņya sobamde ma hitek geb. Deņbe ne niņ nanķennayin gega, Yuda mar yinmiņ gwahade goyen po, ne kweņde gorbe deņ epte ma kunayin dineņ hime gago. ³⁴ Nebe saba gergeņ kura gago direņ tihim: kadtiņ ge amaneņ nurd gunen ten hinayin. Ne belen deņ ge amaneņ nurde himyen gwahade goyen po, deņ wor di-tiņ ge kadom amaneņ nurd gunen ten hinayin. ³⁵ Gwahade kadtiņya kadom amaneņ nurd gunen ten hinayinbe al hoyan kuruņ gore denenbe nere komatne yen nurde duneņ hinayin geb,” yinyin.

³⁶ Gwaha yinkeb Pita belen, “Doyaņ Al Kuruņ, gebe dare kwayin?” inen gusuņaņ iryin. Irkeb

Yesu belen wol henbe, “Haŋka wor pobe kwenɗe gor epte ma kwayin. Gega kamebe igin kwayin,” inyin. ³⁷ Irkeb Pita belen, “Doyan Al Kurun, dahade ningeb haŋka gayen epte ma gama giren? Nebe ge nin ten igin kamen,” inyin. ³⁸ Irkeb wol henbe, “Ge gayen fudinde wor po ne nin ten igin kamayin? Fudinde wor po ginhem. Haŋka wawun tatirok mere ma tikeya wawun karwore ne nin yen, ‘Al gob ma nurde unen hime,’ yawayin,” inyin.

14

Yesu belen komatmin sanin yirin

¹ Be, Yesu go sopte po, “Ne dubul ten kwen goke kanduknen ma nurnayin. Al Kurun nin hekken nurde hinayin. Irdeb ne nin wor hekken nurde hinayin. ² Nanner yarebe hen hen gasunbe budam han. Ningeb gor kun gasuntin sope yiren tihim. Gasun go budam mon manhan gwahade ma dinmewon. ³ Kun gasuntin sope yirde ep irdeb mulgan hen wan ne henɗe gor duken. Gogab den manan ne henɗe gor hinayin. ⁴ Denbe ne kwen ten himere gor kun kun belenbe nurde han gogo,” yinyin. ⁵ Irkeb Tomas belen, “Doyan Al Kurun, nenbe gor kwen taha yen ma nurde hite. Ningeb belen gob daha mat nurtek?” inyin. ⁶ Irkeb wol henbe, “Nebe Al Kurun hitte kun kun belen. Irde nebe mere fudinde gote min al, irde Al Kurunya huginen hen hen gote min al wor po. Ningeb ne minmonbe al kura Adone hitte epte ma kunayin. ⁷ Denbe ne gayen kenkela nurde nunen hanen manhan Adone wor nurd

unwoŋ. Goyenbe gayenter matbe ne gayen nurd nunenŋ haŋ geb, Adone wor nurde unenŋ hinayinŋ. Goke teŋ denbe bikken nurd unenŋ haŋ yeŋ nurde hime.” yinyinŋ.

⁸ Irkeb Filip belenŋ, “Doyaŋ Al Kurunŋ, Nanake dikala dira. Dikala dirke kenenbe ep gogo yeŋ nurtek,” inyinŋ. ⁹ Irkeb wol henbe, “Filip, nebe denya ulyande hityen gega, ma po nurd nunenŋ ha? Al kura ne nenenŋ hiyen al gobe Nanne manaŋ kenenŋ hiyen. Niŋgeb dahade geb, ‘Ado dikala dira,’ ninenŋ ha? ¹⁰ Nebe Nanneya hirekeb Nannebe neya har gobe fudinde yeŋ ma nurde ha? Ne belenŋ mere dirde himyen gobe dufayner ma dinenŋ himyen. Metenŋ teŋ himyen kurunŋ gobe Adone, ne hitte hi gote metenŋ geb, yeŋ belenŋ neya henŋ metenminŋ teŋ hiyen. ¹¹ Nebe Nanneya har, irde Nannebe neya har yemeke goke fudinde yeŋ nurnayinŋ. Munanŋ gwaha ma teŋbe mata tinenŋ turunŋ yaŋ wor po forok yirmeke yenenŋ hanŋen goke nurde gab mere teŋ hime gayen fudinde yeŋ nurnayinŋ. ¹² Fudinde wor po dinenŋ hime, al kura ne ninŋ dufayminŋ tarenŋ iryenbe ne belenŋ mata forok yirde himyen goyen yeŋ wor forok yirde hiyenŋ. Irde nebe Nanne hitte kwenŋ geb, al gobe ne belenŋ mata teŋ himyen gote folek wor po teŋ hiyenŋ. ¹³ Irdeb denŋer* det kura ninŋ gusunanŋ hekeb ne belenŋ wol henŋ dunenŋ. Gogab Adonebe Urminŋ ne gayen hitte mat denem turunŋ yaŋ hiyyenŋ. ¹⁴ Denbe det kura ninŋ nurdeb ne denŋer

* **14:13:** “Denŋer” gabe dulinŋ Yesu denŋe urde gusunanŋ ird ird ninŋ ma yeŋ hi. Nenbe Yesuyen alya bereya niŋgeb, yenya awalikde henya gusunanŋ henŋ henŋ ninŋ yeŋ hi.

po gusunañ nurnayin. Irkeb det goke nurnayin goyen dunen.

¹⁵ “Be, denbe ne nin amañen nurnayinbe ne belen mata gwaha gwaha tinañ dinañ hime goyen gama irde ten hinayin. ¹⁶ Ne belen Nanne gusunañ irmekeb Farañ Al hoyañ dunen. Irkeb yenbe denya huginen hinayin. ¹⁷ Yenbe Holi Spirit. Yende merebe fudinde wor po. Gega megen nin alya bereyabe epte ma kennayin, irde ma nurd unen han geb, meremin fudinde yen ma nurnayin. Goyenpoga denbe yena hinayin, irde yenbe den bana hiyen geb, nurd unen hinayin. ¹⁸ Nebe kwen gega, kagew yara ma dubul tiyen. Den hitte sopte mulgan hen wayen. ¹⁹ Hen ga mon megen han mar gare ma nennayin. Goyenbe denbe nennayin. Irde nebe kamen gega, sopte huwardeb hen geb, den wor gwahade po hinayin. ²⁰ Gwaha tiyen nalu goyen wakeb Nanneya har goyen bebak tinayin. Irde denya hite gwahade po, den wor neya han goyen bebak tinayin. ²¹ Al kura sabane nurde gama irde hi al gobe ne nin amañen nurde hi. Irde ne nin amañen nurde hi al gobe Adone belen yen goyen bubulkunne wor po yen nurde unen hi. Irde ne wor yen goyen gwahade po nurde unenbe nebe al gwahade yen nigen ikala ireñ,” yinyin. ²² Irkeb Yudas belen, “Goyenbe, Doyan Al Kurun, dahade geb nen hitte po nebe al gwahade yen dikala dirdeb megen nin marbe gigen ma yikala yirayin?” inyin. Yudas gobe Yudas Iskariot mon, al hoyan po. ²³ Be, Yudas gore gwaha inkeb Yesu belen wol henbe, “Al kura ne nin amañen nurde han marbe sabane

gama irnayıñ. Irkeb Nanne belen bubulkunne wor po yeñ nurd yunyeñ. Irdeb neya Nanneya tumñañ yeñ hitte kuñbe yeñya hitek. ²⁴ Munañ al kura ne niñ amanen ma nurde hañ marbe sabane ma gama irnayıñ. Mere den belen nurde hañ gabe bener niñ moñ, Nanne nad nerke wamirin al gote mere geb.

²⁵ “Mere dirde hime kurun gabe tumñañ henya gago momon dirde hime. ²⁶ Goyenbe kame Faran Al, Holi Spirit goyen Al Kurun belen teñ kerke katen gasunne tiyyen. Irdeb den nurtek mere kurun goyen yeñ belen gab saba dirde hiyen. Irde ne belen det momon dirde himyen kurun goyen wor bebak dirde hiyen. ²⁷ Al biñ kamke igin heñ heñ mata goyen den hitte tubul tihim. Al biñ kamke heñ heñ gobe nigen goyen dunen. Nebe megen niñ mar belen dunen hanyen gwahade ma dunen. Niñgeb kame mata forok yiyyen goke kanduknen ma nurnayin, irde kafura ma henayin. ²⁸ Nebe kwen, irdeb sopte mulgan heñ den hitte wayen yeñ himeke nuran. Niñgeb ne niñ amanen nurde hañ manhan Nanneb ne folek go hitte kwen tihim goke aman hewon. ²⁹ Hanka gago mata go forok ma yeñ hikeya goke dinhem. Gogab mata go forok yeke kenenbe fudinde yeñ dufaytin taren irnayıñ. ³⁰ Megen gar niñ doyan al Satanbe wayen tiya. Niñgeb sobamde ma heñ mere direñ geb. Goyenbe Satanbe saninmindebe epte ma daha wet kura niryen. ³¹ Gega nebe Nannen amanen nurde unen hime geb, yeñ belen gwaha gwaha tiyayin ninyin goyen po tiyen. Gogab al belen ne gayen yenbe al gwahade yeñ

bebak tinayiņ. Be, wake gasuņ ga tubul teņ kuniņ,” yinyiņ.

15

Yesube wain he, irde yende alya bereyabe gote haniņ

¹ Be, Yesu go sopte gaha yinyiņ: “Nebe wain he fudinde wor po. Munañ Nannebe wain meten gote miņ al. ² Yeņbe wain haniņ kura ne hitte mat kutiņ goyen igineņ ma heņ hitiņbe walde yemeyde hiyen. Munañ wain haniņ igineņ heņ hitiņ gobe sopte igineņ kuruņ po ferde hiyen yeņ haniņ sope yirde hiyen. ³ Deņbe saba dirde himyen goreb bikkeņ po he haniņ harañ hitiņ gwahade goyen dirtiņ haņ. ⁴ Niņgeb deņbe neya po hinayiņ. Irkeb ne gayen deņya heņ. He haniņ kura pigiņde basañ ma hitiņ hiyenbe yingeņ epte ma igineņ hiyyeņ. Gwahade goyen po, neya ma hinayiņbe, mata igiņ kura ma forok yirnayiņ.

⁵ “Nebe wain he, irde deņbe gote haniņ. Niņgeb al kura neya hike nebe yeņya heņ al gobe gote igineņ, mata igiņ igiņ budam forok yirde hiyeņ. Munañ neya ma heņ hoyañ muņ po pat yitiņ hiyenbe mata igiņ kura ma po teņ hiyeņ. ⁶ Al kura neya ma hi al gobe he haniņ kura walde temeyke kamtiņ hiyeņ go gwahade hi. He haniņ gwahade gobe yade kakde yemeyke humga kuņ hanyen. ⁷ Munañ deņ gayen neya hinayiņ, irde merene manañ deņ bana hiyenbe det kura niņ nurde gusuņañ henayiņ. Irdeb det gobe yade hinayiņ. ⁸ Gwaha teņbe mata igiņ igiņ kuruņ forok yirde hikeb gore Nanner deņebe turnuņ yaņ

heñ hiyen. Gwaha teñ hinayin gabe al hoyan beñ nere komat yeñ deney hinayin.

⁹ “Be, Nanne beñ ne gayen bubulkuñe wor po yeñ nurde nuneñ hiyen gwahade po, ne wor deñ gayen bubulkuñe wor po yeñ nurde duneñ hime. Niñgeb deñ ge amaney nurde duneñ hime bana goñ heñ mata teñ hinayin. ¹⁰ Nebe Adoner saba gama irde himekeb ne gayen bubulkuñe wor po yeñ nurd nuneñ hiyen bana goñ hime. Gwahade goyen po, deñ beñ wor sabane gama irnayeñbe deñ gayen bubulkuñe wor po yeñ nurde duneñ heñ goyen bana hinayin. ¹¹ Mere ga momoñ dirde hime gabe aman dufayne manañ hime gwahade goyen po, deñ wor gotin yan hinayin, irde aman dufaytin goyen kurun wor po hewoñ yeñ gago momoñ dirde hime. ¹² Sabanebe gahade: ne beñ deñ gayen bubulkuñe wor po yeñ nurd duneñ himyen gwahade goyen po, deñ wor kadin yago nin amaney nurd guney teñ hinayin. ¹³ Niñgeb kadin ge amaney nurd nurd mata fudinde wor pobe kadin ge nurde farañ yurde kamnayin gogo. ¹⁴ Deñbe sabane gama irde hinayeñbe duwanne yago wor po henayin. ¹⁵ Metey albe doyan almin beñ metey daha teñ hi goyen ma nurde hi. Goyenbe deñbe nurde han geb, metey marne ma dineñ. Gwaha dintineñbe duwanne yago dineñ. Nebe Al Kurun beñ saba nirtin kurun goyen momoñ dirde himyen geb, gogo duwanne yago dineñ hime. ¹⁶ Deñ beñ basaña ma niraminiñ. Gwaha nirtineñbe kun igineñ hugineñ hitek mata igin goyen forok yir-nayin yeñ basaña dirmirin. Gwaha teñ henyabe

ne denner det kuraŋ gusuŋaŋ hekeb, Nanne belen iŋi ala po dunyeŋ. ¹⁷ Niŋgeb kadtiŋ ge kadom amanen nurd gunen ten hinayiŋ. Sabanebe gago geb,” yinyiŋ.

Megen niŋ marbe Yesuyen komatmiŋ haram yirde hinayiŋ

¹⁸ Be, Yesu go sopte po gaha yinyiŋ: “Megen niŋ mar belen haram dirkebe, ‘Neŋ gago po ma dirhaŋ. Doyaŋ alniniŋ wa haram iramiŋ go,’ yen nurde hinayiŋ. ¹⁹ Deŋbe megen niŋ mar manhan megen niŋ mar belen awalik iŋi iŋi po dirde hiwoŋ. Gega deŋbe megen niŋ mar bana mat basaŋa dirmiriŋ geb, deŋbe megen niŋ mar moŋ. Goke tenbe megen niŋ mar belen deŋ gayen iŋi ma nurd duneŋ haŋ gogo. ²⁰ Ne belen, ‘Meten albe doyaŋ almiŋ epte ma fole iryen,’ dinmiŋ gobe bitiŋ sir ma yiyyen. Niŋgeb dinmiŋ gwahade po, mel gore ne buluŋ buluŋ nirnayiŋbe deŋ wor buluŋ buluŋ gwahade po dirnayiŋ. Munan mel gore sabane nurde gama irnayiŋbe dende saba niŋ wor gwahade po tinayiŋ. ²¹ Mel gobe nad nerke wamiriŋ al goyen ma nurde unen haŋ geb, ne niŋ iŋi ma nurdeb deŋ manaŋ buluŋ buluŋ dirnayiŋ. ²² Ne belen waŋ saba ma yirmiŋ manhan mata buluŋ miŋmoŋ hiwoŋ. Goyenbe ne waŋ saba yirmiŋ geb, epte ma neŋbe mata buluŋniniŋ miŋmoŋ yetek haŋ. ²³ Al kura buluŋen wor po nurd unen hi al gobe Adone wor buluŋen wor po nurd unen hi. ²⁴ Ne belen mata tiŋen turuŋ yaŋ wor po al kura belen epte ma forok yirtek goyen mel gote diliŋ mar ma forok yirmiŋ manhan mata tiŋen ne belen yirmiŋ go pel iran

gote mata buluŋ miŋyaŋ ma hiwoŋ. Goyenbe mel gobe mata tiŋeŋ goyen yenaŋ gega, neya Adoneya tumŋaŋ buluŋeŋ wor po nurd duneŋ haŋ. ²⁵ Goyenbe mata gwaha teŋ haŋ gobe yende sabare Mose beleŋ, ‘Mel gobe miŋ miŋmoŋ buluŋ nurd nuneŋ haŋ,’ gwahade kayyiŋ goyen go po teŋ haŋ.

²⁶ “Be, Faraŋ durd durd Albe wayyeŋ. Yeŋbe Holi Spirit, meremiŋbe fudinde wor po, irde Adone hitte mat wayyeŋ. Ne beleŋ Al Kuruŋ hitte mat teŋ kermeke waŋbe ne niŋ momoŋ dirde hiyeŋ. ²⁷ Irkeb deŋ wor ne niŋ al momoŋ yirde hinayiŋ. Deŋbe meten miŋ urmiriŋde mat po neya hityen geb, deŋ wor gwaha tinayiŋ,” yinyiŋ.

16

¹ Be, Yesu go sopte gaha yinyiŋ: “Mere dirhem kuruŋ gabe dufaytiŋ ne niŋ tareŋ irtiŋ goyen yubul ma tinayiŋ yeŋbe gago dinhem. ² Be, Yuda mar beleŋ yende gabu yare dakira tike epte ma kunayiŋ. Fudinde, al kurabe Al Kuruŋ niŋ keŋkela meten tihit yeŋbe mudunke kamnayiŋ nalu goyen forok yiyyeŋ. ³ Go mar gobe neya Nanneya ma nurde duneŋ haŋ geb, mata gogo teŋ hinayiŋ. ⁴ Nebe naŋa hakot po momoŋ dirde hime gago. Gogab nalu goyen forok yekeb bikkeŋ hayhay diriŋ go gago forok yeŋ haŋ yeŋ bitiŋ bak yenayiŋ. Haŋkapyabe tumŋaŋ hinhet geb, momoŋ ma dirmiriŋ,” yinyiŋ.

Holi Spirityen meten

⁵ Be, Yesu go sopte gaha yinyiŋ: “Haŋkabe nad nerke wamiriŋ al hitte kweŋ tihim. Goyenbe

den gayen al kura belen, ‘Dare kwen ten ha?’
 yen gusunan ma nirhan. ⁶ Mere dirhem
 garebe buninen dufay belen po dukdawan dira.
⁷ Goyenbe fudinde wor po dinen hime, den gayen
 igin hewon yen nurdeb gago kwen tihim. Ne
 ma kwenbe Farañ Durd Durd Al go den hitte
 ma wayyen. Gega ne kwen gab Farañ Durd
 Durd Al go ten kermeke wayyen. ⁸ Yen belen
 wanbe megen han marbe mata bulun minyan
 goyen yikala yirkeb yenen bebak ten hinayin.
 Irde daminbe Al Kurun dilinde mata huwak, irde
 kame Al Kurun belen merem yan yiryen goke
 wor momon yirde hiyen. ⁹ Mata bulunminbe ne
 nin dufaymin sanin ma irde han gogo yen yikala
 yiryen. ¹⁰ Nebe kameñ, irde huwareñ, irdeb Al
 Kurun hitte hurkumeke al kura ma nennayin.
 Mata kurun go tiyen gote min goyen Farañ Al
 belen yikala yirkeb Al Kurunbe huwak yen be-
 bak tinayin. ¹¹ Irde megen nin marte doyan al
 Satanbe bikken Al Kurun belen merem yan iryin
 geb, kame megen nin alya bereya tumnan merem
 yan yiryen goyen yikala yiryen.

¹² “Be, nebe det budam wor po momon dirtek
 han gega, denbe epte ma merene tumnan be-
 bak tinayin. Ningeb tumnan ma momon diren.
¹³ Goyenbe Holi Spirit, mere fudinde po yen hi
 al gore wan gab mata fudinde ten ten belnen
 kurun go dikala diryen. Yenbe yingen de dufayde
 ma mere tiyyen. Al Kurun belen mere momon
 irke go po momon diryen. Irde mata kame forok
 yetek goyen manan momon diryen. ¹⁴ Merenebe
 yen belen gab basan hen momon dirde hiyen.

Gwaha matbe denne turɗuɗ yaɗ irde hiyen. ¹⁵ Al Kurunyen dawet kurun gobe tumɗan nigen ala. Gwahade geb Holi Spirit belen detne kurun goyen dikala dirde hiyen yihim gogo,” yiniɗ.

Yesu niɗ biɗ misiɗ nurnayiɗ gega, kamebe aman henayiɗ

¹⁶ Be, Yesube sopte po yiriɗ. “Muɗ kura henbe ma nennayiɗ gega, gor mat hitɗen tenbe sopte nennayiɗ,” yiniɗ. ¹⁷ Irkeb komatmiɗ yago kura belen, “Daha yihim yenbe, ‘Muɗ kura henbe ma nennayiɗ gega, gor mat hitɗen tenbe sopte nennayiɗ,’ yen hi? Irde, ‘Nanne hitte kwen tihim,’ yen hi?” yen kadam gusuɗan gird tiyamiɗ. ¹⁸ Mel gobe goke gusuɗan po hen henbe, “Yen belen, ‘Muɗ kura henbe,’ gwaha yen hi gobe daniɗ wor po yen yen hi? Nenbe gwaha yen hi yen bininiɗ bak ma yen hi,” yen kadam gusuɗan gird tiyamiɗ.

¹⁹ Be, Yesu go mere tiyyiɗ goke komatmiɗ yago belen gusuɗan irtek heke yenenbe, “Den gayen ne belen, ‘Muɗ kura henbe ma nennayiɗ gega, gor mat muɗ kura hitɗen tenbe nennayiɗ,’ yihim goke gusuɗan nirniɗ ten haɗ? ²⁰ Fudinde wor po diniɗ hime, megen niɗ marbe ne kamen goke aman hekeb denbe ne niɗ buniɗen nurde esinayiɗ. Fudinde, den belen ne kammeke goke kandukɗen nurnayiɗ. Goyenbe kamebe aman henayiɗ. ²¹ Bere kura diriɗ kawaɗ kertek nalumiɗ forok yekeb diriɗ kawaɗ kere yenbe uliɗ misiɗ kurun katyen. Goyenbe diriɗmiɗ go kawaɗ hekeb goke amanɗen nurdeb uliɗ misiɗ katyen goke biɗ sir yiyyen. ²² Niɗgeb gwahade po den wor haɗka gabe kandukɗen nurde haɗ. Gega

sopte waŋ denmekeb goyenter mat amaŋ wor po heŋ hinayiŋ. Irkeb al kura beləŋ amaŋtiŋ goyen epte ma gorəŋ diryeŋ. ²³ Goyenterbe det kura niŋ ne ma gusuŋaŋ nirnayiŋ. Fudinde wor po diŋeŋ hime, deŋner det kura niŋ Nanne gusuŋaŋ irnayiŋ kuruŋ gobe dunyeŋ. ²⁴ Meheŋde ne gama niraŋiŋde mat waŋ waŋ haŋkabe ne deŋner det kura niŋ ma gusuŋaŋ irde haŋyeŋ. Goyenbe haŋka matbe ne deŋner gusuŋaŋ irde hinayiŋ. Irkeb det niŋ gusuŋaŋ irde hinayiŋ kuruŋ goyen duneŋ hiyeŋ. Irkeb goke amaŋeŋ wor po nurde hinayiŋ.

²⁵ “Nebe maya mere mat mere dirde himyeŋ. Goyenbe nalu kura forok yekeb sopte ma maya mere mat mere dirde heŋ. Nanneŋbe kawan po mere dirde heŋ. ²⁶⁻²⁷ Al Kuruŋbe deŋ gayen bubulkuŋne wor po yeŋ nurde duneŋ hi. Niŋgeb go nalurebe ne deŋner dindikeŋ gusuŋaŋ irde hinayiŋ. Ne beləŋ po deŋ ge teŋ Nanne gusuŋaŋ ireŋ ma diŋeŋ hime. Deŋbe ne niŋ amaŋeŋ nurde haŋyeŋ, irdeb nebe Al Kuruŋ hitte mat wamiriŋ goyen fudinde yeŋ nurde haŋyeŋ geb, Adone beləŋ deŋ gayen bubulkuŋne wor po yeŋ nurd duneŋ hi geb, gago diŋeŋ hime. ²⁸ Nebe Adone hitte mat megeŋ gar wamiriŋ. Irdeb haŋka gab megeŋ ga tubul teŋ Nanne hitte mulgaŋ heweŋ tihim,” yinyiŋ.

²⁹ Irkeb komatmiŋ beləŋbe, “Be, mere dirha gabe ufurkuŋ mat ma dirde mere keŋkelak po dirha. ³⁰ Gebe det kuruŋ ga nurde ha geb, al kura beləŋ dufay guntek moŋ yeŋ genhet. Niŋgeb gebe Al Kuruŋ hitte mat wayariŋ goyen fudinde

yeŋ nurde hite,” inamiŋ. ³¹ Irkeb Yesu belen wol heŋbe, “Be, haŋka gab dufaytiŋ tareŋ irhet yahaŋ. Gega keŋkela heŋ ga hinayiŋ! ³² Deŋ gayen burgagaw kertek nalu forok yeweŋ tiya geb. Go nalu gobe gago bikkeŋ forok yihi. Irkeb nubul teŋ burgagaw kerde tiyuŋtiŋyaŋ tiyuŋtiŋyaŋ kunayiŋ. Goyenbe nebe nunkureŋ ma hime, Nanneya tumŋaŋ har. ³³ Mere gabe neya heŋ bitiŋ kamke igiŋ hinayiŋ yeŋbe gago momoŋ dirhem. Megen garbe kanduk yeneŋ hinayiŋ. Goyenbe ne belen megen niŋ tareŋ go fole irmiŋ geb, kanduk goke yul ma yenayiŋ, saŋiŋ po heŋ hinayiŋ,” yinyiŋ.

17

Yesu belen komatmiŋ ge teŋ Al Kurun gusuŋaŋ iryiŋ

¹ Be, Yesu go gwaha yinenbe kotaŋ kaŋ Al Kurun gaha inyiŋ:

“Ado, nalube gago forok yihi. Urge denem turŋuŋ yaŋ goyen kawan irayiŋ. Gogab ne Urge gare wor denge turŋuŋ yaŋ goyen kawan ireŋ.

² Ge belen megen niŋ alya bereya kurun gayen doyaŋ yird yird tareŋ gobe ne nunariŋ. Gogab alya bereya ne nunariŋ goyen geya hugiŋeŋ heŋ heŋ goyen yuneŋ. ³ Geya hugiŋ heŋ heŋ gote belenbe gahade: al belen Al Kurun fudindebe ge gunkureŋ po ha yeŋ nurd guneŋ haŋ, irde ne Yesu Kristu gayen ge belen nad nerke wamiŋ yeŋ nurd nuneŋ haŋ gobe geya hugiŋeŋ heŋ heŋ gote belen. ⁴ Nebe megen gar meten nunariŋ gobe pasi irmiŋ. Gwaha matbe

sañiñge turñuñ yañ goyen al yikala yirmin.
⁵ Niñgeb, Ado, hañkabe ge hitte kweñ tihim geb, megen ga ma forok yiriñya geya henya sañiñge turñuñ yañ hinhem gwahade goyen po nirayin.

⁶ “Be, nebe megen niñ mar hitte mat alya bereya basiña yirde nunarin mar goyen hitte gebe al gwahade yeñ kawan po yikala yirde himyen. Mel gobe gere. Ge belej ne nunkeb merege momoñ yirmeke nurdeb gama irde hanjen. ⁷ Gayenterbe det kurun ge belej nunarin gobe ge hitte mat po watin yeñ nurde han. ⁸ Ge belej mere gwahade yinayin ninarin goyen yinmekeb fudinde yeñ nurde han. Irdeb nebe ge hitte mat wamirin gobe fudinde wor po yeñ nurde han. Mel gabe ge belej nad nerke wamirin goyen wor fudinde yeñ nurde han.

⁹ “Nebe mel gayen farañ yurayin yeñ gusuñan girde hime. Megen niñ mar goke ma gusuñan girde hime. Ge belej ne nunarin mar gobe gere niñgeb, yeñ ge po teñ gusuñan girde hime. ¹⁰ Nere alya bereya kurun gobe gere, irde gere alya bereya kurun go wor nere. Niñgeb mel gare denje turñuñ yañ wor po goyen kawan irde hanjen. ¹¹ Nebe megen gar ma heñ tihim, ge hitte hurken. Goyenbe mel gabe megen gar hinayin. Ado, gebe al wukken wor po, mata bulungem moñ. Gebe tareñge yañ, irde tareñge goyen ne nunarin. Niñgeb sañinger mel ga doyañ yirde hike al bulun belej epte ma bulun yirnayin. Gogab geya neya unken har gwahade goyen po, yeñ wor awalikde po hinayin. ¹² Neb mel gaya tumñan

henyabe tarenj nunarij gore po doyanj yirde petpet yirde himekeb iginj hinhan. Irdeb al kura ma timiyminj. Goyenpoga al kura bikkenj gwaha tiyyen yenj asanger katiñ goyen fudinde forok yenj yenj ge tenbe al unjkurenj po ga mabok hiyunj.

¹³ “Be, gabe ge hitte hurkutek henj hime. Goyenbe amanj henj himyen gwahade po mel gayen wor amanj henja hiwonj yenj mere kurunj gago girhem. ¹⁴ Mel gabe merege momonj yirmeke gama irde hanjen. Irkeb megen ninj mar belenj haram yirde hanjen. Gobe neb megen ninj al monj gwahade goyen po, yenj wor megen ninj al monj geb, gogo haram yirde hanjen. ¹⁵ Goyenbe mel gayen megen gar mat yade sinja yirke kanduk kura ma yenenj hinayinj yenj ma ginenj hime. Gwaha titnenbe al bulunj belenj bulunj yird yird ninj pet pet yirde hayinj yenj gusunanj girde hime. ¹⁶ Nebe megen ninj monj gwahade goyen po, mel gayen wor megen ninj mar monj. ¹⁷ Meregebe fudinde wor po. Ninjgeb mereger mel ga saba yirke delger wukkenj henayinj. ¹⁸ Ge belenj nad nerke megen gar wamirinj gwahade goyen po, ne belenj wor mel gayen yad yermeke megen ninj alya bereya hitte kunayinj. ¹⁹ Nebe mel gayen mananj gere kudinjenj wor po henayinj yenj nurdeb yenj ge ten nigenj gayen wa gunenbe gigen kudinjenj wor po hitinj hime.

²⁰ “Be, gusunanj girde hime gabe mel gake po monj. Kame mel gare mere tagalke mereminj nurde ne ninj dufayminj tarenj irnayinj mar goke

wor gusunəŋ girde hime. ²¹ Gogab, Ado, gebe neya hirekeb ne wor geya har gwahade goyen po, mel gayen wor gwahade po heŋ awalikde hinayiŋ. Irdeb mel gabe deyyat awalik bana hiwoŋ yeŋ gusunəŋ girde hime. Irkeb ge beləŋ nad nerke wamiriŋ goyen megen niŋ mar beləŋ fudinde yeŋ nurnayiŋ. ²² Ge beləŋ deŋne turŋuŋ yaŋ iran gwahade po, ne wor mel ga gwaha yirhem. Gogab deyyabe unkuŋeŋ har gwahade goyen po, yeŋ wor gwahade po heŋ awalikde hinayiŋ. ²³ Mel gore fudinde wor po awalikde hiwoŋ yeŋ nurdeb gebe neya hireŋ, irkeb nebe yeŋya hitek. Gogab al hoyəŋ gore ge beləŋ nad nerke wamiriŋ yeŋ nurnayiŋ. Irde ge beləŋ ne niŋ amanəŋ nurde ha gwahade goyen po, mel gayen wor amanəŋ nurde yunəŋ ha goyen megen niŋ alya bereya beləŋ nurnayiŋ.

²⁴ “Ado, ge beləŋ al ne niŋ nunariŋ mar gobe ne heŋ gasuŋde kuŋ gor hiwoŋ yeŋ nurde hime. Irdeb megen ga ma forok yekeya ne gayen bubulkuŋe wor po yeŋ nurd nuneŋbe deŋne turŋuŋ yaŋ irariŋ goyen mel gare kenwoŋ yeŋ nurde hime. ²⁵ Ado, gebe Al Huwak wor po. Megen niŋ marbe ma nurd gunəŋ haŋ. Goyenbe nebe nurde gunəŋ hime. Irde neya haŋ mar gayen wor ge beləŋ nad nerke wamiriŋ goyen fudinde yeŋ nurde haŋ. ²⁶ Ne beləŋ gebe al gwahade yeŋ mel gar haŋ gayen yikala yirde himyen. Irde kame wor gwahade po yikala yirde heŋ. Gogab ge beləŋ bubulkuŋe wor po yeŋ nurd nuneŋ hayen gwahade po, yeŋ wor gwahade po nurd yunəŋ

hayin. Irke nigen gayen wor yenya hitek,”
inyin.

18

Yesu asogo haniṅde kiryin

(Matiyu 26:47-56; Mak 14:43-50; Luk 22:47-53)

¹ Be, Yesu go Al Kurun mere iryin goyen pasi henbe komatmin yagoya Pasoba binḡe nene hinhan gasun go tubul ten kwamin. Kun nanḡa dukun kura Kidron inen hanḡen goyen fole irde kurhan kwamin. Sina kurhan gonbe olip he dugu kura hiyen geb, Yesuya komatminya go gor kwamin.

² Be, Yesu asogo haniṅde kiryen al Yudas gobe Yesuya komatmin yagoya hanḡayen hanḡayen gor gabu irde hanḡen goyen nurde hiyen geb, Yesube gor hi yen nuryin. ³ Niḡeb Yudas go Roma nin fulenḡa marya Al Kurun dolon ird ird mata doyan mar pris buda gote karkuwanminya Farisi marya belen hulyan yiramin mar goyen yade Yesu hinhide gor wayyin. Mel gobe hulsiya fulenḡare nin detya yade wayamin.

⁴ Be, Yesu go ulinḡe mata gwahade forok yewen tiya yen nurde hinhin geb kunbe, “Ganun nin wor po nurde wayhan?” yinen gusunḡan yiryin.

⁵ Irkeb mel gore, “Nasaret nin al Yesu,” inamin. Irkeb wol henbe, “Al gobe ne gago,” yinyin. Yesu asogo haniṅde kiryin al Yudas gobe go mar goya hinhan. ⁶ Be, Yesu belen, “Al gobe ne gago,” yinkeb mel gobe tulfut yenbe harhok mat mulḡan hen meḡen katamin. ⁷ Irkeb sopte gusunḡan yirdeb, “Ganun nin wor po nurde wayhan?” yinyin. Gwaha yinkeb mel goreb, “Nasaret nin

al Yesu,” inamiñ. ⁸ Irkeb wol henbe, “Al goyenbe ne gago dinhem. Ne niñ nankenen han kenem al neya han gabe yubul tike kunan,” yiniñ. ⁹ Mere tiyyiñ gobe han kanya Galili hinhinyabe, “Nebe al kura ge beley nuntiñ goyen kura ma pel irmiñ,” yiriñ goyen gogo forok yiriñ.

¹⁰ Be, goya goyenbe Pitabe fulenare niñ bidila dirnen miñyan geb, bidilamiñ go marde tenbe pris buda gote kurunminde meten al kura gote kirmin yase sapa iryiñ. Meten al gote denembe Malkus. ¹¹ Be, Pita go gwaha tikeb Yesu beley, “Bidilage go fokmiñ bana hawa! Gebe ne gayen Adone beley kanduk tawayiñ ninyiñ goyeniñ ma tiyyen yen nurde ha? Moñ, tewen geb,” inyiñ.

Yesube pris buda gote kurunmiñ Anas hitte tukamiñ

¹² Be, Roma niñ fulena marya gote doyan alyabe* Yuda marte doyan mar beley hulyan yirke wayamiñ mar beley Yesu tamiñ. Irdeb haniñ fere tenbe ¹³ Anas hitte wa tukamiñ. Anasbe Kaiafas tenak. Irde Kaiafasbe goyen damare gobe yen beley pris buda gote kurunmiñ hen meten ten hinhin. ¹⁴ Kaiafas goreb han kanya, “Nananiniñya nen almemya tumñan bulun hetek gobe igiñ moñ. Niñgeb al un kuren gare po kamyen gab kanduk kurun goyen ma kentek,” yiniñ al go goyen.

*Pita beley han kanya Yesu niñ helwan hiriñ
(Matiyu 26:69-70; Mak 14:66-68; Luk 22:55-57)*

* **18:12:** Roma niñ fulena marte doyan al gayenbe fulena mar 1,000 gote doyan al.

15 Be, Saimon Pitaya Yesuyen komatmin hoyanja kura goyen Yesu fere tenbe ten kwamin goyen gama iraryum. Komatmin kura gobe pris buda gote kurunmin belen nurd unen hiyen geb, al gobe pris buda gote kurunminde ya kurun koya milgu irtin bana gon sawsawa al gabu irde hanyende gor Yesu ten hurkukeb yen wor kame gama yirde hurkurin. 16 Be, Pitabe ya go milgu irtin koya gote yamere gor huwarde hinhin. Irkeb kadom, pris buda gote kurunmin belen nurd unen hiyen al goreb mulgan hen katenbe yamere gor meten ten hinhin bere goyen mere irdeb Pita go ten koya binde hurkurin. 17 Be, Pita go hurkun hikeb yamere hinhin bere gore, “Yesu inen hanyen al gote komatmin kurabe ge gago?” inen gusunan iryin. Irkeb Pita belen wol henbe, “Mon, ne mon,” inyin.

18 Be, nana menek wor po hirin geb, ya goyenter nin meten marya Al Kurunyen ya balem doyan marya go ulin uka yirnin yen kak kawaldebe goyen kalyan kerde huwarde hinhan. Irkeb Pita manan yenya gor huwarde kak katen hinhin.

Pris buda gote kurunmin belen Yesu gusunan iryin

(Matiyu 26:59-66; Mak 14:55-64; Luk 22:66-71)

19 Be, mel go gwaha ten hikeyabe pris buda gote kurunmin belen Yesu go komatminya sabaminya nin gusunan iryin. 20 Irkeb Yesu belen wol henbe, “Nebe megen nin alya bereyabe kawan po mere yirde hinhem. Nebe Yuda marte gabu yayan, irde kurabe Al Kurunyen ya balem bana gor saba yirde hinhem. Yuda mar dare gabu

irde hanjende goyañ hugiñeñ kuñ kawan po saba yirde hinhem. ²¹ Gega daniñ gusunañ nirde ha? Merene nurde hinhan mar hitte kuñ gusunañ yirayin. Yeñ gab mere teñ hinhem goyen nurde hanj geb,” yinyin.

²² Be, Yesu go gwaha yinkeb Al Kurunjen ya balem doyañ al kura yeñ binde hinhin goreb kimiñde señ uryin. Irdeb, “Pris buda gote kurunmin gayen gwaha mat ma mere irde hanjen gega, daha inhabe gago?” inyin. ²³ Irkeb wol heñbe, “Mere bulun kura tihim kenem mere damiñbe bulun goyen momon nira. Gega mere tihim gayen fudinde tihim kenem daniñ mununha?” inyin.

²⁴ Be, Anas belen Yesu go haniñ fere titiñde gwahade po pris buda gote kurunmin hoyañ kura Kaiafas hitte wor teñ kunañ yinke teñ kwamin.

Pita go sopte Yesu niñ helwan hiriñ

(Matiyu 26:71-75; Mak 14:69-72; Luk 22:58-62)

²⁵ Be, Saimon Pita go huwarde kak katen hikeyab al kura belen, “Al gote komatmin kurabe ge gago?” inen gusunañ iramin. Irkeb Pita go wol heñbe, “Mon, ne mon geb,” inen helwan hiriñ. ²⁶ Irkeb pris buda gote kurunmin gote meten al kura, Pita belen kirmin sapa iryin al gote kadam goreb, “Gebe Olip dugure gor yenya hike genhem,” inyin. ²⁷ Gwaha inkeb Pita go teban helwan hiriñ. Irkeb goya goyen po tatirok mere tiyyin.

Yesube Pailat diliñ mar huwaryin

(Matiyu 27:1-2,11-31; Mak 15:1-20; Luk 23:1-5,13-25)

28 Be, Yuda marte doyan mar belen Yesu ten Kaiafasyen yare mat Roma gabman al Yuda mar doyan yirde hiyen al gote ya kurunde tukamin. Goya goyabe nana fay urde wuk yirin. Irkeb Yuda mar go, “Monjo al min hoyande yare kunbe Al Kurun dilinde tikin minyan hetek,” yen yingende saba gama irnin yenbe Roma gabman al gote ya binde ma hurkamin. Gobe Pasoba bingene nen nen nalu kurun goyen netek yen nurde tiyamin. 29 Ningeb Pailat yingen sinare katenbe, “Da misinde al ga merem yan irnin yen tawayhan?” yinen gusunan yirinin. 30 Irkeb al buda gore wol henbe, “Al gayenbe mata bulun kura ma tiyun manhan ge hitte gaha ma tawatewon,” inamin. 31 Irkeb wol henbe, “Dindiken tukurun matatinde ga merere kerna,” yinin. Irkeb mel gore, “Goyenbe nenbe al maymay sanjninin minjon,” yamin. 32 Mata gobe Yesu belen gwaha mat kamen yen bikken mere tiyinin goyen go fudinde hen hen nin gogo tiyamin.

33 Be, Pailat go mulgan hen yamin kurunde hurkunbe Yesu hoy irinin. Irke hurkukeb gusunan irinin. “Ge gayen Yuda marte doyan al kurun?” ininin. 34 Irkeb Yesu belen, “Mere taha gobe dufayger po forok yihi ma al hoyan belen momon giran?” ininin. 35 Irkeb Pailat belen wol henbe, “Nebe Yuda mar al mon. Ningeb daha mat nuren? Merere girnin yen gawayhan marbe gigen al goya pris buda gote karkuwanminya gore po gawayhan. Ningeb gebe daha wor po tiyan?” ininin. 36 Gwaha inkeb, “Ne belen alya bereya doyan yirtek gobe megen gar nin mon. Megen

gar niŋ manhan Yuda marte doyaŋ mar beleŋ nad fere tiniŋ yeŋ wakeb metenŋ marne beleŋ ne basaŋa fulenŋa tiwoŋ. Goyenpoga gwahade moŋ geb, gogo gwaha ma tahaŋ,” inyiŋ. ³⁷ Irkeb Pailat beleŋ, “Be, gwahade geb, gebe doyaŋ al kurunŋ!” inyiŋ. Irkeb wol heŋbe, “Doyaŋ al kurunŋ ninha gobe fudinde ninha. Fudinde, nebe miŋ goyen goke wor po megen gar wamiriŋ. Irde mere fudinde goyen tagaleŋ yeŋ wamiriŋ. Niŋgeb al kura mere fudinde niŋ amaneŋ nurde haŋ marbe tumŋaŋ merene nurde haŋ,” inyiŋ. ³⁸ Irkeb Pailat beleŋ, “Mere fudinde gobe da?” inenŋ gusuŋaŋ iryiŋ. Gwaha inenŋbe Yuda mar hitte siŋare sopte kateŋbe, “Nebe al ga gwaha mat kura mere uliŋde irtek yeŋ ma kenhem. ³⁹ Goyenbe dende matarebe Pasoba gabu nalu kurunŋdeb ne beleŋ mata buluŋ mar koyare hanŋyen goyen unŋkurenŋ kura teŋ siŋa irde duneŋ himyen. Niŋgeb, ‘Yuda marte doyaŋ al kurunŋ’ inenŋ hanŋyen al gayen tubul timeke siŋare kuyeŋ yeŋ nurde haŋ?” yinyiŋ. ⁴⁰ Irkeb al buda kurunŋ go tareŋ po, “Moŋ, yeŋ moŋ! Neŋbe Barabas dunayiŋ,” inamiŋ. Barabasbe Roma gabman asogo irde hiyen goke teŋ koyare keramiŋ hinhin.

19

¹ Be, mel gore gwaha yekeb Pailat go Yesu go teŋ usulak tinaŋ yeŋ fulenŋa marmiŋ yinke usulak tiyamiŋ. ² Irdeb doyaŋ al kurunŋyen tonanŋ umŋa irhet yeŋ kaŋ hirwanenŋ yaŋ kura goyen teŋ tukuli teŋbe tonanŋde keramiŋ. Irdeb doyaŋ al kurunŋyen amil umŋam bukkenŋya digulakya suluk irke bukkenŋ yara hitiŋ goyen tawaŋ hor

irde unaminj. ³ Irdeb Yesu hitte kunj, “Gebe Yuda marte doyanj al kurunj. Huginjen hayinj!” inen tebanj irde giwgiw irde hinhan. Irdeb kiminje wolserenj uraminj.

⁴ Be, Pailat go sopte sinjare katenbe Yuda mar goyen, “Mel, nebe mere minj goke kura al gayen merem yanj irtek yenj ma nurdeb gago denj hitte taktehem,” yinyinj. ⁵ Irdeb Yesu go doyanj al kurunj umnja irtinj yara irhet yenjbe amil umnjam bukkenjya digulakya suluk yirke bukkenj yara hitinj kura hor irde unenj, kanj hirwanenjan yanj tukuli tenj tonande kirtinje po sinjare katenj hike kenenjbe, “Al gobe gago,” yinyinj.

⁶ Be, pris buda gote karkuwanminjya Al Kurunjen ya balem doyanj marya belenj Yesu go kenenjbe, “Kuruse hende mayke kami! Kuruse hende mayke kami!” yenj hekhok tiyaminj. Irkeb Pailat belenj wol henjbe, “Nebe mere minj goke kura merem yanj irtek ma kenhem geb, dindikenj ga tukunj kuruse hende maynayanj,” yinyinj. ⁷ Irkeb Yuda mar gore wol henjbe, “Al gore yinjenj ge yenj, ‘Nebe Al Kurunj Urminj,’ yenj hiyen geb, nende sabarebe al gwahade gobe kamyenj,” inaminj.

⁸ Be, Pailat go gwaha yeke nurdeb kafura wor po hirinj. ⁹ Irdeb ya binde sopte mulganj henj hurkunjbe, “Gebe dare ninj?” inenj gusunjanj iryinj. Goyenbe Yesube wol ma hirinj. ¹⁰ Irkeb Pailat belenj, “Mere nirtek ma gira? Kuruse hende mayke kami yewenjanj gobe gwaha girnayanj. Munanj tubul tike kwi yewenjanj go wor gwahade po girnayanjanj goyen go ma nurde ha?” inyinj. ¹¹ Irkeb Yesu

belen wol henbe, “Al Kurun belen ge goyen doyan nird nird sanin goyen ma guntin manhan ge belen gaha ma doyan nirwon. Ningeb ne nade hanger nera al gote mata bulunbe gere folek geb,” inyin.

¹² Be, mere go nurdeb Pailatbe Yesu go daha mat kura tubul timeke kwi yen nuryin gega, Yuda mar gob hewhow po ten, “Al kura al gayen tubul tike kuyenbe al gobe Roma gabman doyan al kurun Sisaryen kadom mon, asogom geb,” inamin.

¹³ Gwaha yeke Pailat go nurdeb Yesu go sinare taktenbe ya kurun gote koya bana sawsawa mere nurd nurd gasun kura “Belen Hora Po Irtin” inen hanyende gor kipiryin. Gasun gobe Hiburu mere matbe Gabata. ¹⁴ Be, nalu gobe Pasoba binje gitik ten ten nalu, irde nanabe bankahal gwahade hewen tiyyin. Munan fay urkeb Sabat nalu heke Pasoba binje netek hiyyen. Be, Pailat belen Yuda mar goyen, “Doyan al kuruntinbe gago,” yinyin.

¹⁵ Goyenbe go mar goreb, “Mayke kami! Mayke kami! Kuruse hende mayke kami!” inen hewhow tiyamin. Irkeb Pailat belen, “Doyan al kuruntin gayen ne belen kuruse hende maymeke kami yen nurde han?” yinen gusunan yiryin. Irkeb pris buda gote karkuwanmin belen wol henbe, “Nenbe doyan al kuruntinin hoyan kura ma hi. Nendebe Sisar unjuren po hi,” inamin.

¹⁶ Be, Pailat go gwaha kura irtek minmon hekeb bada hen kuruse hende mayke kami yen mel goke pel iryin. Irkeb fulen mar belen Yesu tamin.

*Yesu kuruse hende kamyin
(Matiyu 27:32-44; Mak 15:21-32; Luk 23:26-43)*

17 Be, Yesu go kuruse go tenbe naŋa deŋe kura Al Tonan Kinjiniŋde gor kuriŋ. Deŋe gobe Hiburu mere matbe Golgota. 18 Gorbe Yesu go kuruse hende mayamiŋ. Yenyaŋbe al irawa hoyan kura goyen wor yinŋenŋe yinŋenŋe kuruse heren gasa yirdeb kurabe Yesuyen kuruse yase belen kerde kurabe tapa belen keramiŋ. Yesu yinŋenbe kahalte keramiŋ.

19 Be, Pailat belen mere kura kaŋbe kuruse hende Yesu tonan belen kernaŋ yinke keramiŋ. Merebe gahade:

NASARET NIŊ AL YESU. YUDA MARTE DOYAN
AL KURUŊ.

20 Be, Yesu kuruse hende mayamiŋ gasuŋ gobe Yerusalem bindere hinhin. Niŋgeb Yuda mar budam mere go kenamiŋ. Mere gobe Hiburu mere, Latin mereyabe Grik mereya mat kayamiŋ.

21 Irkeb pris buda gote karkuwanmiŋ belen mere katiŋ goke igiŋ ma nurdeb Pailat goyen, “Yuda marte doyan al kuruŋ ma kayayiŋ. ‘Al garebe yinŋen ge yeŋ ‘Nebe Yuda marte doyan al kuruŋ,’ yeŋ hi,’ gwahade kayayiŋ,” inamiŋ. 22 Goyenbe Pailat belen wol henbe, “Mere kayhem gobe gwahade po hiyeŋ,” yinyiŋ.

23 Be, fulenŋa mar go Yesu ten kuruse hende kerdebe uliŋ umŋamiŋ yade al sipte niŋ gale henbe nende gigen yawaramiŋ. Irdeb uliŋhormiŋ bande niŋ gobe tubul tiyamiŋ. Uliŋhormiŋ gobe sobam, biŋiŋde mat kurkuŋbe kahan patare goyenbe gada irtiŋ moŋ. Amil unkuŋen po ten uliŋhor goyen irtiŋ. 24 Be, fulenŋa mar gob uliŋhormiŋ goke yinŋen uliŋ, “Ga goya erek ma

irtek. Ganuñ beleñ tiyyeñ yeñ nende matare tilin tanartek,” yamiñ. Mata gobe Al Kurunyen asañde mata gwahade forok yiyyeñ yeñ katiñ gwahade po forok yiriñ. Merebe gahade:

“Mel gore ulne umña yingey uliñ pota yirdeb uliñhornenbe tilin tanaramiñ,” yitiñ hi.
Tikiñ 22:18

Niñgeb yitiñ gwahade po fulenña mar beleñ mata gogo tiyamiñ.

²⁵ Be, kuruse hinhin bindere gorbe Yesu miliñ, miliñde haymiñ Klopas berem Mariayabe Makdala niñ Maria gore gor huwarde hinhan. ²⁶ Irkeb Yesu go miliñ gor kinyiñ. Irde komatmiñ kura bubulkunne wor po yeñ nurde uney hinhin al go bindere gor huwarde hike kinyiñ. Irdeb miliñ goyen inyiñ. “Bere, al gabe urge,” inyiñ. ²⁷ Irdeb komatmiñ gobe, “Gabe momke,” inyiñ. Be, gor mat hinhin kurun gobe komatmiñ gore Yesu miliñ go teñ yamiñde tukun doyañ irde hinhin.

Yesu kamyiñ

(Matiyu 27:45-56; Mak 15:33-41; Luk 23:44-49)

²⁸ Be, komatmiñ inyiñ kamereb metenmiñ kurun gob pasi irhem yeñ nurdeb Al Kurunyen asañde mere katiñ goyen fudinde forok yiyyeñ goke teñbe, “Fe niñ nira,” yiriñ. ²⁹ Irkeb gorbe wain fimiñ mukkuweñ wor po hitiñ hinhin geb, mel gore amil parwek kura teñ wain bana goñ fakamde hisop he kutum murunde bili irdeb isañ heñ Yesu dinonñde kiryiñ. ³⁰ Irkeb Yesu go wain fimiñ go ninam urdeb, “Meteneb pasi irhem,” yiriñ. Be, mere go muñ po yeñbe urgun kañbe kamyiñ.

³¹ Be, go nalu gobe Pasoba binje gitik ten ten nalu. Munan fay urkeb Sabat nalu heke Pasoba binje netek hiyen. Ninjeb Yuda mar go Sabat nalure al kuruse hende po hinayinbe igin mon yen nuramin. Irdeb Pailat gusunon irdeb, “Kahan yufun tenbe al hakwa go yaran tini,” yamin. ³² Irkeb Pailat go fulenon marmin yinke Yesu ketalde kuruse hende hinhin al kura go hitte wa kunbe kahan yufun tiyamin. Irde gab kura wor gwahade po iramin. ³³ Goyenbe wan Yesu hitte hamin gega, bikken kamtin kenenbe kahan ma yufun tiyamin. ³⁴ Gwaha irtinenbe fulenon al kura beken hakde dari malare fakamke goyare po dariya feya bemel po sursur yirin. ³⁵ (Mata go kinyin al goreb goke al momon yirde hiyen. Mereminbe fudinde. Yenbe fudinde po yen hime yen nurde hi. Yenbe den asan ga kapyan hen han mar beken fudinde yen nurnayin yenbe gago momon dirde hi.) ³⁶ Be, mata go forok yirin gobe Al Kurunyen asande, “Kin kinin un kuren mun kura ma yufun tinayin,” yitin gwahade goyen po forok yirin. ³⁷ Irde Al Kurunyen mere kurabe, “Yenbe hakde gegelhek beken fakamtin kennayin,” yitin mata gwahade goyen po forok yirin.

Yesu mete tiyamin

(Matiyu 27:57-61; Mak 15:42-47; Luk 23:50-56)

³⁸ Be, fulenon mar beken gwaha tiyamin kamereb Arimatea nin Yosep beken Yesu ulin hakwam nin Pailat gusunon iryin. Yosepbe Yesuyen komat gega, Yuda marte doyan mar nin kafura henbe balmin po hinhin. Be, Pailat beken igin inkeb kun Yesu hakwam go yenyay

kwamiñ marya belej taraj tenje tenj kwamiñ. ³⁹ Yosep belej gwaha tenj hikeya Nikodemus wor gor hinhin. Nikodemusbe hakot kura wawuñ kuñ Yesuya mere tiyaryum al go goyen. Yeñ belej he fimiñ irawa suluk yirde guram irtin hamiñ igiñ wor po goyen tenj wayyiñ. Guram gote kandukmiñbe 30 kilogram gwahade. ⁴⁰ Be, irem go Yesu hakwam go tenj kuñbe amil faykek mete tenj tenje niñ amil gore po bili iraryum. Irde gwaha tenj heñyabe he fimiñ guram irtin gore po sam iraryum. Irem gobe Yuda marte mata gama irdeb gwaha tiyaryum. ⁴¹ Be, Yesu kuruse hende mayamiñ gasuñ go binderebe he dugu kura hinhin. He dugu bana goñbe al hakwa yukuñ yerd yerd horabok bempa kura hinhin. Bempa gobe gergeñ, al hakwa kura ma yerde hitiñ. ⁴² Be, heñ ga moñ Sabat nalu forok yewen tiya go yeñbe bempa gobe bindere hinhin geb, irem go Yesu hakwam tukuñ bana gor keraryum.

20

*Yesube kamyinje mat huwaryin
(Matiyu 28:1-8; Mak 16:1-8; Luk 24:1-12)*

¹ Be, Sabat nalu hubu heñ fay urke Sande hiriñ. Sande wampot muñ, kidoma po hikeya Makdala niñ Maria go bembare kuñbe hora kuruñ horabok bempa yame pet titiñ goyen tenj siña irtin kinyiñ. ² Irdeb kup yeñ Saimon Pitaya kadom kura Yesu belej bubulkuñne wor po yeñ nurde unen hinhin al go hitte wañbe, “Doyañ Al Kuruñ hakwambe bembare mat tenj kwahañ. Irdeb tukuñ gor kura kerhañ yeñ ma

nurhet!” yinyiñ. ³ Irkeb Pitaya kadom hoyan goya wor bembare kwaryum. ⁴ Irem gobe kup yeñ kwaryum. Goyenbe kadom gore Pita fole irde yeñ wa bembare forok yiriñ. ⁵ Forok yeñ pew kañbe horabok bana nankenenbe amil faykenj bili irtiñ go po kinyiñ. Goyenbe biñde ma hurkuriñ. ⁶ Irkeb Saimon Pita, kame wayyiñ goreb wañ biñde hurkuriñ. Irdeb amil faykenj go po gor hike kinyiñ. ⁷ Irde Yesu tonañ bili iramiñ amil go wor kinyiñ. Tonañ bili irtiñ amil gobe uliñ hakwam bili irtiñ amil goya ma hinhin. Kenkela po mupi irde hoyande po kirtiñ hinhin. ⁸ Irkeb Yesuyen komat kura yeñ wa bembare forok yiriñ al go wor biñde hurkuriñ. Hurkuñ gwahade po kenenbe fudinde wor po Yesube kamunde mat huwaruñ yeñ nuryiñ. ⁹ (Goyenpoga irem gobe Al Kurunyen asañde Yesube kamtiñde mat huwaryen yitiñ gokeb bebak ma po tiyaryum.)

*Makdala niñ Mariabe Yesu kinyiñ
(Matiyu 28:9-10; Mak 16:9-11)*

¹⁰ Be, Yesuyen komatmiñ warañ go mulgañ heñ yamiñde kwaryum. ¹¹ Goyenbe Maria go bembare sinjare gor po heñ esen hinhin. Esen henjabe pew kañ bembare bana goñ nanjinyiñ. ¹² Irdeb Al Kurunyen miyon irawa uliñ umña faykek hor yirtiñ goyen Yesu hakwam kirtiñ gasunde go keperde hike yinyiñ. Kurabe tonañ beleñ mat, kurabe kahañ beleñ mat keperaryum.

¹³ Be, irem goreb, “Bere, gebe daniñ esen ha?” inen gusuñan iraryum. Irkeb bere gore wol henbe, “Doyañ Al Kurunnebe al kura beleñ tenj kwahañ. Irde tukuñ gor kura kerhañ yeñ ma

nurde hime,” yinyiñ. ¹⁴ Gwaha ten fulgañ kañbe Yesu go gor huwarde hike kinyiñ. Goyenbe bebakken Yesu yeñ ma kinyiñ. ¹⁵ Irkeb Yesu belen, “Bere, gebe daniñ esen ha? Gebe ganuñ niñ nankenen ha?” inen gusuñan iryiñ. Gwaha inkeb bere goreb he dugu bana goñ bamba hinhin gote doyañ al yeñ nurdeb, “Be, ge belen al hakwam bamba bana hinhin go tukañ kenem gor tukuñ kirmiñ yeñ momoñ nira. Irkeb tewen geb,” inyiñ. ¹⁶ Irkeb Yesu belen, “Maria,” inyiñ. Irkeb bere go yeñ hinhin belen fulgañ kañ kenenbe Hiburu mere mat, “Raboni!” inyiñ. Raboni gote miñbe Tisa.

¹⁷ Be, Yesu belen, “Nanne hitte mulgañ heñ miñmoñ. Niñgeb sisan ma nurayiñ. Gwaha titnenbe kolne yago hitte kuñbe momoñ yira. ‘Nebe mulgañ heñ Adone, denya neyat Al Kurun hitte kwen tihim,’ nina yinayiñ,” inyiñ. ¹⁸ Irkeb Makdala niñ Maria go mere go nurdeb Yesuyen komatmiñ hitte kuriñ. Kuñbe, “Doyañ Al Kurunbe kenhem,” yinyiñ. Irdeb mere gahade nina yeñ momoñ yiryiñ.

*Komatmiñ belen Yesu kenamiñ
(Matiyu 28:16-20; Mak 16:14-18; Luk 24:36-49)*

¹⁹ Be, Sande go wawunbana heñ kidoma hewen tikeb Yesuyen komatmiñ gobe Yuda mar niñ kafura heñbe tumñan ya binde gabu irdeb yame biñ mat tareñ po irdeb hinhan. Irkeb Yesu go wañ mel go hinhan kahalte po huwardeb, “Bitiñ kamke igiñ po hinayiñ,” yinyiñ.

²⁰ Gwaha yinenbe haninya gegelhekyare fakamamin delnen goyen yikala yiryin. Irkeb komatmin go Doyan Al Kurun goyen kenenbe aman nin pultik wor po yamin.

²¹ Be, Yesu beles sopte po, “Bitin kamke igin po hinayin. Nanne beles nad nerke wamin gwahade goyen ne beles wor dad dermeke kunayin geb,” yinyin. ²² Gwaha yinenbe mel go hitte menemin fu yirdeb, “Holi Spirit tenan. ²³ Irdeb den beles al kurat mata bulunmin halde yunayinbe Al Kurun wor mata bulunmin go halde yunyen. Munan mata bulunmin ma halde yunayinbe Al Kurun wor mata bulunmin ma halde yunyen,” yinyin.

Tomas beles Yesu kinyin

²⁴ Be, komatmin 12 goyen al kura Tomas, denem kurabe Didimus inen hanjen al gobe Yesu wayyinyabe gor ma hinhin. ²⁵ Irkeb komatmin wen hoyan beles, “Nenbe Doyan Al Kurun kintin,” yen momon iramin. Goyenbe wol henbe, “Haniinde nil delnen wor wor yenen. Irdeb nil yame bana gon hanne keren. Irdeb hak beles fakamtin yamende gor hanne kerde gab fudinde yen nuren,” yinyin.

²⁶ Be, gor mat nanay fay 7 hubu hekeb Yesuyen komatmin go sopte ya bana gabu iramin. Tomas wor gor hinhin. Yamebe bin mat tatin goyenbe, Yesu go wan mel gote dilin mar huwardeb, “Bitin kamke hinayin,” yinyin. ²⁷ Irdeb Tomas inyin. “Hange faw gar hor irayin. Irde hanne ga yena. Irdeb hange gin irdeb gegelhekner gar kera. Irdeb dufay budam ma henbe ne huwarmin

gayen fudinde yeŋ nurayiŋ,” inyiŋ. ²⁸ Irkeb Tomas gore, “Gebe Al Kurun, Doyan Al Kurunne!” inyiŋ. ²⁹ Irkeb Yesu beley, “Gebe ne neneŋ gab gogo fudinde yeŋ nurha? Al kura go ma neneŋya ne niŋ dufaymiŋ tareŋ irnayiŋ mar gobe Al Kurun beley guram yirde saŋiŋ yiryen,” inyiŋ.

³⁰ Be, Yesube komatmiŋ diliŋde mata tiŋen turuŋ yan kurayen kurayen budam forok yirde hinhin. Goyenbe asaŋ gayenter goke tumŋan ma katiŋ haŋ. ³¹ Goyenbe Yesube Mesaia, Al Kurun Urmiŋ yeŋbe yeŋ ge dufaytiŋ saŋiŋ irnayiŋ yeŋ mere kurun gayen kayhem. Irde yeŋ ge dufaytiŋ tareŋ irke Yesuyen tareŋde Al Kurunya hugiŋen heŋ heŋ mata gobe dende hiyyen yeŋbe mere gago kaŋ hime.

21

Komatmiŋ 7 beley Yesu kenamiŋ

¹ Be, Yesu go komatmiŋ yago Yerusalem hikeya diliŋde forok yiriŋ kamereb Taiberias fe ala kurun siŋare sopte komatmiŋ diliŋde forok yiriŋ. Gote baraŋbe gahade: ² Be, Saimon Pita, Tomas denem kurabe Didimus, Galili naŋa bana niŋ taun Kana gor niŋ al Nataniel, Sebedi urmiŋ waraŋyabe kadom waraŋ hoyan manan tumŋande hinhan. ³ Irkeb Saimon Pita beley, “Nebe fe alare dapŋa niŋ kweŋ tihim,” yinyiŋ. Irkeb mel goreb, “Tumŋan kutek,” inenbe hakwa bana hurkuŋbe kwamiŋ. Goyenbe go wawuŋbe dapŋa kura ma yawaramiŋ.

⁴ Be, wampot muŋ wor po Yesu gobe wan makaŋ siŋare huwaryiŋ. Goyenbe komatmiŋbe

Yesu yeŋ keneŋ bebak ma tiyamiŋ. ⁵ Be, Yesu beleŋ mel goyen hokde po, “Mel yo, dapŋa kura yawarhaŋ we?” yinyiŋ. Irkeb, “Moŋ,” inamiŋ. ⁶ Be, mel gore gwaha inkeb, “Kamaŋtiŋ go hakwa siŋa yase beleŋ mat temeyde gab dapŋa kura yawarnayiŋ,” yinyiŋ. Irkeb mel go gwaha teŋbe dapŋa karim ma yawaramiŋ geb, kamaŋ go tulun teŋ hakwa hende kertek ma hamiŋ.

⁷ Irke gab komatmiŋ kura Yesu beleŋ bubulkunne wor po yeŋ nurde unen hiyen al goreb Pita goyen, “Al irobe Doyaŋ Al Kurun be!” inyiŋ. Irkeb Saimon Pita beleŋ, “Al irobe Doyaŋ Al Kurun be!” yeke nurdeb goyare po uliŋhormiŋ hende niŋ tugu titiŋ goyen teŋ uliŋde bili irdeb fete solok yiriŋ. ⁸ Irkeb komatmiŋ weŋ hoyanbe fe ala kurun feren binde 100 mita gwahade po hinhan geb, hakwa hende kame ga gama irde wayamiŋ. Gama irde waŋ henya be kamaŋ dapŋa beleŋ po maŋiŋ hitiŋ goyen tulun teŋbe teŋ wayamiŋ. ⁹ Irdeb fe siŋare waŋbe kak kawaltiŋde kura gorbe maŋaŋ dapŋaya beretya kura hike yenamiŋ.

¹⁰ Be, Yesu beleŋ, “Dapŋa yawarhaŋ go kura yawanaŋ,” yinyiŋ. ¹¹ Irkeb Saimon Pita go hakwa hende hurkun kamaŋ go tulun teŋ fe siŋare kiryiŋ. Dapŋa karkuwaŋ beleŋ maŋiŋ hiriŋ. Dapŋabe budam wor po 153 yawaramiŋ. Goyenbe kamaŋ go ma erek yiriŋ. ¹² Be, Yesu beleŋ komatmiŋ goyen, “Waŋ wampotde niŋ biŋge nenaŋ,” yinyiŋ. Goyenbe yeŋbe Doyaŋ Al Kurun yeŋ nuramiŋ geb, komatmiŋ kura beleŋ, “Gebe ganuŋ?” yeŋ gusuŋaŋ ma iramiŋ. ¹³ Irkeb

Yesu go waɗ beret go tenbe yuniyɗ. Irdeb dapɗa goyen wor gwahade po iriyɗ. ¹⁴ Be, Yesu go kamiyɗde mat huwariyɗ, irde komatmiyɗ yago hitte forok yiriyɗ goyen gare irkeb wawuɗ karwo hiriyɗ.

Yesu belɗ Pita tareɗ iriyɗ

¹⁵ Be, komatmiyɗ go biɗge nene pasi hamiyɗ. Irkeb Yesu belɗ Saimon Pita go, “Saimon, Yon urmiyɗ, ge gayen fudinde wor po ne niyɗ amaɗɗɗɗ nurde ha? Mel gar haɗ gare ne niyɗ amaɗɗɗɗ nurde haɗ gote folek?” iniyɗ. Irkeb Pita belɗ wol heɗbe, “Gwaha, Doyaɗ Al Kuruyɗ. Gebe ne belɗ ge niyɗ amaɗɗɗɗ nurde hime goyen nurde ha gogo,” iniyɗ. Irkeb, “Sipsipne paka yirde hayiɗ,” iniyɗ. ¹⁶ Irdeb sopte po, “Saimon, Yon urmiyɗ, gebe fudinde wor po ne niyɗ amaɗɗɗɗ nurde ha?” iniyɗ. Irkeb Saimon belɗ, “Gwaha, Doyaɗ Al Kuruyɗ, ne belɗ ge niyɗ amaɗɗɗɗ nurde hime gobe nurde ha gogo,” iniyɗ. Irkeb wol heɗbe, “Sipsipne doyaɗ yirde hayiɗ,” iniyɗ. ¹⁷ Be, wawuɗ karwore sopte, “Saimon, Yon urmiyɗ, gebe ne niyɗ amaɗɗɗɗ nurde ha?” iniyɗ. Irkeb Pita go Yesu belɗ, “Gebe ne niyɗ amaɗɗɗɗ nurde ha?” gwahade wawuɗ karwore gusuɗaɗ irkeb biy misiyɗ iriyɗ. Irkeb Pita go, “Doyaɗ Al Kuruyɗ, gebe det kuruyɗ gayen tumɗaɗ nurde ha. Ge niyɗ amaɗɗɗɗ nurde hime goyen nurde ha gogo,” iniyɗ. Irkeb Yesu go wol heɗbe, “Sipsipne paka yirde hayiɗ. ¹⁸ Fudinde wor po gineyɗ hime, ulger igiyɗ henyaɗe gigenyɗ umɗa ten goy kura kwe yenbe mali ga kuɗ hinhan. Goyenbe salanɗɗɗ hawayiɗyaɗe al belɗ po ganarde umɗa girdeb ge kutek ma girde hiyen

belen goṅ gukunayin,” inyin. ¹⁹ Yesu belen go yirin gobe kame Pita daha mat kamyen, irde kamde kamdemin gore Al Kurun denem turnun yan iryen goke inyin. Be, Yesu go gwaha inenbe, “Gama nira!” inyin.

²⁰ Irkeb Pita go fulgan kanbe Yesu belen komatmin kura bubulkunne wor po yen nurde unen hiyen al goyen gama yirde hike kinyin. Al gobe Yesu kamen go yenya binje funan naminya Yesu hitte tawun henbe, “Doyan Al Kurun, ganun belen pel giren tiya?” inyin al go goyen. ²¹ Be, Pita belen al go kenenbe, “Doyan Al Kurun, munan al gabe daha tiyyen?” inen gusunan iryin. ²² Irkeb Yesu belen wol henbe, “Yenbe dilin gergen hikeya ne mulgan hewen yen nuren gobe gere samun mon geb. Hoyan nin ma dufay hawayin, gama po nirayin,” inyin. ²³ Be, Yesu belen mere tiyyin gote mere momonbe komatmin yago hoyan belen nurdeb kenkela ma bebak tenbe, “Al gobe ma kamyen,” yamin. Gega Yesu belenbe, “Al go ma kamyen,” yen ma yirin. “Yenbe dilin gergen hikeya ne mulgan hewen yen nuren gobe gere samun mon geb,” po yirin.

²⁴ Yesuyen komat gobe Yesu belen mata ten hike yinyin kurun goyen asande gar kaya gago. Al gore Yesuyen baran asande gar kan hi kurun gabe fudinde yen nurde hite.

²⁵ Be, Yesube mata hoyan manan budam tiyyin. Asande gar kan hi gayen po mon. Matamin go tumnan katekbe megen gar asan goyen yerd yerd gasun minmon hiyyen yen nurde hime. Gogo po.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab